


欽定北史

卷之十
七四六



和正涉獵經史弱冠屬蕭寶夤作亂關石乃詣闕請爲軍前驅朝廷嘉之卽拜統軍隨馮翊公長孫承業西征每戰有功拜國子博士行華山郡事屬侍中楊侃爲大都督出鎮潼關引孝寬爲司馬侃奇其才以女妻之永安中授宣威將軍給事中等賜爵山北縣男普泰中以都督從荊州刺史源子恭鎮穰城以功除淅陽郡守時獨孤信爲新野郡守同隸荊州與孝寬情好欵密政術俱美荆部吏人號爲連璧孝武初以都督鎮城周文帝自原州赴雍州命孝寬隨軍及剋潼關卽授弘農郡守從擒寶泰兼左丞節度宜陽兵馬事仍與獨孤信入洛

陽城郡守復與宇文貴怡峯應接潁川義徒破東魏將
任祥堯雄於潁川孝寬又進平樂口下豫州獲刺史馮
邕又從戰於河橋時大軍不利邊境騷然乃令孝寬以
本將軍行宜陽郡事等遷南兗州刺史是歲東魏將段
琛堯傑復據宜陽遣其揚州刺史牛道恒扇誘邊人孝
寬深患之乃遣諜人訪獲道恒手迹令善學書者偽作
道恒與孝寬書論歸欵意又爲落燼燒迹若火下書者
還令諜人送於琛營琛得書果疑道恒其所欲經略皆
不見用孝寬知其離阻因出奇兵掩襲禽道恒及琛等
峭灑遂清大統五年進爵爲侯八年轉晉州刺史尋移

鎮玉壁兼攝南汾州事先是山胡負險屢爲劫盜孝寬示以威信州境肅然進授大都督十二年齊神武傾山東之衆志圖西入以玉壁衝要先命攻之連營數十里至於城下乃於城南起土山欲乘之以入當其山處城上先有兩高樓孝寬更縛木接之令極高峻多積戰具以禦之齊神武使謂城中曰縱爾縛樓至天我會穿城取爾遂於城南鑿地道又於城北起土山攻具晝夜不息孝寬復掘長塹要其地道仍簡戰士屯塹城外每穿至塹戰士卽擒殺之又於塹外積柴貯火敵人有在地道內者便下柴火以皮排吹之火氣一衝咸卽灼爛城

外又造攻車車之所及莫不摧毀雖有排楯莫之能抗
孝寬乃縫布爲縵隨其所向則張設之布懸於空中其
車竟不能壞城外又縛松於竿灌油加火規以燒布并
欲焚樓孝寬復長作鐵鉤利其鋒刃火竿一來以鉤遙
割之松麻俱落外又於城四面穿地作二十一道分爲
四路於其中各施梁柱作訖以油灌柱放火燒之柱折
城竝崩壞孝寬又隨崩處豎木柵以扞之敵不得入城
外盡其攻擊之術孝寬咸拒破之神武無如之何乃遣
倉曹參軍祖孝徵謂曰未聞救兵何不降也孝寬報云
我城池嚴固兵食有餘攻者自勞守者常逸豈有旬朔

之間已須救援適憂爾衆有不反之危孝寬關西男子
必不爲降將軍也俄而孝徵復謂城中人曰韋城主受
彼榮祿或復可爾自外軍士何事相隨入湯火中邪乃
射募格於城中云能斬城主降者拜太尉封開國郡公
邑萬戶賞帛萬匹孝寬手題書背反射城外云若有斬
高歡者一依此賞孝寬弟子遷先在山東又鎖至城下
臨以白刃若有不早降便行大戮孝寬慷慨激揚略無
顧意士卒莫不感勵人有死難之心神武苦戰六旬傷
及病死者十四五智力俱困因而發疾其夜遁去後因
此忿恚遂殂魏文帝嘉孝寬功令殿中尚書長孫紹遠

左丞王悅至玉壁勞問授驃騎大將軍開府儀同三司
進爵建忠郡公廢帝二年爲雍州刺史先是路側一里
置一土堠經雨頽毀每須修之自孝寬臨州仍勒部內
當堠處植槐樹代之旣免修復行旅又得庇蔭周文後
見怪問知之曰豈得一州獨爾當令天下同之於是令
諸州夾道一里種一樹十里種三樹百里種五樹焉恭
帝元年以大將軍與燕公于謹伐江陵平之以功封穰
縣公還拜尚書右僕射賜姓宇文氏三年周文北巡命
孝寬還鎮玉壁周孝閔帝踐阼拜小司徒明帝初參麟
趾殿學士考校圖籍保定初以孝寬立勳玉壁置勳州

仍授勳州刺史齊人遣使至玉壁求通互市晉公護以
其相持日久絕無使命一日忽來求交易疑別有故又
以皇姑皇世母先沒在彼因其請和之際或可致之遂
令司門下大夫尹公正至玉壁共孝寬詳議孝寬乃於
郊盛設供帳令公正接對使人兼論皇家親屬在東之
意使者辭色甚悅時又有汾州胡抄得關東人孝寬復
放東還竝致書一牘具陳朝廷欲敦隣好遂以禮送皇
姑及護母等孝寬善於撫御能得人心所遣間諜入齊
者皆爲盡力亦有齊人得孝寬金貨遙通書疏故齊動
靜朝廷皆先知時有主帥許盆孝寬度以心齋令守一

城益乃以城東入孝寬怒遣謀取之俄而斬首而還其能致物情如此汾州之北離石以南悉是生胡抄掠居人阻斷河路孝寬深患之而地入於齊無方誅剪欲當其要處置一大城乃於河西徵役徒十萬甲士百人遣開府姚岳監築之岳色懼以兵少爲難孝寬曰計成此城十日卽畢旣去晉州四百餘里一日創手二日僞境始知設令晉州徵兵二日方集謀議之間自稽三日計其軍行二日不到我之城隍足得辦矣乃令築之齊人果至南首疑有大軍乃停留不進其夜又令汾水以南傍介山稷山諸村所在縱火齊人謂是軍營遂收兵自

固版築克就卒如孝寬言四年進位柱國時晉公護將東討孝寬遣長史辛道憲啓陳不可護不從旣而大軍果不利後孔城遂陷宜陽被圍孝寬乃謂其將帥曰宜陽一城之地未能損益然兩國爭之勞師數載彼多君子寧乏謀猷若棄峭東來圖汾北我之疆界必見侵擾今宜於華谷及長秋速築城以杜賊志脫其先我圖之實難於是畫地形具陳其狀晉公護令長史叱羅協謂使人曰韋公子孫雖多數不滿百汾北築城遣誰固守事遂不行天和五年進爵鄖國公增邑通前萬戶是歲齊人解宜陽之圍經略汾北築城守之其丞相斛律明

月率數十騎至汾東請與孝寬相見明月云宜陽小城
久勞戰爭今旣入彼欲於汾北取償幸勿恠也孝寬答
曰宜陽彼之要衝汾北我之所棄我棄彼圖取償安在
且君輔翼幼主位重望隆理宜調陰陽撫百姓焉用極
武窮兵結怨連禍且滄瀛大水千里無煙復欲使汾晉
之間橫尸暴骨苟貪尋常之地塗炭無辜之人竊爲君
不取孝寬參軍曲巖頗知卜筮謂孝寬曰來年東朝必
大相殺戮孝寬因令巖作謠歌曰百升飛上天明月照
長安百升斛也又言高山不摧自崩榭樹不扶自豎令
謀人多齎此文遺之於鄴祖孝徵旣聞更潤色之明月

竟以此誅建德之後武帝志在平齊孝寬乃上疏陳三策其第一策曰臣在邊積年頗見間隙不因際會難以成功是以往歲出車徒有勞費功績不立由失機會何者長淮之南舊爲沃土陳氏以破亡餘燼猶能一舉平之齊人歷年赴救喪敗而反內離外叛計盡力窮傳不云乎讐有釁焉不可失也今大軍若出軹關方軌而進兼與陳氏共爲掎角并令廣州義旅出自三鷗又募山南驍銳沿河而下復遣北山稽胡絕其并晉之路凡此諸軍仍令各募關河之外勁勇之士厚其爵賞使爲前驅岳動川移雷駭電激百道俱進竝趨虜庭必當望旗

奔潰所向摧殄一戎大定實在此機其第二策曰若國
家更爲後圖未卽大舉宜與陳人分其兵勢三鷁以北
萬春以南廣事屯田預爲貯積募其驍悍立爲部伍彼
旣東南有敵戎馬相持我出奇兵破其疆場彼若興師
赴援我則堅壁清野待其去遠還復出師常以邊外之
軍引其腹心之衆我無宿春之費彼有奔命之勞一二
年中必自離叛且齊氏昏暴政出多門鬻獄賣官唯利
是視荒淫酒色忌害忠良闔境熬然不勝其弊以此而
觀覆亡可待然後乘間電掃事等摧枯其第三策曰竊
以大周土宇跨據關河蓄席卷之威持建瓴之勢太祖

受天明命與物更新是以二紀之中大功克舉南清江漢西龕巴蜀塞表無虞河右底定唯彼趙魏獨爲榛梗者正以有事三方未遑東略遂使漳滏游魂更存餘晷昔勾踐于吳尚期十載武王取亂猶煩再舉今若更存遵養且復相時臣謂宜還崇隣好申其盟約安人和衆通商惠工蓄銳養威觀釁而動斯則長策遠馭坐自兼并也書奏武帝遣小司寇淮南公元衛開府伊婁謙等重幣聘齊爾後遂大舉再駕而定山東卒如孝寬之策孝寬每以年迫懸車屢請致仕帝以海內未平優詔弗許至是復稱疾乞骸骨帝曰往以面申本懷何煩重請

也五年帝東伐過幸玉壁觀禦敵之所深歎美之移時乃去孝寬自以習練齊人虛實請爲先驅帝以玉壁要衝非孝寬無以鎮之乃不許及趙王招率兵出稽胡與大軍犄角乃敕孝寬爲行軍總管圍守華谷以應接之孝寬剋其西城武帝平晉州復令孝寬還舊鎮及帝凱旋復幸玉壁從容謂孝寬曰世稱老人多智善爲軍謀然朕唯共少年一舉平賊公以爲如何孝寬對曰臣今衰耄唯有誠心而已然昔在少壯亦曾輸力先朝以定關右帝大笑曰實如公言乃詔孝寬隨駕還京拜大司空出爲延州總管進位上柱國大象九年除徐兖等十

一州十五鎮諸軍事徐州總管又爲行軍元帥徇地淮南乃分遣杞公宇文亮攻黃城廓公梁士彥攻廣陵孝寬率衆攻壽陽竝拔之初孝寬到淮南所在皆密送誠欵然彼五門尤爲險要陳人若開塘放水卽津濟路絕孝寬遽令分兵據守之陳刺史吳文立果遣決堰已無及於是陳人退走江北悉平軍還至豫州宇文亮舉兵文立以數百騎襲孝寬營時亮國官茹寬密白其狀孝寬有備亮不得入遁走孝寬追獲之詔以平淮南之功別封一子滑國公及宣帝崩隋文帝輔政時尉遲迥先爲相州總管詔孝寬代之又以小司徒叱列長文爲相

州刺史先令赴鄴孝寬續進至朝歌迺遣其大都督賀
蘭貴齋書候孝寬孝寬留貴與語以察之疑其有變遂
稱疾徐行又使人至相州求鑿藥密以伺之既到湯陰
逢長文奔還孝寬兄子魏郡守藝又棄郡南走孝寬審
知其狀乃馳還所經橋道皆令毀撤驛馬悉擁以自隨
又勒驛將曰蜀公將至可多備餽酒及芻粟以待之迺
果遣儀同梁子康將數百騎追孝寬驛司供設豐厚所
經之處皆輒停留由是不及時或勸孝寬以爲洛京虛
弱素無守備河陽鎮防悉是關東鮮卑迺若先往據之
則爲禍不小乃入保河陽河陽城內舊有鮮卑八百人

家竝在鄴見孝寬輕來謀欲應迥孝寬知之遂密造東京官司詐稱遣行分人詣洛受賜旣至洛陽竝留不遣因此離解其謀不成六月詔發關中兵以孝寬爲元帥東伐七月軍次河陽迥所署儀同薛公禮等圍逼懷州孝寬遣兵擊破之進次懷縣永橋城之東南其城旣在要衝雉堞牢固迥已遣兵據之諸將士以此城當路請先攻取孝寬曰城小而固若攻而不拔損我兵威今破其大軍此亦何能爲也於是引軍次於武陟大破迥子惇惇輕騎奔鄴軍次於鄴西門豹祠之南迥自出戰又破之迥窮迫自殺兵士在小城中者盡坑之於游豫園

諸有未服皆隨機討之關東悉平十月凱還京師十一月薨時年七十二贈太傅十二州諸軍事雍州牧諡曰襄孝寬在邊多載屢抗強敵所有經略布置之初人莫之解見其成事方乃驚服雖在軍中篤意文史政事之餘每自披閱末年患眼猶令學士讀而聽之又早喪父母事兄嫂甚謹所得俸祿不入私房親族有孤遺者必加振贍朝野以此稱焉長子諶年十歲魏文帝欲以女妻之寬辭以兄子世康年長帝嘉之遂以妻世康孝寬有六子總壽霽津知名總字善會聰敏好學位驃騎大將軍開府儀同三司納言京兆尹帝常戲總曰卿師尹

帝鄉故當不以富貴威福鄉里邪總乃正色對曰陛下擢臣非分竊謂已鑒愚誠今奉嚴旨便似未照丹赤豈可久忝此職用疑聖慮請解印綬以避賢能帝大笑曰前言戲之耳五年從武帝東征總每率麾下先驅陷敵遂於并州戰歿時年二十九贈上大將軍追封河南郡公諡曰貞六年重贈柱國五州刺史子國成嗣後襲孝寬爵鄖國公隋文帝追錄孝寬舊勲開皇初詔國成食封三千戶收其租賦

壽字世齡以貴公子早有令譽位京兆尹武帝親征齊委以後事以父軍功賜爵永安縣侯隋文帝爲丞相以

其父平尉遲迥拜壽儀同三司進封滑國公文帝受禪
歷位恒尾二州刺史頗有能名以疾徵還卒于家諡曰
定仁壽中文帝爲晉王廣納其女爲妃其子保巒嗣壽
弟壽位太常少卿安邑縣伯壽弟津位內史侍郎戶部
侍郎判尚書事孝寬兄夔

夔字敬遠志尚夷簡澹於榮利弱冠被召拜雍州中從
事非其好也遂謝疾去前後十見徵辟皆不應命屬周
文帝經綸王業側席求賢聞夔養高不仕虛心敬悅遣
使辟之備加禮命雖情諭甚至而竟不能屈彌以重之
亦弗之奪也所居之宅枕帶林泉夔對翫琴書蕭然自

逸時人號爲居士焉至有慕其閑素者或載酒從之負亦爲之盡歡接對忘倦明帝卽位禮敬愈厚乃爲詩以貽之曰六爻貞遯世三辰光少微潁陽讓逾遠滄洲去不歸香動秋蘭佩風飄蓮葉衣坐石窺仙洞乘槎下釣磯嶺松千仞直巖泉百丈飛聊登平樂觀遙望首陽薇詎能同四隱來參余萬機負答帝詩願時朝謁帝大悅敕有司日給河東酒一升號之曰逍遙公時晉公護執政廣營第宅嘗召負至宅訪以政事負仰視其堂乃徐而嘆曰酣酒嗜音峻宇雕墻有一於此未或弗亡護不悅有識者以爲知言陳遣其尚書周弘正來聘素聞負

名請與相見朝廷許之弘正乃造夔談讜盡日恨相遇
之晚後請夔至賓館夔不時赴弘正乃贈詩曰德星猶
未動真車詎肯來其爲當時所欽挹如此武帝嘗與夔
夜宴大賜之縑帛令侍臣數人負以送出夔唯取一匹
示承恩旨而已帝以此益重之孝寬爲延州總管夔至
州與孝寬相見將還孝寬以所乘馬及轡勒與夔夔以
其華飾心弗欲之笑謂孝寬曰昔人不棄遺簪墜屨者
惡與之同出不與同歸吾之操行雖不逮前烈然捨舊
錄新亦非吾志也於是乃乘舊馬以歸武帝又以佛道
儒三教不同詔夔辨其優劣夔以三教雖殊同歸於善

其迹似有深淺其致理殆無等級乃著三教序奏之帝覽而稱善時宣帝在東宮亦遺夔書并令以帝所乘馬迎之問以立身之道夔對曰傳不云乎儉爲德之恭侈爲惡之大欲不可縱志不可滿竝聖人之訓也願殿下察之夔子瓘行隨州刺史因疾物故孝寬子總復於并州戰歿一日之中凶問俱至家人相對悲慟而夔神色自若謂之曰死生命也去來常事亦何足悲援琴撫之如舊夔又雅好名義虛襟善誘雖耕夫牧豎有一介可稱者皆接引之特與族人處立及安定梁曠爲放逸之友少愛文史留情著述手自抄錄數十萬言晚年虛靜

唯以體道會真爲務舊所制述咸削其藁故文筆多竝
不存建德中夔以年老預戒其子等曰昔士安以籩條
束體王孫以布囊繞尸二賢高達非庸才能繼吾死之
日可斂舊衣莫更新造使棺足周尸牛車載柩墳高四
尺壙深一丈其餘煩雜悉無用也朝晡奠食於事彌煩
吾不能頓絕汝輩之情可朔望一奠而已仍薦蔬素勿
設牲牢親友欲以物弔祭者竝不得爲受吾常恐臨終
恍惚故以此言預戒汝輩瞑目之日忽違吾志也宣政
元年二月卒於家時年七十七武帝遣使弔祭賻贈有
加其喪制葬禮諸子等竝遵其遺戒子世康

世康幼而沉敏有器度年十歲州辟主簿在魏弱冠爲直寢封漢安縣公尚周文帝女襄樂公主授儀同三司仕周歷位典祠下大夫沔硤二州刺史從武帝平齊授司州總管長史時東夏初定百姓未安世康綏撫之士庶胥悅入爲戶部中大夫進位上開府轉司會中大夫尉遲迥之亂隋文帝謂世康曰汾絳舊是周齊分界因此亂階恐生搖動今以委公因授絳州刺史以雅望鎮之闔境清肅世康性恬素好古不以得喪干懷在州有止足之志與子弟書曰吾生因緒餘夙霑纓弁驅馳不已四紀於茲亟登袞命頻莅方岳志除三惑心慎四知

以不貪而爲寶處脂膏而莫潤如斯之事頗爲時悉今
耄雖未及壯年已謝霜早梧楸風先蒲柳眼間更劇不
見細書足疾彌增非可趨走祿豈須多防滿則退年不
待暮有疾便辭況孃春秋已高溫清宜奉晨昏有關罪
在我躬今世穆世文竝從武役吾與世冲復嬰遠任陟
岵瞻望此情彌切桓山之悲倍深常戀意欲上聞乞遵
禮教未訪汝等故遣此及興言遠慕感咽難勝諸弟報
以事恐難遂乃止在任有惠政奏課連最擢爲禮部尚
書世康寡嗜慾不慕勢貴未嘗以位望矜物聞人之善
若已有之亦不顯人過咎以求名譽進爵上庸郡公轉

吏部尚書選用平允請託不行以母憂去職固辭乞終私制上不許開皇七年將事江南議重方鎮拜襄州刺史坐事免未幾授安州總管遷信州總管十三年復拜吏部尚書前後十餘年間多所進拔朝廷稱爲廉平嘗因休暇謂子弟曰吾聞功遂身退古人常道今年將耳順志在懸車汝輩以爲云何子福嗣答曰大人澡身浴德名立官成盈滿之戒先哲所重欲追蹤二疏伏奉尊命後因侍宴世康再拜陳讓願乞骸骨上曰冀與公共理天下今之所請深乖本望縱筋力衰謝猶屈公卧臨一隅於是出拜荊州總管時天下唯置荆并楊益四大

總管并楊益三州竝親王臨統唯荊州委於世康時論
以此爲美世康爲政簡靜百姓愛悅卒於州聞而痛惜
贈大將軍諡曰文世康性孝友初以諸弟位竝隆貴獨
季弟世約宦塗不達共推父時田宅盡以與之世多其
義長子福子位司隸別駕次子福嗣位內史舍人後以
罪黜楊玄感之亂從衛玄戰敗於城北爲玄感所獲令
爲文檄詞甚不遜尋背玄感還東都帝銜之車裂於高
陽少子福獎通事舍人在東都與玄感戰沒

世康兄洸字世穆性剛毅有器幹少便弓馬仕周釋褐
直寢上士數從征伐累遷開府賜爵衛國縣公隋文帝

爲丞相從季父孝寬擊尉遲迥於相州以功拜柱國進襄陽郡公時突厥寇邊皇太子屯咸陽令洸統兵出原州道與虜相遇擊破之拜江陵總管俄拜安州總管伐陳之役爲行軍總管及陳平拜江州總管略定九江遂進圖嶺南上與書慰勉之洸至廣州嶺表皆降之上聞而大悅許以便宜從事洸所綏集二十四州拜廣州總管歲餘番禺夷王仲宣反以兵圍洸洸拒之中流矢卒贈上柱國賜綿絹萬段諡曰敬子協字欽仁好學有雅量位祕書郎其父在廣州有功上命協齎詔書勞問未至而父卒上以其父死王事拜協柱國歷定息秦三州

刺史有能名卒官洗弟瓘字世恭御正下大夫儀同三
司行隨州刺史

瓘弟藝字世文周武帝時以軍功位上儀同賜爵修武
縣侯授左旅下大夫出爲魏郡太守及隨文帝爲丞相
尉遲迥陰圖不軌朝廷遣藝季父孝寬馳往代迥孝寬
將至鄴詐病止傳舍從迥求藥以密觀變藝因投孝寬
卽從孝寬擊迥以功進位上大將軍改封武威縣公以
修武縣侯別封一子文帝受禪進封魏興郡公拜齊州
刺史爲政通簡士庶懷惠遷營州總管藝容貌瓌偉每
夷狄參謁必整儀衛盛服以見之獨坐滿一榻蕃人畏

懼莫敢仰視而大修產業與北夷貿易家資鉅萬頗爲清論所譏卒官諡曰懷藝弟冲字世冲以名家子在周釋褐衛公府禮曹參軍從大將軍元定度江伐陳爲陳人所虜周武帝以幣贖還之帝復令冲以馬千匹使陳贖開府賀拔華等五十人及元定之柩而還冲有辭辯奉使稱旨累遷小御伯下大夫加上儀同拜汾州刺史隋文帝踐阼徵兼散騎常侍進位開府賜爵安固縣侯歲餘發南汾州胡千餘人北築長城在塗皆亡上呼冲問之冲曰皆由牧宰不稱所致請以理綏靜可不勞兵而定上因命冲綏懷叛者月餘竝赴長城上降書勞勉

之尋拜石州刺史甚得諸胡歡心以母憂去職俄起爲南寧州總管持節撫慰復遣柱國王長述以兵繼進沖旣至南寧渠帥首領皆詣府參謁上大悅下詔褒揚之其兄子伯仁隨沖在府掠人之妻士卒縱暴邊人失望上聞之大怒令蜀王秀按其事益州長史元巖性方正按沖無所寬貸竟坐免官其弟太子洗馬世約譖巖於皇太子上謂太子曰古人云酤酒酸而不售者爲噬犬耳今何用世約乎世約遂除名後令沖檢校括州事時東陽賊帥陶子定吳州賊帥羅慧方竝聚衆爲亂沖率兵破之改封義豐縣侯檢校泉州事遷營州總管沖容

貌都雅寬厚得衆心撫鞞羯契丹皆能致其死力奚霫畏懼朝貢相續高麗嘗入寇沖擊走之及文帝爲豫章王暕納沖女爲妃徵拜戶部尚書卒官少子挺知名

韋瑱字世珍京兆杜陵人也世爲三輔著姓曾祖惠度姚弘尚書郎隨劉義真過江仕宋爲順陽太守行南雍州事後於襄陽歸魏拜中書侍郎贈洛州刺史祖千雄略陽郡守父英代郡守贈兖州刺史瑱幼聰敏有夙成之量起家太尉府法曹參軍累遷諫議大夫周文帝爲丞相封長安縣男轉行臺左丞遷南郢州刺史復令爲行臺左丞瑱明察有幹局再居左轄時論榮之從復弘

農戰沙苑加衛大將軍左光祿大夫從戰河橋進爵爲
子大統八年齊神武侵汾絳瑱從周文禦之軍還以本
官鎮蒲津關帶中潭城主歷鴻臚卿以望族兼領鄉兵
加帥都督進散騎常侍魏恭帝三年賜姓宇文氏三年
除瓜州刺史州通西域蕃夷往來前後刺史多受賂遺
胡寇犯邊又莫能禦瑱雅性清儉兼有武略蕃夷贈遺
一無所受胡人畏威不敢爲寇公私安靜夷夏懷之周
孝閔帝踐阼進爵平齊縣伯秩滿還京吏人戀慕老幼
追送留連十數日方得出境明帝嘉之授侍中驃騎大
將軍開府儀同三司卒贈岐宜二州刺史諡曰惠又追

封爲公詔其子峻襲峻位至車騎大將軍儀同三司峻子德政隋大業中給事郎峻弟師

師字公穎少沉謹有志性初就學始讀孝經捨書而歎曰名教之極其在茲乎少丁父母憂居喪盡禮州里稱其有孝行及長略涉經史尤工騎射周大象宰宇文護引爲中外府記室轉賓曹參軍師雅知諸蕃風俗及山川險易其有夷狄朝貢師必接對論其國俗如視諸掌夷人驚服無敢隱情齊王憲爲雍州牧引爲主簿本官如故及武帝親總萬機轉少府大夫及齊平詔師安撫山東徙爲賓部大夫隋文帝受禪拜吏部侍郎賜爵井

陘侯遷河北道行臺兵部尚書奉詔爲山東河南十八州安撫大使奏事稱旨兼領晉王廣司馬其族人世康爲吏部尚書與師素懷勝負于時廣爲雍州牧盛存望第以司空楊雄尚書左僕射高頴竝爲州都督引師爲主簿而世康弟世約爲法曹從事世康恚恨不能食又恥世約在師之下召世約數之曰汝何故爲從事遂杖之後從上幸醴泉宮上召師與左僕射高頴上柱國韓擒等於卧內賜宴令各叙舊事以爲笑樂平陳之役以本官領元帥掾陳國府藏悉委於師秋毫無犯稱爲清白後上爲長寧王儼納其女爲妃除汴州刺史甚有政

名卒官諡曰定師宗人暮仕周位內史大夫隋文帝初以定策功累遷上柱國封普安郡公開皇初卒於蒲州刺史

柳蚪字仲盤河東解人也五世祖恭仕後趙爲河東郡守後以秦趙喪亂率人南徙居汝潁間遂仕江表祖緝宋州別駕宋安郡守父僧習善隸書敏於當世與豫州刺史裴叔業據州歸魏歷北地潁川二郡守揚州大中正蚪年十二便專精好學時貴游子弟就學者竝車服華盛唯蚪不事容飾徧受五經略通大義兼涉子史雅好屬文孝昌中揚州刺史李憲舉蚪秀才兖州刺史馮

雋引蚪爲府主簿旣而樊子鶴爲吏部尚書其兄義爲揚州刺史乃以蚪爲揚州中從事加鎮遠將軍非其好也竝棄官還洛陽屬天下喪亂乃退耕於陽城有終焉之志大統三年馮翊王元季海領軍獨孤信鎮洛陽于時舊京荒廢人物罕存唯有蚪在陽城裴諷在潁川信等乃俱徵之以蚪爲行臺郎中諷爲北府屬竝掌文翰時人爲之語曰北府裴諷南府柳蚪時軍旅務殷蚪勵精從事或通夜不寢季海常云柳郎中判事我不復重看四年入朝周文帝欲官之蚪辭母老乞侍盥藥周文許焉又爲獨孤信開府從事中郎信出鎮隴右因爲秦

州刺史以蚪爲二府司馬雖處元僚不綜府事唯在信
左右談論而已因使見周文被留爲丞相府記室追論
歸朝功封美陽縣男蚪以史官密書善惡未足懲勸乃
上疏曰古者人君立史官非但記事而已蓋所爲鑒誠
也動則左史書之言則右史書之彰善癉惡以樹風聲
故南史抗節表崔杼之罪董狐書法明趙盾之愆是知
執筆於朝其來久矣而漢魏已還密爲記注徒聞後世
無益當時非所謂將順其美匡救其惡者且著述之人
密書縱能直筆人莫知之何止物生橫議亦自異端互
起故班固致受金之名陳壽有求米之論著漢魏者非

一氏造晉史者至數家後代紛紜莫知準的伏惟陛下則天稽古勞心庶政開誹謗之路納忠讜之言諸史官記事者請皆當朝顯言其狀然後付之史閣庶令是非明著得失無隱使聞善者日修有過者知懼事遂施行十四年除祕書丞領著作舊丞不參史事自蚪爲丞始令監掌焉遷中書侍郎修起居注仍領丞事時人論文體者有今古之異蚪又以爲時有古今非文有古今乃爲文質論文多不載廢帝初遷祕書監加車騎大將軍儀同三司蚪脫略人間不事小節弊衣蔬食未嘗改操人或譏之蚪曰衣不過適體食不過充飢孜孜營求徒

勞思慮耳恭帝元年冬卒時年五十四贈兗州刺史諡曰孝有文章數十篇行於世子鴻漸嗣虯弟檜

檜字季華性剛簡任氣少文善騎射果於斷決年十八起家奉朝請居父喪毀瘠骨立服闋除陽城郡丞防城都督大統四年從周文戰於河橋先登有功授都督鎮鄆州八年拜湟河郡守仍典軍事尋加平東將軍太中大夫吐谷渾入寇郡境時檜兵少人懷憂懼檜撫而勉之衆心乃安因率數十人先擊之渾人潰亂餘衆乘之遂大敗而走以功封萬年縣子時吐谷渾強盛數侵疆場自檜鎮鄆州屢戰必破之數年之後不敢爲寇十四

年遷河州別駕轉帥都督俄拜使持節撫軍將軍大都督居三載徵還京師時檜兄蚪爲祕書丞弟慶爲尚書左丞檜嘗謂兄弟曰兄則職典簡牘褒貶人倫弟則管轄郡司股肱朝廷可謂榮寵矣然而四方未靜車書不一檜唯當蒙矢石履危難以報國恩耳頃之周文謂檜曰卿昔任鄯州忠勇顯著今西境肅清無勞經略九曲國之東鄙當勞君守之遂令檜鎮九曲尋從大將軍王雄討上津魏興平之卽除魏興華陽二郡安康人黃衆寶謀反連結黨與將圍州城乃相謂曰常聞柳府君勇悍有餘不可當今旣在外方爲吾徒腹心之疾也不如

先擊之遂圍檜郡郡城卑下士衆寡弱又無守禦之備
連戰積十餘日士卒僅有存者於是力屈城陷身被十
餘創遂爲賊所獲旣而衆寶等進圍東梁州乃縛檜置
城下欲令誘城中檜乃大呼曰羣賊烏合糧食已罄行
卽退散各宜勉之衆寶大怒乃臨檜以兵曰速更汝辭
不爾便就戮矣檜守節不變遂害之棄屍水中城中人
皆爲之流涕衆寶解圍之後檜兄子止戈方收檜屍還
長安贈東梁州刺史子斌嗣

斌字伯達年十七齊公憲召爲記室早卒斌弟雄亮字
信誠父檜在華陽見害雄亮時年十四哀毀過禮陰有

復讐之志武帝時衆寶率其部歸長安帝待之甚厚雄
亮手斬衆寶於城中請罪闕下帝特原之後累遷內史
中大夫賜爵汝陽縣子隋文帝受禪拜尚書考功侍郎
遷給事黃門侍郎尚書省凡所奏事多所駁正深爲公
卿所憚俄以本官檢校太子左庶子進爵爲伯秦王俊
鎮隴右出爲秦州總管府司馬領山南道行臺左丞卒
子贊嗣檜弟鷲好學善屬文卒於魏臨淮王記室參軍
事子帶韋字孝孫深沉有度量少好學身長八尺三寸
美風儀善占對周文辟爲參軍事侯景作亂江南周文
命帶韋使江郢二州與梁邵陵南平二王通好行至安

州遇段寶等反帶韋乃矯爲周文書以安之竝卽降附
及見邵陵具申周文意邵陵遣使隨帶韋報命以奉使
稱旨授輔國將軍中散大夫後達奚武經略漢川以帶
韋爲行臺左丞從軍南討時梁宜豐侯蕭修守南鄭武
攻之未拔乃令帶韋入城說修降之廢帝元年出爲解
縣令加授驃騎將軍左光祿大夫轉汾陰令發擿姦伏
百姓畏而懷之周武成元年授武藏下大夫天和二年
封康城縣男累遷兵部中大夫雖頻改職仍領武藏五
年轉武藏中大夫俄遷驃騎大將軍開府儀同三司凡
居劇職十有餘年處斷無滯官曹清肅時譙王儉爲益

州總管漢王贊爲益州刺史武帝以帶韋爲益州總管
府長史領益州別駕輔弼二王總知軍事及大軍東討
徵爲前軍總管齊王憲府長史齊平以功授上開府儀
同大將軍進爵爲公陳王純鎮井州以帶韋爲井州司
會井州總管府長史卒官諡曰愷子祚嗣少有名譽位
宣納上士入隋位司勳侍郎鶩弟慶

慶字更興幼聰敏有器量博涉羣書不爲章句好飲酒
閑於占對年十三因暴書父僧習試令慶於雜賦集中
取賦一篇千餘言誦之慶立讀三徧便誦之無所漏時
僧習爲潁川郡守地接都畿人多豪右將選鄉官皆依

貴勢競來請託選用既定僧習謂諸子曰權貴請託吾
竝不用其使欲還皆須有答汝等各以意爲吾作書慶
乃具書草僧習讀歎曰此兒有意氣丈夫理當如是卽
依慶所草以報起家奉朝請慶出後第四叔及遭父憂
議者不許爲服重慶泣曰禮緣人情若於出後之家更
有苴斬之服可奪以此從彼今四叔薨背已久情事不
追豈容奪禮乖違天性時論不能抑遂以苦由終喪旣
葬乃與諸兄負土成墳孝武將西遷慶以散騎侍郎馳
傳入關慶至高平見周文共論時事周文卽請奉迎輿
駕仍令慶先還復命時賀拔勝在荊州帝屏左右謂慶

曰朕欲往荊州何如慶曰關中金城千里天下之疆國也荊州地無要害寧足以固鴻基帝納之及帝西遷慶以母老不從獨孤信之鎮洛陽乃得入關除相府東閣祭酒大統十年除尚書都兵郎中并領記室時北雍州獻白鹿羣臣欲賀尚書蘇綽謂慶曰近代已來文章華靡逮于江左彌復輕薄洛陽後進祖述未已相公柄人軌物君職典文房宜製此表以革前弊慶操筆立成辭兼文質綽讀而笑曰枳橘猶自可移況才子也尋以本官領雍州別駕廣陵王欣魏之懿親其甥孟氏屢爲兇橫或有告其盜牛慶捕得實趣令就禁孟氏殊無懼容

乃謂慶曰若加以桎梏後獨何以脫之欣亦遣使辨其無罪孟氏由此益驕慶乃大集僚吏盛言孟氏倚權侵虐之狀言畢令笞殺之此後貴戚斂手有賈人持金二十斤詣京師寄人居止每欲出行常自執管鑰無何緘閉不異而竝失之謂主人所竊郡縣訊問主人自誣服慶疑之乃召問賈人曰卿鑰恒置何處對曰恒自帶之慶曰頗與人同宿乎曰無與同飲乎曰日者曾與一沙門再度酣宴醉而晝寢慶曰沙門乃真盜耳卽遣捕沙門乃懷金逃匿後捕得盡獲所失金十二年改三十六曹爲十二部以慶爲計部郎中別駕如故又有胡家被

劫郡縣按察莫知賊所鄰近被囚者甚多慶以賊是烏合可以詐求之乃作匿名書多榜官門曰我等共劫胡家徒侶混雜終恐泄露今欲首伏懼不免誅若聽先首免罪便欲來告慶乃復施免罪之牒居三日廣陵王欣家奴面縛自告牒下因此盡獲黨與慶之守正明察皆此類也每歎曰昔于公斷獄無私闢高門以待封儻斯言有驗吾其庶幾乎封清河縣男除尚書左丞攝計部周文嘗怒安定國臣王茂將殺之而非其罪朝臣咸知而莫敢諫慶乃進爭之周文逾怒曰卿若明其無罪亦須坐之乃執慶于前慶辭氣不撓抗聲曰竊聞君有不

達者爲不明臣有不爭者爲不忠慶謹竭愚誠實不敢
愛死但懼公爲不明之君耳周文乃悟而赦茂已不及
矣周文默然明日謂慶曰吾不用卿言遂令王茂寃死
可賜茂家錢帛以旌吾過尋進爵爲子慶威儀端肅樞
機明辯周文每發號令常使慶宣之天性抗直無所回
避周文亦以此深委仗焉恭帝初進位驃騎大將軍開
府儀同三司尚書右僕射轉左僕射領著作六官建拜
司會中大夫周孝閔帝踐阼賜姓宇文氏進爵平齊縣
公晉公護初執政欲引爲腹心慶辭之頗忤旨又與楊
寬有隙及寬參知政事慶遂見疎忌出爲萬州刺史明

帝尊悟留爲雍州別駕領京兆尹武成二年除宜州刺史慶自爲郎迄爲司會府庫倉儲竝其職也及在宜州寬爲小冢宰乃囚慶故吏求其罪失案驗積六十餘日吏或有死於獄者終無所言唯得乘錦數匹時人服其廉慎又入爲司會先是慶兄檜爲魏興郡守爲賊黃衆寶所害檜子三人皆幼弱慶撫養甚篤後衆寶歸朝朝廷待以優禮居數年檜次子雄亮白日手刃衆寶於長安城中晉公護聞而大怒執慶諸子姪皆囚之讓慶擅殺人對曰慶聞父母之讐不同天昆弟之讐不同國明公以孝臨天下何乃責於此乎護逾怒慶辭色無屈竟

以俱免卒贈鄜綏丹三州刺史諡曰景子機嗣

機字匡時偉容儀有器局頗涉經史年十九周武帝時爲魯公引爲記室及帝嗣位累遷太子宫尹封平齊縣公宣帝時爲御正上大夫機見帝失德屢諫不聽恐禍及已託於鄭譯求出拜華州刺史及隋文帝作相徵還京師時周代舊臣皆勸禪讓機獨義形於色無所陳請俄拜衛州刺史及踐阼進爵建安郡公徵爲納言機性寬簡有雅望當近侍無所損益又好飲酒不親細務數年出爲華州刺史奉詔每月朝見尋轉冀州刺史後徵入朝以其子述尚蘭陵公主禮遇益隆初機在周與族

人文城公昂俱歷顯要及此昂機竝爲外職楊素時爲
納言方用事因上賜宴素戲曰二柳俱催孤楊獨聳坐
者歡笑機竟無言未幾還州前後作守俱稱寬惠後以
徵還卒于家贈大將軍青州刺史諡曰簡子述嗣

述字業隆性明敏有幹略頗涉文藝以父蔭爲太子親
衛後以尚主故拜開府儀同三司內史侍郎上於諸壻
中特見寵遇歲餘判兵部尚書事父艱去職未幾起攝
給事黃門侍郎事襲爵建安郡公仁壽中判吏部尚書
事迹雖職務修理爲當時所稱然不達大體暴於馭下
又怙寵驕豪無所降屈楊素時方貴重朝臣莫不讐憚

述每陵侮之數於上前面折素短判事有不合素意或令述改輒謂將命者曰語僕射道尚書不肯素由是銜之俄而楊素被疎忌不知省事述任寄逾重拜兵部尚書參掌機密述自以無功可紀過叨匪服抗表陳讓上許之命攝兵部尚書上於仁壽宮寢疾述與楊素黃門侍郎元巖等侍疾宮中時皇太子無禮於陳貴人上知之大怒令述召房陵王述與元巖出外作敕書楊素見之與皇太子謀矯詔執述巖屬吏及煬帝嗣位述坐除名公主請與同徙帝不聽述在龍川數年復徙寧越遇瘴癘死

機弟弘字匡道少聰穎工草隸博涉羣書辭采雅贍與
弘農楊素爲莫逆交解巾中外府記室建德初除內史
上士歷小宮尹御正上士陳遣王偃人來聘武帝令弘
勞之偃人謂弘曰來日至藍田正逢滋水暴長所齎國
信溺而從流今所進假之從吏請勒下流人見爲尋此
物弘曰昔淳于之獻空籠前史稱以爲美足下假物而
進詎是陳君命乎偃人慙不能對武帝聞而嘉之盡以
偃人所進物賜弘仍令報聘占對敏捷見稱於時後卒
於御正下大夫贈晉州刺史楊素誄之曰山陽王弼風
流長逝穎川荀粲零落無時修竹夾池永絕梁園之賦

長楊映沼無復洛川之文其爲士友所痛惜如此有文集行於世

弘弟旦字匡德工騎射頗涉書籍仕周位兵部下大夫以行軍長史從梁睿討王謙以功授儀同三司開皇元年加開府封新城縣男授掌設驃騎歷羅浙魯三州刺史竝有能名大業初拜龍川太守郡人居山洞好相攻擊旦爲開設學校大變其風帝聞下詔褒美之徵爲太常少卿攝判黃門侍郎事卒子變官至河內郡掾

旦弟肅字匡仁少聰敏閑於占對仕周位宣納上士隋文帝作相引爲賓曹參軍開皇初授太子洗馬陳使謝

泉來聘以才學見稱詔肅宴接時論稱其華辯歷太子
內舍人遷太子僕太子廢坐除名大業中帝與段達語
及庶人罪惡達云柳肅在宮大見疎斥帝問其故答曰
學士劉臻嘗進章仇太翼宮中爲巫蠱事肅知而諫曰
殿下位當儲貳戒在不孝無患見疑劉臻書生鼓搖唇
舌適足以相誑誤願勿納之庶人不憚他日謂臻曰汝
何漏泄使柳肅知之令面折我自是後言皆不用帝曰
肅橫除名乃召守禮部侍郎坐事免後守工部侍郎大
見親任每幸遼東嘗委於涿郡留守卒官

機從子審之字公正父蔡年周順州刺史審之身長七

尺五寸儀容甚偉風神爽亮進止可觀爲童兒時周齊王憲遇之於塗異而與語大奇之因奏爲國子生以明經擢第拜宮師中士轉守廟下士武帝有事太廟謇之讀祝文音韻清雅觀者屬目帝善之擢爲宣納上士開皇初拜通事舍人尋遷內史舍人歷兵部司勳二曹侍郎朝廷以謇之雅望善談謔又飲酒至一石不亂由是每陳使至輒令接對遷光祿少卿出入十餘年每參掌敷奏會吐谷渾來降朝廷以宗女光化公主妻之以謇之兼散騎常侍送公主於西域及突厥啓人可汗求和親復令謇之送義成公主於突厥前後使二國得贈馬

二千餘匹雜物稱是皆散之宗族家無餘財出爲肅息
二州刺史俱有惠政煬帝踐阼復拜光祿大業初啓人
可汗自以內附遂畜牧於定襄馬邑間帝使蹇之論令
出塞還拜黃門侍郎時元德太子初薨朝野注望以齊
王當立帝方重王府之選拜爲齊王長史帝法服臨軒
命齊王立於西朝堂遣吏部尚書牛弘內史令楊約左
衛大將軍宇文述等從殿廷引蹇之詣齊王所西面立
弘宣敕謂齊王曰我出蕃之初時年十二先帝立我於
西朝堂乃令高穎虞慶則元旻等從內送王子相於我
誠我日以汝未更世事令子相作輔於汝事無大小皆

可委之無得昵近小人疎遠子相若從我言者有益於社稷成立汝名行如不用此言唯國及身敗無日矣吾受敕奉以周旋不敢失墜微子相之力吾幾無今日矣若與蹇之從事一如子相也又敕蹇之曰今以卿作輔於齊副朕所望若齊王德業脩備富貴自當鍾卿一門若有不善罪亦相及時齊王擅寵喬令則之徒深見昵狎蹇之知其非不能匡正及王得罪蹇之竟坐除名及帝幸遼東召檢校燕郡事帝班師至燕郡坐供頓不給配戍嶺南卒於滙口子威明

論曰高氏籍四胡之勢跨有山東周文承二將之餘創

基關右似商周之敵若漢楚之爭雄又連官渡之兵
未定鴻溝之約雖弘農沙苑齊卒先奔而河橋北芒周
師撓敗於是競圖進取各務兵戈齊謂兼并有餘周則
自守不足韋孝寬奇材異度緯武經文居要害之地受
干城之託東人怙恃其衆悉力來攻將欲醜酒未央飲
馬清渭孝寬廼馮茲雉堞抗彼仇讐事甚析骸勢危負
戶終能奮其智勇應變無方城守六旬竟推大敵齊人
旣焚營宵遁高氏遂憤恚而殂雖卽墨破燕晉陽存趙
何以能尚若使平陽不守鄴城無衆人之師玉壁啓關
函谷失封泥之固斯豈一城之得喪寔亦二國之興亡

者歟韋叟隱不負人貞不絕俗怡神墳籍養素丘園哀
樂無以動其心名利不足干其慮確乎不拔實近代之
高人也明帝比諸園綺豈徒然哉世康風神雅量一代
稱偉簪纓人物見重京華瑱素望高風亦云美矣柳蚪
兄弟雅道是基竝能譽重搢紳豈虛至也慶束帶立朝
匪躬是蹈莅官從政清白著美至於畏避權寵違忤宰
臣雖取詘於一時實獲申於千載矣機立身行已本以
寬雅流譽至於登朝正色可謂不違直道雖陵谷遷貿
終以雅正自居古所謂以道事人斯之謂矣雖幹略見
稱終乃敗於驕寵惜矣

北史卷六十四

北史卷六十四考證

韋孝寬傳以功除浙陽郡守○浙南本作浙

是以往歲出車徒有勞費○徒監本訛彼今改從周書
遂使漳滏游魂更存餘晷○晷監本訛咎今改從周書
陳刺史吳文立○立周書作育

文立以數百騎襲孝寬營○周書文立作反潛此殆因
上文文立而訛也

夔傳敕有司日給河東酒一升○升周書作斗

其迹似有淺深其致理殆無等級○殆監本作如今改
從周書

柳蚪傳與豫州刺史裴叔業據州歸魏○叔監本訛諷
今改從南本

非所謂將順其美匡救其惡者○監本脫非字今從南
本增入

何止物生橫議亦自異端互起○起監本作趣今從南
本

檜傳檜字季華○季監本訛李今改從南本

十四年遷河州別駕○年監本訛州今改從南本

機從子審之傳帝使審之諭令出塞○塞監本訛審今
改從隋書

北史卷六十四考證

北史卷六十五

唐 李

延

壽

撰

列傳第五十三

達奚武

若干惠

怡峯

劉亮

王德

赫連達

韓果

蔡祐

常善

辛威

庫狄昌

梁椿

梁臺

田弘

子仁恭

孫德懋

達奚武字成興代人也祖眷父長竝爲鎮將武少儻
好馳射賀拔岳征關右引爲別將及岳爲侯莫陳悅所

害武與趙貴收屍歸平涼同翊戴周文帝從平悅封須昌縣伯大統初自大丞相府中兵參軍出爲東秦州刺史齊神武與竇泰高敖曹三道來侵周文欲并兵擊泰諸將多異議唯武及蘇綽與周文意同遂禽之周文進圖弘農遣武從兩騎覘候武與其候騎遇卽交戰斬六級獲三人而反齊神武趣沙苑周文復遣武覘之武從三騎皆衣敵人衣至暮下馬潛聽其軍號歷營若警夜者有不如法者往往撻之具知敵情以告周文遂從破之進爵高陽郡公四年周文援洛陽武爲前鋒與李弼破莫多婁貸文又進至河橋力戰斬其司徒高敖曹再

遷雍州刺史復從戰芒山時大軍不利齊神武乘勝進軍至陝武禦之乃退七年詔武經略漢川梁梁州刺史宜豐侯蕭脩固守南鄭武圍之脩請服會梁武陵王遣其將楊乾運等救脩脩更不下武擊走乾運脩乃降自劔門以北悉平明年振旅還京師朝議欲以武爲柱國武曰我作柱國不應在元子孝前固辭以大將軍出鎮玉壁周孝閔帝踐阼授柱國大司寇齊豫州刺史司馬消難舉州來附詔武與楊忠迎消難以歸武成初轉大宗伯進封鄭國公齊將斛律敦侵汾絳武禦之敦退武築栢壁城留開府權嚴薛羽生守之保定三年遷太保

其年大軍東伐隨公楊忠引突厥自北道武以三萬騎自東期會晉陽武至平陽後期不進而忠已還武尙未知齊將斛律明月遣武書曰鴻鶴已翔於寥廓羅者猶視於沮澤也武覽書乃班師出爲同州刺史明年從晉公護東伐時尉遲迥圍洛陽爲敵所敗武與齊王憲於芒山禦之至夜收軍憲欲待明更戰武曰洛陽軍散人情駭動不因夜速還明日欲歸不得憲從之遂全軍而返天和三年轉太傅武微時奢侈好華飾及居重位不持威儀行常單馬左右從一兩人而已門外不施戟恒晝掩一扉或謂曰公位冠羣后何輕率若是武曰吾昔

在布衣豈望富貴今日富貴不可頓忘曩昔且天下未
平國恩未報安可過事威容乎言者慙而退武之在同
州時旱武帝敕武祀華岳岳廟舊在山下常所祈禱武
謂僚屬曰吾備位三公不能燮理陰陽不可同於衆人
在常祀所必須登峯展誠尋其聖奧岳旣高峻人迹罕
通武年逾六十唯將數人攀藤而上於是稽首祈請晚
不得還卽於岳上藉草而宿夢一白衣來執武手曰快
辛苦甚相嘉尙武遂驚覺益用祇肅至旦雲霧四起俄
而澍雨遠近霑洽武帝聞之璽書勞武賜綵百匹武性
貪吝其爲大司寇也在庫有萬釘金帶當時寶之武因

入庫乃取以歸主者白晉公護護以武勲重不彰其過因而賜之時論深鄙焉襄贈大傅十五州諸軍事同州刺史諡曰桓子震嗣震字猛略少驍勇走及奔馬周文嘗於渭北校獵時有兔過周文前震與諸將競射之馬倒而墜震足不傾躓因步走射之一發中兔顧馬纔起遂回身騰上周文喜曰非此父不生此子乃賜震雜綵一百段後封魏昌縣公明帝初拜司右中大夫加驃騎大將軍開府儀同三司武成初進爵廣平郡公除華州刺史震雖出自膏腴少習武藝然頗有政術天和三年拜柱國建德初襲爵鄭國公從平鄴賜妾二人女樂一

部拜大宗伯震父嘗爲此職時論榮之宣政中出爲原州總管隋開皇初薨於家震弟恚大象末爲益州刺史與王謙據蜀起兵被誅

若干惠字惠保代武川人也其先與魏俱起以國爲姓父樹利周從魏廣陽王深征葛榮戰沒贈冀州刺史惠以別將從賀拔岳以功封北平縣男及岳爲侯莫陳悅所害惠與寇洛趙貴等同謀翊戴周文仍從平悅拜直閣將軍從禽竇泰復弘農破沙苑惠每先登陷陣加侍中開府儀同三司封長樂郡公大統四年從魏文帝東巡洛陽與齊神武戰於河橋力戰破之七年遷領軍及

高仲密舉北豫州來附周文迎之軍至洛陽齊神武屯於芒山惠爲右軍與中軍大破之齊神武兵乃萃左軍軍將趙貴等戰不利會日暮齊神武進兵攻惠惠擊皆披靡至夜中神武騎復來追惠惠徐下馬顧命厨人營食食訖謂左右曰長安死此中死異乎乃建旗鳴角收軍而還神武追騎憚惠疑有伏兵不敢逼至弘農見周文陳賊形勢恨其垂成之功虧於一篲歔歔不自勝周文壯之遷司空惠性剛質有勇力容貌魁岸善於撫御將士莫不懷恩及侯景內附朝議欲收輯河南令惠以本官鎮魯陽遇病薨於軍惠於諸將年最少早喪父事

母以孝聞周文嘗造射堂新成與諸將宴射惠竊歎曰
親老矣何時辦此周文聞之卽日徙堂於惠宅其見重
如此及薨爲流涕久之惠喪至又臨撫焉加贈秦州刺
史諡曰武烈子鳳嗣鳳字達摩有識度襲父爵長樂郡
公尙周文女位開府儀同三司大馭中大夫後錄惠佐
命功封鳳徐國公拜柱國

怡峯字景阜遼西人也本姓默台因避難改焉高祖寬
燕遼西郡守魏道武時歸朝拜羽真賜爵長蛇公曾祖
文冀州刺史峯少以驍勇聞從賀拔岳討万俟醜奴賜
爵蒲陰縣男岳被害峯與趙貴等同謀翊戴周文進爵

爲伯及齊神武與孝武帝構隙文帝令峯與都督趙貴
赴洛陽至潼關屬孝武西遷峯卽從周文帝拔迴洛復
潼關後以討曹泥功進爵華陽縣公又從破竇泰於小
關復弘農破沙苑進爵樂陵郡公仍與元季海獨孤信
復洛陽東魏行臺任祥率步騎萬餘攻潁川峯復以輕
騎五百邀擊大破之自是威名轉盛加授開府儀同三
司及周文與東魏戰河橋時峯爲右軍不利與李遠先
還周文遂班師詔原其罪拜夏州刺史大統十五年東
魏圍潁川峯與趙貴赴援至南陽病卒峯沈毅有膽略
得士卒心當時號驍將周文嗟悼者久之贈華州刺史

諡曰襄威子昂嗣位開府儀同三司朝廷追錄峯功封
昂長沙郡公昂弟光少以峯勲賜爵安平縣侯加開府
儀同三司光弟春少知名位吏部下大夫儀同三司
劉亮中山人也本名道德父特真位領人酋長魏大統
中以亮著勲追贈恒州刺史亮少倜儻有從橫計畧姿
貌魁傑見者憚之以都督從賀拔岳西征以功封廣興
縣子侯莫陳悅害岳亮與諸將謀迎周文及平悅後悅
黨幽州刺史孫定兒仍據州不下衆至數萬周文令亮
襲之定兒以義兵猶遠未爲之備亮乃輕將二十騎先
豎一燾於近城高嶺卽馳入城中定兒方置酒高會卒

見亮至衆皆駭愕亮乃麾兵斬定兒懸首州門號令賊黨仍遙指城外燾命二騎日出追大軍賊黨兇懼一時降服及周文置十二軍簡諸將領之亮領一軍每征討常與怡峯俱爲騎將以復潼關功封饒陽縣伯尋加侍中從禽寶泰復弘農戰沙苑竝力戰有功遷開府儀同三司大都督進爵長廣公以母憂去職居喪毀瘠周文嗟其至性每憂惜之起復本官亮以勇敢見知爲當時名將兼屢陳謀策多合機宜周文謂曰卿文武兼資卽孤之孔明也乃賜名亮并賜姓侯莫陳氏出爲東雍州刺史爲政清靜百姓安之卒於州喪還京周文親臨之

泣而謂人曰股肱喪矣腹心何寄令鴻臚卿監護喪事
追贈太尉諡曰襄後配饗周文廟廷子昶嗣昶尙周文
女西河長公主大象中位柱國秦靈二州總管以亮功
封彭國公隋開皇中坐事死昶弟靜天水郡守靜弟恭
開府儀同三司饒陽縣伯恭弟幹上儀同三司襄中侯
王德字天恩代武川人也少善騎射雖不經師訓以孝
悌稱初從尔朱榮討元顥賜爵同官縣子又從賀拔岳
討平万俟醜奴別封深澤縣男及侯莫陳悅害岳德與
寇洛等議翊戴周文於是除平涼郡守德雖不知書至
於斷決處分良無以過涇州所部五郡德常爲最及孝

武西遷進封下博縣伯行東雍州事在州未幾百姓懷之賜姓烏丸氏大統元年進爵爲公加車騎大將軍遷儀同三司北雍州刺史後常從周文征伐累有戰功開府侍中進爵河間郡公先是河渭間種羌屢叛以德有威名拜河州刺史羣羌率服後卒於涇州刺史諡曰獻德性厚重廉慎言行無擇母幾年百歲後德終子慶嗣小名公奴性謹厚位開府儀同三司初德喪父貧無以葬乃賣公奴并一女以營葬事因遭兵亂不復相知及德在平涼始得之遂名曰慶

赫連達字朔周盛樂人勃勃之後也曾祖庫多汗因避

難改姓杜氏達性剛鯁有膽力少從賀拔岳征討有功
賜爵長廣鄉男及岳爲侯莫陳悅所害趙貴建議迎周
文達贊成其議請輕騎告周文仍迎之諸將或欲南追
賀拔勝或云東告朝廷達又曰此皆遠水不救近火何
足道哉謀遂定令達馳往周文見達慟哭遂以數百騎
南赴平涼令達率騎據彈箏峽時百姓惶懼奔散者軍
爭欲掠之達止之乃撫以恩信人皆悅附周文聞而嘉
之加平東將軍周文謂諸將曰當清水公遇禍之日君
等性命懸於賊手杜朔周昌萬死之難遠來見及遂得
同雪讐耻勞而不酬何以勸善乃賜馬二百匹孝武入

關襄敘勲義以達首迎元帥匡復秦隴進爵魏昌縣伯
從儀同李偉破曹泥後復弘農戰沙苑皆有功詔復姓
赫連以達勲望兼隆乃除雲州刺史進爵爲公從大將
軍達奚武攻漢中梁宜豐侯蕭脩拒守積時後乃送款
開府賀蘭願德等以其食盡欲急攻取之達曰不戰而
獲城策之上也無容利其子女貪其財帛仁者不爲如
其困獸猶鬪則成敗未可知武遂受脩降師還遷驃騎
大將軍開府儀同三司加侍中進爵藍田縣公保定初
爲大將軍夏州總管達雖非文吏然性質直遵奉法度
輕於鞭撻而重慎死罪性又廉儉邊境胡人或饋達羊

達欲招異類報以繒帛主司請用官物達曰羊入我厨
物出官庫是欺上也命取私帛與之識者嘉其仁恕尋
進爵樂川郡公位柱國薨子遷嗣位大將軍蒲州刺史
韓果字阿六拔代武川人也少驍雄善騎射賀拔岳西
征引爲帳內擊万俟醜奴後從周文討平侯莫陳悅大
統初累進爵爲石城公果性强記兼有權略善伺敵虛
實揣知情狀有潛匿溪谷欲爲間偵者果登高望之所
疑處往必有獲周文由是以果爲虞候都督每從征行
常領候騎晝夜巡察略不眠寢從平竇恭於潼關周文
因其規畫軍以勝返賞眞珠金帶一條又從復弘農破

沙苑戰河橋竝有功歷朔安二州刺史從戰芒山軍還
除河東郡守又從大將軍破稽胡於北山胡地險阻人
迹罕至果進兵窮討散其種落稽胡憚果勁勇趨捷號
爲著趨人周文聞之笑曰著趨之名寧減飛將累遷開
府儀同三司進爵襄中郡公保定三年拜少師進位柱
國天和初授華州刺史爲政寬簡吏人稱之薨子明嗣
爲黎州刺史與尉遲迥同謀反被誅

蔡祐字承先其先陳留圉人也曾祖紹爲夏州鎮將徙
居高平因家焉父襲名著西州魏正光中万俟醜奴亂
關中襲乃背賊歸洛陽拜齊安郡守及孝武西遷始拔

難西歸賜爵平舒縣伯除岐雍二州刺史祐性聰敏有
行檢襲之背賊東歸祐年十四事母以孝聞及長有膂
力周文在原州召爲帳下親信及遷夏州以祐爲都督
侯莫陳悅害賀拔岳諸將迎周文周文將赴之夏州首
望彌姐元進等陰有異計周文微知之召元進等入計
事旣而目祐祐卽出外衣甲持刀直入叱元進而斬之
并其黨伏誅一坐皆戰慄於是與諸將盟同心誅悅周
文以此重之謂祐曰吾今以爾爲子爾其父事我後迎
孝武於潼關以前後功封葭鄉縣伯後從禽竇泰復引
農戰沙苑皆有功授平東將軍太中大夫又從戰河橋

祐下馬步鬪左右勸乘馬以備急卒祐怒之曰丞相養我如子今日豈以性命爲念遂率左右十餘人齊聲大呼殺傷甚多敵以其無繼圍之十餘重祐乃彎弓持滿四面拒之東魏人乃募厚甲長刀者直進取祐去祐可三十步左右勸射之祐曰吾曹性命在此一矢耳豈虛發哉敵人可十步祐乃射之中其面應弦而倒便以稍刺殺之敵乃稍却祐乃徐引退是戰也西軍不利周文已還祐至弘農夜與周文會周文字之曰承先爾來吾無憂矣周文驚不得寢枕祐股上乃安以功進爵爲公授京兆郡守高仲密舉北豫來附周文率軍援之與齊

神武遇於芒山祐時著明光鐵騎所向無敵齊人咸曰
此是鐵猛獸也皆避之歷青原二州刺史尋除大都督
遭父憂請終喪紀弗許累遷開府儀同三司加侍中賜
姓大利稽氏進爵懷寧郡公六官建授兵部中大夫周
文不豫祐與晉公護賀蘭祥等侍疾及周文崩祐悲慕
不已遂得氣疾周孝閔帝踐阼拜少保祐與尉遲綱俱
掌禁兵時帝信任司會李植等謀害晉公護祐每泣諫
帝不聽尋而帝廢明帝之爲公子也與祐特相友昵及
卽位禮遇彌隆加拜司馬御膳每有異味輒以賜祐羣
臣朝宴每被別留或至昏夜列炬鳴笳送祐還宅祐以

過蒙殊遇常辭疾避之至於婚姻尤不願結於權要尋以本官權鎮原州頃之授宣州刺史未之部卒於原州祐少與鄉人李穆布衣齊名常相謂曰大丈夫當建立功名以取富貴安能久處貧賤言訖各大哭後皆如言及從征伐爲士卒先軍還諸將爭功祐終無所競周文每歎之曰承先口不言勲孤當代其論敘性節儉所得祿秩皆散宗族身死之日家無餘財贈柱國大將軍原州都督諡曰莊子正嗣祐弟澤頗好學有幹能後爲邛州刺史以不從司馬消難被害

常善高陽人也家本豪族魏孝昌中從尔朱榮入洛封

房城縣男後周文平侯莫陳悅除天水郡守累遷驃騎大將軍開府儀同三司西安州刺史轉蔚州刺史頻泣二藩有政績進爵永陽郡公周孝閔帝踐阼拜大將軍寧州總管保定二年入爲小司徒卒贈柱國大將軍都督延州刺史子昂和嗣

辛威隴西人也少慷慨有志畧初從賀拔岳征伐有功假輔國將軍都督及周文統岳衆見威奇之引爲帳內封白土縣伯後進爵爲公累遷開府儀同三司賜姓普屯氏出爲鄜州刺史威時望旣重朝廷以桑梓榮之遷河州刺史本州大中正頻領二鎮頗得人和周孝閔帝

踐阼拜大將軍進爵抱罕郡公宣政元年進位上柱國
大象二年進封宿國公復爲少傅薨威性持重有威嚴
歷官數十年未嘗有過故得以身名終兼其家有義五
世同居時以此稱之子永達嗣位儀同大將軍

庫狄昌字恃德神武人也少便弓馬有膂力及長進止
閑雅膽氣壯烈每以將帥自許從尒朱天光定關中天
光敗又從賀拔岳征討及岳被害昌與諸將議翊戴周
文從平侯莫陳悅賜爵陰盤縣子後從迎孝武復潼關
改封長子縣子大統初累遷開府儀同三司進爵方城
郡公六官建授稍伯中大夫周孝閔帝踐阼拜大將軍

卒

梁椿字千年代人也初從尒朱榮入洛又從賀拔岳討平万俟醜奴仍從周文平侯莫陳悅大統中累以戰功封東平郡公位開府儀同三司周孝閔帝踐阼除華州刺史改封清陵郡公保定元年拜大將軍卒於位贈都督恒州刺史諡曰烈椿性果毅善於撫納所獲賞物分賜麾下故每踐敵場咸得其死力雅好儉素不營貲產時論以此稱焉子明以椿功賜爵豐陽縣公後襲椿爵舊封回授弟朗

梁臺字洛都葺池人也少果敢有志操從尒朱天光平

關隴賜爵隴城鄉男及天光敗於韓陵賀拔岳又引爲
心膂岳爲侯莫陳悅所害臺與諸將翊戴周文從平悅
累功授潁州刺史賜姓賀蘭氏累遷驃騎大將軍開府
儀同侍中周孝閔帝踐阼進爵中部縣公保定四年拜
大將軍時大軍圍洛陽久不拔齊騎奄至齊公憲禦之
有數人爲敵所執已去臺單馬突入射殺兩人敵皆披
靡被執者遂還齊公憲每歎曰梁臺果毅膽決不可及
也五年拜鄜州刺史臺性疎通恕以待物至於莅人尤
以惠愛爲心不過識千餘字口占書啟詞意可觀年過
六十猶能被甲跨馬足不躡鐙馳射弋獵矢不虛發後

以疾卒

田弘字廣路高平人也少慷慨有謀略初陷万俟醜奴
尔朱天光入關弘自原州稱順及周文統衆弘求謁見
乃論時事卽處以爪牙之任又以迎孝武功封鶉陰縣
子周文嘗以所著鐵甲賜弘云天下若定還將此甲示
孤也累功賜姓紇干氏授原州刺史以弘勲望兼至故
以衣錦榮之周文在同州文武竝集乃謂之曰人人如
弘盡心天下豈不早定卽授車騎大將軍儀同三司魏
廢帝元年加驃騎大將軍開府儀同三司平蜀後梁信
州刺史蕭韶等未從朝化詔弘討平之又討西平反羌

及鳳州叛氏等竝破之每臨陣摧鋒直前身被一百餘
箭破骨者九馬被十稍朝廷壯之周孝閔踐祚進爵鴈
門郡公保定元年出爲岷州刺史弘雖武將而動遵法
式百姓賴安之三年從隋公楊忠伐齊拜大將軍後進
柱國大將軍歷位大司空少保襄州總管薨于州子仁
恭嗣

仁恭字長貴性寬仁有局度歷位幽州總管隋文帝受
禪進上柱國拜太子太師甚見親重嘗幸其第宴飲極
歡禮賜甚厚尋奉詔營太廟進爵觀國公拜武衛大將
軍轉左武衛大將軍卒官贈司空諡曰敬子世師嗣

次子德懋少以孝友知名開皇初以父軍功賜爵平原郡公授太子千牛備身丁父艱哀毀骨立廬於墓側負土成墳帝聞而嘉之遣員外散騎侍郎元志就弔焉復降璽書存問賜帛及米下詔表其閭大業中位尙書駕部郎卒官時有玉城郡公王景鮮虞縣公謝慶恩竝位上柱國大義公辛遵及其弟韶竝位柱國隋文帝以其俱佐人命功臣特加崇貴親禮與仁恭等事皆亡失云

論曰周文接喪亂之際乘戰爭之餘發跡平涼撫征關右于時外虞孔熾內難方殷羽檄交馳戎軒屢駕終能蕩清逋孽克固鴻基雖稟算於廟堂實責成於將帥達

奚武若干惠怡峯劉亮王德赫連達韓果蔡祐常善辛
威庫狄昌梁椿梁臺田弘等竝兼資勇略咸會風雲或
效績中權或立功方面均分休戚同濟艱危可謂國之
爪牙朝之禦侮者也而武叶規文后得雋小關周瑜赤
壁之謀賈詡烏巢之策何以能尙一言興邦斯之謂矣
惠德本以果毅知名而能率由孝道雖圖史所歎何以
加焉勇者不必有仁斯不然矣以赫連達之先識而加
之以仁恕蔡祐之勇敢而終之以不伐斯豈企及之所
致乎抑亦天性而已仁恭出內榮顯豈徒然哉德懋道
協天經亦足嘉矣

北史卷六十五

北史卷六十五考證

達奚武傳獲三人而反○三監本作二今從南本

隨公楊忠引突厥自北道○隨一本作隋

鴻鶴已翔於寥廓○鶴一本作鵠

辛威傳進爵抱罕郡公○抱一本作袍

史臣論賈詡鳥巢之策○鳥三國志作烏

北史卷六十五考證

北史卷六十六

唐 李 延 壽 撰

列傳第五十四

王傑 王勇 宇文蚪

耿豪 高琳 李和 子徹

伊婁穆 達奚寔 劉雄

侯植 李延孫 韋祐

陳欣 魏立 泉叡

李遷哲 楊乾運 扶猛

陽雄 席固 任果

王傑金城直城人也本名文達父巢魏榆中鎮將傑少
有壯志每以功名自許從孝武西遷賜爵都昌縣子周
文奇其才嘗謂諸將曰王文達萬人敵也但恐勇決太
過耳從復潼關破沙苑爭河橋戰芒山皆以勇敢聞親
待日隆於是賜姓宇文氏進爵爲公累遷侍中驃騎大
將軍開府儀同三司恭帝元年從于謹圍江陵時柵內
有人善用長稍將士登者多爲所斃謹令傑射之應弦
而倒登者乃得入遂拔之謹曰濟我大事者在公此箭
也周孝閔帝踐阼進爵張掖郡公爲河州刺史朝廷以
傑勲望俱重故授以本州後與隋公楊忠自漢北伐齊

又從齊公憲東禦齊將斛律明月進位柱國建德初除涇州總管頗爲百姓所慕宣帝卽位拜上柱國薨贈七州諸軍事河州刺史追封鄂國公諡曰威子孝遷位開府儀同大將軍

王勇代武川人也本名胡仁少雄健有膽決數從侯莫陳悅賀拔岳征討功居多拜別將周文爲丞相封包信縣子從禽竇泰復弘農戰沙苑氣蓋衆軍所當必破周文歎其勇敢賞賜特隆進爵爲公大軍不利唯胡仁及王文達耿令貴三人力戰皆有殊功軍還拜上州刺史以雍州岐州北雍州擬授胡仁等然州頗有優劣文令

探籌取之胡仁遂得雍州文達得岐州令貴得北雍州
仍賜胡仁名勇令貴名豪文達名傑以彰其功進侍中
驃騎大將軍開府儀同三司恭帝元年從柱國趙貴征
蠕蠕破之進爵新陽郡公賜姓庫汗氏又論討蠕蠕功
別封永固縣伯時有別封者例聽廻授次子勇獨請封
兄子興時人義之尋進位大將軍勇性雄猛爲當時驍
將矜功伐善好論人之惡時論亦以此鄙之柱國侯莫
陳崇勲高望重與諸將同謁晉公護聞勇數論人短乃
於衆中折辱之勇慙恚因疽發背卒子昌嗣官至大將
軍

宇文蚪字樂仁代武川人也驍悍有膽畧少從征討累有戰功封南安侯孝武西遷以獨孤信爲行臺信引蚪爲帳內都督隨信奔梁大統三年歸闕進爵爲公禽竇泰復弘農及沙苑河橋之戰皆有功又從獨孤信討梁岌定破之累遷南秦州刺史驃騎大將軍開府儀同三司蚪每經行陣必身先士卒故上下同心戰無不尅後除金州刺史大將軍卒

耿豪鉅鹿人也本名令貴其先家於武川豪少麤獷有武藝好以氣陵人賀拔岳西征引爲帳內岳被害歸周文以武勇見知豪亦自謂所事得主從討侯莫陳悅及

迎孝武錄前後功封平原子沙苑之戰豪殺傷甚多血
染甲裳盡赤周文歎曰令貴武猛所向無前觀其甲裳
足以爲驗不須更論級數也進爵爲公從周文戰芒山
豪謂所部曰大丈夫除賊須右手拔刀左手把稍直斫
直刺慎莫畏死遂大呼獨入敵人鋒刃亂下當時咸謂
豪歿俄然奮刀而還戰數合當豪前者死傷相繼又謂
左右曰吾豈樂殺人但壯士除賊不得不尔若不能殺
賊又不爲人所傷何異逐坐人也周文嘉之拜北雍州
刺史賜姓和稽氏進位侍中驃騎大將軍開府儀同三
司豪性凶悍言多不遜周文惜其驍勇每優容之豪亦

自謂意氣冠羣終無所屈李穆蔡祐初與豪同職
後並居豪之右豪不能平謂周文曰人間物議謂豪勝
李穆蔡祐周文曰何以言之豪曰人言李穆蔡祐是丞
相龔驛耿豪王勇丞相咽項以在上故爲勝也豪之麤
猛皆此類卒周文痛惜之子雄嗣位至大將軍

高琳字季珉其先高麗人也仕於燕又歸魏賜姓羽真
氏琳母嘗被襖泗濱遇見一石光彩朗潤遂持以歸是
夜夢人衣冠有若仙者謂曰夫人向所將來石是浮磬
之精若能寶持必生令子母驚寤舉身流汗俄而有娠
及生因名琳字季珉從孝武西遷封鉅野縣子河橋之

役琳勇冠諸軍周文謂曰公卽我之韓白也復從戰芒
山除正平郡守齊將東方老來寇琳擊之老中數創乃
退謂其左右曰吾經陣多矣未見如此健兒後除鄜州
刺史加驃騎大將軍開府儀同三司侍中周孝閔帝踐
阼進爵捷爲郡公武成二年討平文州氏師還帝宴郡
公卿士仍賦詩言志琳詩末章云寄言寶車騎爲謝霍
將軍何以報天子沙漠靜秋氛帝大悅曰獯獫陸梁未
時款塞卿言有驗國之福也天和三年爲江陵副總管
時陳將吳明徹來寇總管田弘與梁主蕭巋出保紀南
城唯琳與梁僕射王操固守江陵三城以抗之晝夜拒

戰凡經十旬明徹退走歸表言其狀帝乃優詔追琳入朝親加勞問六年進位柱國薨贈本官加五州諸軍事冀州刺史諡曰襄子儒襲爵位儀同大將軍

李和本名慶和朔方嚴綠人也父僧養以累世雄豪爲夏州酋和少敢勇有識度狀貌魁偉爲州里所推賀拔岳作鎮關中引爲帳內都督後從周文累遷侍中驃騎大將軍開府儀同三司夏州刺史賜姓宇文氏周文嘗謂諸將曰宇文慶和累經任委每稱吾意又賜名意焉改封永豐縣公保定二年除司憲中大夫尋改封德廣郡公出爲洛州刺史和前在夏州頗留遺惠及有此授

商洛父老莫不想望德音和至州以仁恕訓物獄訟爲之簡靜進柱國大將軍隋開皇元年遷上柱國和立身剛簡老而逾勵諸子趨事若奉嚴君以意是周文帝賜名帝朝已革慶和則父之所命義不可違至是遂以和爲名二年薨贈本官加司徒公諡曰肅子徹嗣

徹字廣達性剛毅有器幹周武帝時從皇太子西征吐谷渾以功賜爵周昌縣男從武帝平齊錄前後功再進爵遷左武衛將軍及隨晉王廣鎮并州妙選府官詔徹總晉王府軍事進爵齊安郡公時蜀王秀亦鎮益州上謂侍臣曰安得文同王子相武如李廣達者乎其見重

如此明年突厥沙鉢略可汗犯塞上令衛王爽爲元帥擊之以徹爲長史遇虜於白道行軍總管李充請襲之諸將多以爲疑唯徹獎成其事請同行遂掩擊大破之沙鉢略棄所服金甲而遁以功加上大將軍沙鉢略因此稱藩改封安道郡公開皇十年進位柱國及晉王爲揚州總管以徹爲司馬改封德廣郡公尋徙封城陽郡公其後突厥犯塞徹復領行軍總管破之及左僕射高潁得罪以徹素與潁善被踈忌後出怨言上聞召入臥內賜宴言及平生因遇鳩卒大業中其妻元氏爲孽子安遠誣以呪詛伏誅

伊婁穆字奴干代人也父靈善騎射爲周文所知嘗謂之曰若伊尹阿衡於殷致主堯舜卿旣姓伊庶卿不替前緒於是賜名尹焉歷衛將軍隆州刺史盧奴縣公穆弱冠爲周文帳內親信以機辯見知歷中書舍人通直散騎常侍嘗入白事周文望見悅之字之曰奴干作儀同面見我矣於是拜儀同三司賜封安陽縣伯周孝閔帝踐阼進位驃騎大將軍建德中卒

達奚寔字什伏代河南洛陽人也父顯相武衛將軍寔少修立有幹局從魏孝武西遷封臨汾縣伯從周文禽竇泰復弘農破沙苑皆力戰有功累遷相府從事中郎

寔性嚴重深見器遇六官建行蕃部中大夫加驃騎大將軍開府儀同三司進爵平陽縣公周保定初卒於刺史諡曰恭子豐嗣

劉雄字猛雀臨洮子城人也少機辯慷慨有大志初爲周文親信後拜中大夫兼中書舍人賜姓宇文氏周孝閔帝踐阼加大都督天和中累遷驃騎大將軍開府儀同三司封周昌侯歷位納言內史中大夫候正武帝嘗從容謂曰古人云富貴不歸故鄉猶衣錦夜遊乃以雄爲河州刺史雄先已爲本縣令復有此授鄉里榮之及皇太子西征吐谷渾雄自涼州從滕王道先入功居多

加上開府儀同三司從平并州拜上大將軍進爵趙郡
公平鄴城進柱國宣政元年突厥寇幽州雄戰歿贈毫
州總管子昇嗣以雄死王事授儀同大將軍

侯植字仁幹其先上谷人也高祖恕爲北地太守子孫
因家于北地之三水植少倜儻有大節容貌奇偉武藝
絕倫仕魏爲義州刺史甚有政績後從孝武西遷賜姓
侯伏氏從周文破沙苑戰河橋進大都督涼州刺史文
仲和據州作逆植從開府獨孤信討禽之封肥城縣公
賜姓賀屯氏後從于謹平江陵進驃騎大將軍開府儀
同三司別封一子汧源縣伯周孝閔帝踐祚進爵郡公

時帝幼冲晉公護執政植從兄龍恩爲護所親及護誅趙貴諸宿將等多不自安植謂從兄龍恩曰主上春秋既富安危繫於數公若多誅戮自立威權何止社稷有累卵之危恐吾宗亦緣此敗兄安得知而不言龍恩竟不能用植又承間言於護曰公以骨肉之親當社稷之寄願推誠王室擬迹伊周則率土幸甚護曰我誓以身報國卿豈謂吾有他志邪又聞其先與龍恩言乃陰忌之植懼不免禍遂以憂卒贈大將軍平州刺史諡曰節子定嗣及護伏誅龍恩及其弟萬壽竝預其禍武帝以植忠於朝廷特免其子孫

李延孫伊川人也父長壽性雄豪少與蠻酋結託侵掠關南魏孝昌中朝議恐其爲亂乃以長壽爲防蠻都督給其鼓節長壽盡其智力防遏羣蠻伊川左右寇盜爲之稍息永安之後長壽徒侶日盛魏帝藉其力用因而撫之累遷北華州刺史賜爵清河郡公及孝武西遷長壽率勵義士拒東魏後爲黃州刺史東魏遣行臺侯景攻之城陷遇害追贈太尉延孫亦雄武有將率才畧少從長壽征討以勇敢聞賀拔勝爲荊州刺史表延孫爲都督肅清鷓路頗有力焉及長壽被害延孫乃還收集其父之衆自孝武西遷後朝士流亡廣陵王欣錄尙書

長孫承業潁川王斌之安昌王子均及建寧江夏隴東諸王并百官等攜持妻子來投延孫者卽率衆衛送并贈以珍玩咸達關中齊神武深患之遣行臺慕容紹宗等數道攻擊延孫大破之乃授延孫京南行臺節度河南諸軍事廣州刺史尋進車騎大將軍儀同三司大都督賜爵華山郡公延孫旣蒙重委每以克清伊洛爲已任頻以寡擊衆威振敵境大統四年爲其長史楊伯蘭所害贈司空子人傑有祖父風官至開府儀同三司改封潁川郡公

韋祐字法保京兆山北人也以字行爲州郡著姓父義

上洛郡守魏大統中以法保著勲追贈秦州刺史法保少好遊俠而質直少言所與交遊皆輕猾亡命父沒事母以孝聞慕李長壽之爲人遂娶其女因寓居闕南正光末王公避難者或依之多得全濟以此爲貴遊所德及孝武西遷法保赴行在所封固安縣男及長壽被害其子延孫收長壽餘衆守禦東境朝廷恐延孫兵少乃除法保東洛州刺史配兵數百以授延孫法保至潼關弘農郡守韋孝寬謂曰恐子此役難以吉還法保曰古人稱不入獸穴不得獸子安危之事未可預量遂倍道兼行與延孫兵接乃并勢置柵於伏流未幾周文追法

保與延孫還朝賞勞甚厚除河南尹及延孫被害
乃率所部據延孫舊柵嘗與東魏戰流矢中頸從口中
出久之乃蘇大統九年鎮九曲城及侯景以豫州附法
保率兵赴景欲留之法保疑其貳乃固辭還所鎮十五
年加驃騎大將軍開府儀同三司尋進爵爲公會東魏
遣軍送糧饋宜陽法保潛邀之中流矢卒於陣諡曰莊
子初嗣位開府儀同大將軍閭韓防主

陳欣字永怡宜陽人也少驍勇有氣俠姿貌魁岸同類
咸敬憚之孝武西遷後欣乃於辟惡山招集勇敢少年
寇掠東魏仍密遣使歸附授立義大都督賜爵霸城縣

男累遷宜陽郡守恭帝二年進位驃騎大將軍開府儀同三司加侍中宜陽邑大中正賜姓尉遲氏周文以欣著績累載贈其祖昆及父興孫俱爲儀同三司位刺史東魏洛州刺史獨孤永業號有智謀往來境上欣與韓雄等恒令間諜覘其動靜齊兵每至輒破之故永業深憚欣等不敢爲寇周孝閔帝踐阼進爵許昌縣公後除熊州刺史卒於州欣與韓雄里閭姻婭少相親昵俱總兵境上三十餘載每禦扞二人相赴常若影響故數對勅敵而常保功名雖竝有武力至於挽疆射中欣不如雄散財施惠得士衆心則雄不如欣身死之日將吏荷

其恩德莫不感慟子萬敵嗣朝廷以欣雅得士心還令萬敵領其部曲

魏玄字僧智其先任城人也後徙於新安玄少慷慨有膽畧孝武西遷東魏北徙人情各懷去就玄每率鄉兵抗拒東魏芒山之役大軍不利宜陽洛州皆爲東魏守而玄母及弟竝在宜陽玄以爲忠孝不兩立乃率義徒還闕南鎮撫周文手書勞之除洛陽令封廣宗縣子周保定元年累遷驃騎大將軍開府儀同三司鎮閩韓遷熊州刺史政存簡惠百姓悅之轉和州刺史伏流防主進爵爲公及齊將斛律明月率衆向宜陽兵威甚盛玄

率衆禦之每戰輒克後以疾卒於位

泉叡字思道上洛豐陽人也世雄商洛自晉東度常貢屬江東曾祖景言魏大延五年率鄉里歸化仍引王師平商洛拜建節將軍假宜陽郡守世襲本縣令封丹水侯父安志復爲建節將軍宜陽郡守領本縣令降爵爲伯叡九歲喪父哀毀類於成人服闋襲爵年十二鄉人皇平陳合等三百餘人詣州請叡爲縣令州爲申上時吏部尙書郭旼以叡年少請別選遣終此一限令叡代之宣武詔依皇平等所請巴俗事道尤重老子之術叡雖童幼而好學恬靜百姓安之尋以母憂去職縣中父

老復表請起復本任後除上洛郡守及蕭寶寅反遣兵
趣青泥圖取上洛豪族泉杜二姓密應之忞與刺史董
紹掩襲二姓散走寶寅亦退遷浙州刺史別封涇陽縣
伯永安中大破梁將王立真於順陽除東雍州刺史進
爵爲侯部人楊羊皮太保椿之從弟恃椿侵擾百姓守
宰多被其陵侮皆畏而不敢言忞收之將加極法楊氏
慙懼闔宗請恩自此豪右無敢犯者性又清約纖毫不
擾於人在州五年每於鄉里運米自給梁魏興郡與洛
州接壤表請內屬詔忞爲行臺尙書以撫納之大行臺
賀拔岳以忞昔莅東雍爲吏人所懷乃表忞復爲刺史

詔許之蜀人張國雋聚黨剽劫州郡不能制劾捕戮之
闔境清肅及齊神武專政孝武有西顧之心欲委劾以
山南之事乃除洛州刺史未幾帝西遷齊神武率衆至
潼關劾遣其子元禮禦之神武不敢進上洛人都督泉
岳其弟猛畧與順陽人杜窰等謀翻洛州以應東魏劬
知之殺岳及猛畧傳首詣闕大統元年加開府儀同三
司兼尙書右僕射進爵上洛郡公劬志尙廉慎每除一
官憂見顏色寢食輒減至是頻讓魏帝手詔不許三年
高敖曹圍逼州城杜窰爲其鄉導劬拒守旬餘矢盡援
絕城乃陷焉謂敖曹曰泉劬力屈志不服也及竇泰被

禽敖曹退走遂執亾而東以窟爲刺史亾臨發密戒二子元禮仲遵曰吾生平志願不過令長幸逢聖會位亞台司今爵祿旣隆年齒又暮前途夷險抑亦可知汝等堪立功効不得以我在東遂虧臣節也乃揮涕而訣聞者莫不憤歎尋卒於鄴元禮少有志氣好弓馬頗閑草隸有士君子之風賜爵臨洮縣伯散騎常侍及洛州陷與亾俱被執而東元禮於路逃歸時杜窟雖爲刺史然巴人素輕杜而重泉及元禮至與仲遵相見感父臨別之言潛與豪右結託遂率鄉人襲州城斬窟傳首長安朝廷嘉之代襲洛州刺史從周文戰於沙苑中流矢卒

子貞嗣仲遵一名恭少謹實涉獵經史年十三爲郡主簿十四爲縣令及長有武藝高敖曹攻洛州與忞力戰拒守矢盡以捧杖扞之爲流矢中目不堪復戰及城陷士卒歎曰若二郎不傷豈至於此忞之東也仲遵以被傷不行後與元禮斬窟以功封豐陽縣伯東豫州刺史及元禮戰沒復以仲遵爲洛州刺史頗得譽大統十三年行荊州刺史事梁司州刺史柳仲禮每爲邊寇周文令仲遵率鄉兵從開府楊忠討之梁隨郡守桓和拒守不降忠謂諸將曰先取仲禮則桓和不攻而自服也仲遵對曰若棄和深入仲禮未卽就禽則首尾受敵此危

道也忠從之仲遵以計由已出乃先登城遂禽和從擊仲禮又獲之進驃騎大將軍開府儀同三司本州大中正復行荊州刺史十三州諸軍事尋遭母憂請終喪制不許大將軍王雄南征上津魏興仲遵從雄討平之遂於上津置南洛州以仲遵爲刺史仲遵留情撫接百姓安之初蠻帥杜青和自稱巴州刺史以州入附朝廷因其所據而授之仍隸東梁州都督青和以仲遵善於撫御請隸仲遵朝議以山川非便弗之許也青和遂結安康酋帥黃衆寶等舉兵共圍東梁州復遣王雄討平之改巴州爲洵州隸於仲遵先是東梁州刺史劉孟良在

職貪婪人多背叛仲遵以廉簡處之羣蠻帥服仲遵雖出自巴夷而有方雅之操歷官之處皆以清白見稱朝廷又以其父臨危抗節乃令襲爵上洛郡公舊封聽廻授一子尋出爲都督金州刺史卒官贈大將軍三州刺史諡曰莊子暄嗣位至開府儀同大將軍

李遷哲字孝彥安康人也世爲山南豪族仕於江左父元直仕梁歷東梁衡二州刺史散騎常侍沌陽侯遷哲少修立有識度慷慨善謀畫起家文德主師其父爲衡州留遷哲本鄉監統部曲事時年二十撫馭羣下甚得其情後襲爵沌陽侯位都督東梁州刺史侯景篡逆遷

哲外禦邊寇自守而已大統十七年周文遣達奚武王
雄等畧地山南遷哲軍敗遂降於武然猶意氣自若武
乃執送京師周文責以不早歸國荅曰不能死節實以
此愧耳周文深嘉之封沌陽縣伯恭帝初直州人樂熾
洋州人黃國等連結爲亂周文以遷哲信著山南乃令
與開府賀若敦同經畧熾等尋竝平蕩仍與敦南出徇
地遷哲先至巴州入其封郭梁巴州刺史牟安人開門
請降安人子宗徹等猶據巴城不下遷哲攻尅之軍次
鹿城城主遣使請降遷哲謂其衆曰納降如受敵吾觀
其使瞻視猶高得無詐也遂不許之梁人果於道左設

伏以邀遷哲遷哲進擊破之遂屠其城自此巴濮之人
降欵相繼軍還周文賜以所服紫袍玉帶及所乘馬加
授侍中驃騎大將軍開府儀同三司除直州刺史卽本
州也仍給軍儀鼓節令與田弘同討信州時信州爲蠻
酋向五子王等所圍弘遣遷哲赴援比至信州已陷五
子王等聞遷哲至狼狽遁走遷哲入據白帝賀若敦等
復至遂共追五子王等破之及田弘旋軍周文令遷哲
留鎮白帝信州先無倉儲軍糧匱乏遷哲乃收葛根造
粉兼米以給之遷哲亦自取供食時有異膳卽分賜兵
士有疾患者又親加醫藥以此軍中感之人思効命黔

陽蠻田烏度田烏唐等每抄掠江中爲百姓患遷哲隨
機出討殺獲甚多由是諸蠻畏威各送糧餼又遣子弟
入質者千有餘家遷哲乃於白帝城外築城以處之并
置四鎮以靜峽路自此寇抄頗息軍糧贍給焉周明帝
初授都督信州刺史二年進爵西城縣公武成元年朝
于京師明帝甚禮之賜甲第及莊田等天和三年進位
大將軍詔遷哲率金上等諸州兵鎮襄陽五年陳將章
昭達攻逼江陵梁明帝告急於襄州衛公直令遷哲往
救焉遷哲率其所部守江陵外城自率騎出南門又令
步兵自北門出兩軍首尾邀之陳人多投水死是夜陳

人又竊於城西堞以梯登城登者已百數人遷哲又率
驍勇扞之陳人復潰俄而大風暴起遷哲乘闇出兵擊
其營陳人大亂殺傷甚衆江陵總管陸騰復破之於西
隄陳人乃遁建德二年進爵安康郡公三年卒於襄州
贈金州總管諡曰壯武遷哲累葉雄豪爲鄉里所服性
復華侈能厚自奉養妾媵至有百數男女六十九人緣
漢千餘里間第宅相次姬媵之有子者分處其中各有
僮僕侍婢閹人守獲遷哲每鳴笳導從往來其間縱酒
歡醺盡生平之樂子孫參見或忘其年名者披簿以審
之長子敬仁先遷哲卒第六子敬猷嗣還統父兵位儀

同大將軍遷哲弟顯位上儀同大將軍

楊乾運字玄逸儻城興勢人也少雄武爲鄉閭信服爲
安康郡守陷梁仕歷潼南梁二州刺史及武陵王蕭紀
稱尊號以乾運威服巴渝乃拜梁州刺史鎮潼州封萬
春縣公時紀與其兄湘東王繹爭帝乾運兄子畧勸乾
運歸附乾運然之會周文令乾運孫法洛至畧卽夜送
之乾運送款周文密賜乾運鐵券授開府儀同三司侍
中梁州刺史安康郡公及尉遲迥征蜀遂降迥迥因此
進軍成都數旬尅之及至京師禮遇隆渥尋卒於長安
贈尙書右僕射子端嗣畧亦以歸附功位至開府儀同

三司大將軍封上庸縣伯乾運女壻樂廣安州刺史封
安康縣公

扶猛字宗畧上甲黃土人也其種落號白獸蠻猛仕梁
位南洛北司二州刺史封宕渠縣男魏廢帝元年以衆
降周文厚加撫納復爵宕渠縣男割二郡爲羅州以猛
爲刺史令從開府賀若敦南討信州敦令猛直道白帝
所由之路人迹不通猛乃梯山捫葛備歷艱阻遂入白
帝城撫慰人夷莫不悅附以功進開府儀同三司俄而
信州蠻反猛復從賀若敦平之進爵臨江縣公後從田
弘破漢南諸蠻進位大將軍卒

陽雄字元畧上洛邑陽人也累葉豪族父猛從孝武西遷以功封邵陽伯位征東將軍揚州刺史雄起家奉朝請以軍功封安平縣侯得子孫相襲拜邑陽郡守累遷平州刺史進爵王城縣公加開府儀同三司驃騎大將軍歷京兆戶部中大夫進位大將軍轉中外府長史遷江陵總管改封魯陽縣公卒於鎮追封郡公諡曰懷雄善附會能自謀身故任兼出內保全爵祿子長寬嗣席固字子堅其先安定人也高祖衡因姚氏之亂寓居襄陽仕晉爲建威將軍遂爲襄陽著姓固少有遠志梁大同中爲齊興郡守久居郡職士多附之遂有親兵千

餘人梁元帝時遷興州刺史軍人募從者至五千餘人固欲自據一州以觀時變大統中以地歸魏時周文方南取江陵西定蜀漢聞固至甚禮遇之就拜使持節驃騎大將軍開府儀同三司大都督侍中豐州刺史封新豐縣公後轉湖州刺史啓求入覲及至進爵靜安郡公尋拜昌歸憲三州諸軍事昌州刺史固居家孝友莅官頗有聲績卒於州贈大將軍五州刺史諡曰肅敕襄州賜其墓田子雅嗣雅字彥文性方正少以孝聞位大將軍雅弟英上開府儀同大將軍

任果字靜鸞南安人也本方隅豪族父襄仕梁爲沙州

刺史新巴縣公果性勇決志在立功魏廢帝元年率所部來附周文嘉其遠至待以優禮果因面陳取蜀策深被納之乃授沙州刺史南安縣公從尉遲迴伐蜀尋進授驃騎大將軍開府儀同三司及成都平除始州刺史周文以其方隅首領早立忠節進爵樂安郡公賜以鐵券聽相傳襲并賜路車駟馬及儀衛等以光寵之尋爲刺客所害

論曰王傑王勇宇文蚪耿豪高琳李和伊婁穆侯植等咸以果毅之姿効節擾攘之際各能屠堅覆銳自致其功高爵厚位固其宜也仲尼稱無求備於一人信矣夫

文士懷溫恭之操其弊也懦弱武夫稟剛烈之資其弊也敢悍故有使酒不遜之禍拔劍爭功之尤大則莫全其生小則僅而獲免耿豪王勇不其然乎李延孫韋祐陳欣魏玄等以勇畧之姿受扞城之委灌瓜贈藥雖有愧於昔賢禦侮折衝足方駕於前烈用能觀兵伊洛保據嶠函齊人阻西路之謀周朝緩東貢之慮皆其力也泉岌長自山谷素無月旦之譽而臨難慷慨無失人臣之節豈非蹈仁義之徒歟元禮仲遵聿遵其志卒成功業庶乎克負荷矣李遷哲楊乾運席固之徒屬方隅擾攘咸知委質遂享爵位以保終始觀遷哲之對周文有

尚義之氣乾運受任武陵乖事人之道若乃校其優劣
固不可同年而語陽雄任兼文武聲著土內抑亦志能
之士也舊史有代人字文盛字保興以武毅顯盛弟丘
字胡奴盛子述位柱國竝有傳然事無足可紀盛見子
述傳首丘畧之云

北史卷六十六

北史卷六十六考證

宇文虯傳又從獨孤信討梁岌定破之○岌監本訛岌
今改正

劉雄傳雄自涼州從滕王道先入○道一本作道
贈亳州總管○亳監本誤毫今改正

李延孫傳少從長壽征討○征監本訛延今改從南本
魏玄傳乃率義徒還闕南鎮撫○闕一本作闕

泉岌傳領本縣令○本一本作大

李遷哲傳起家文德主師○師一本作帥

各有僮僕侍婢閭人守獲○獲南本作護

北史卷六十六考證

北史卷六十七

唐

李

延

壽

撰

列傳第五十五

崔彥穆

楊纂

段永

令狐整

子熙

唐永

子瑾

柳敏

子昂

王士良

崔彥穆字彥穆清河東武城人魏司空安陽侯林之九世孫也曾祖顓後魏平東府諮議參軍祖蔚遭從兄司徒浩之難南奔江左仕宋爲給事黃門侍郎汝南義陽二郡守延興初復歸於魏拜潁川郡守因家焉後終於郢州刺史父幼位終永昌郡守隋開皇初以獻皇后外

曾祖追贈上開府儀同三司新州刺史彥穆幼明悟神彩卓然魏吏部尚書隴西李神雋有知人之鑒見而歎曰王佐才也永安末除司徒府參軍事再遷大司馬從事中郎孝武西遷彥穆時不得從大統三年乃與兄彥珍於成臯舉義因攻拔滎陽禽東魏郡守蘇淑仍與鄉郡王元法威攻潁川斬其刺史李景道卽拜滎陽郡守尋賜爵千乘縣侯十四年授散騎常侍司農卿時軍國草創衆務殷繁周文乃引彥穆入幕府兼掌文翰及于謹伐江陵彥穆以本官從平之周明帝初進驃騎大將軍開府儀同三司俄拜安州刺史總管十二州諸軍事

入爲御正大夫陳氏請敦隣好詔彥穆使焉彥穆風韻
閑曠器度方雅善立言解談諳甚爲江表所稱轉戶部
中大夫進爵爲公天和三年聘齊還除金州刺史總管
七州諸軍事進位大將軍尋徵拜小司徒及宣帝崩隋
文帝輔政三方起兵以彥穆爲行軍總管與襄州總管
王誼討司馬消難軍次荊州總管獨孤永業有異志遂
收而戮之及事平隋文帝徵王誼入朝卽以彥穆爲襄
州刺史總管六州諸軍事加授上大將軍進爵東郡公
頃之永業家自理得雪彥穆坐除名尋復官爵開皇元
年卒子君綽嗣君綽性夷簡博覽經史有父風大象末

丞相府賓曹參軍君綽弟君肅解巾道王侍讀大象末
潁川郡守

楊纂廣寧人也父安仁魏朔州鎮將纂少慷慨有志氣
勇力兼人年二十從齊神武起兵於信都軍功稍遷武
州刺史自以賞薄志懷怨憤每歎曰大丈夫富貴何必
故鄉若以妻子經懷豈不沮人雄志大統初乃間行入
關周文執纂手曰人所貴者忠義也所懼者危亾也其
能不憚危亾蹈茲忠義者今方見之於卿耳卽授征南
將軍大都督封永興縣侯從周文解洛陽圍經河橋亾
山之戰纂每先登軍中咸推其敢勇累遷驃騎大將軍

開府儀同三司加侍中進爵爲公賜姓莫胡盧氏俄授岐州刺史周孝閔帝踐阼進爵宋熙郡公保定元年位大將軍改封隴東郡公除隴州刺史從隋公楊忠東伐至并州而還天和六年進授柱國大將軍轉華州刺史纂性質樸又不識文字前後莅職但推誠信而已吏人以其忠恕頗亦懷之尋卒於州子睿位至上柱國漁陽郡公

段永字永賓其先遼西石城人晉幽州刺史匹磾之後也曾祖悞仕魏黃龍鎮將因從高陸之河陽焉永幼有志操閭里稱之魏正光末北鎮擾亂遂攜老幼避地中

山後赴洛陽拜平東將軍封沃陽縣伯青州人崔社客
舉兵反永討平之進爵爲侯除左光祿大夫時有賊魁
元伯生西自嶺潼東至鞏洛屠陷城壁所在爲患孝武
遺京畿大都督疋婁昭討之昭請以五千人行永進曰
此賊旣無城柵唯以寇抄爲資取之在速不在衆也若
星馳電發出其不虞精騎五百足矣帝然其計於是命
永代昭以五百騎倍道兼進遂破平之及帝西遷永時
不及從大統初乃結宗人潛謀歸欵密與都督趙業等
襲斬西中郎將慕容顯和傳首京師以功別封昌平縣
子徐州刺史從禽寶泰復弘農破沙苑並有戰功進爵

爲公河橋之役永力戰先登授南汾州刺史累遷驃騎
大將軍開府儀同三司賜姓爾綿氏廢帝元年授恒州
刺史于時朝貴多其部人謁永之日冠蓋盈路當時榮
之周孝閔帝踐阼進爵廣城郡公歷支瓜二州刺史戶
部中大夫保定四年拜大將軍永歷任內外所在頗有
聲稱輕財好士朝野以此重焉天和四年授小司寇尋
爲右二軍總管率兵北道講武遇疾卒於賀葛城喪還
武帝親臨贈使持節柱國大將軍同華等五州刺史諡
曰基子岌嗣位至儀同三司兵部下大夫

令狐整字延保敦煌人也本名延世爲西土冠冕曾祖

嗣祖紹安官至郡守咸爲良二千石父蚪早以名德著
聞仕歷瓜州司馬敦煌郡守郢州刺史封長城縣子魏
大統未卒於家周文帝傷悼之遣使者監護喪事又敕
鄉人爲營墳壟贈龍驤將軍瓜州刺史整幼聰敏沉深
有識量學藝騎射並爲河右所推刺史魏東陽王元榮
辟整爲主簿加盪寇將軍整進趨詳雅對揚辯暢謁見
之際州府傾目榮器整德望嘗謂僚屬曰令狐延保西
州令望方成重器豈州郡之職所可繫維但一日千里
必基武步寡人當委以庶務畫諾而已頃之孝武西遷
河右擾亂榮仗整防扞州境獲寧及鄧彥竊據瓜州拒

不受代整與開府張穆等密應使者申徽執彥送京師
周文嘉其忠節表爲都督尋而城人張保又殺刺史成
慶與涼州刺史宇文仲和構逆規據河西晉昌人呂興
等復害郡守郭肆以郡應保初保等將圖爲亂慮整守
義不從旣殺成慶因欲及整然人之望復恐其下叛之
遂不敢害雖外加禮敬內甚忌整整亦僞若親附而密
欲圖之陰令所親說保曰君與仲和結爲唇齒今東軍
漸逼涼州彼勢孤危恐不能敵若或摧衄則禍及此土
宜分遣銳師星言救援二州合勢則東軍可圖然後保
境息人計之上者保然之而未知所任整又令說保曰

歷觀成敗在於任使所擇不善旋致傾危令狐延保兼資文武才堪統御若使爲將蔑不濟矣保納其計且以整父兄等並在城中弗之疑也遂令整至玉門郡召集豪傑說保罪逆馳還襲之先定晉昌斬呂興進軍擊保州人素服整威名並棄保來附保遂奔吐谷渾衆議推整爲刺史整曰本以張保肆逆殺害無辜闔州之人俱陷不義今者同心務在除凶若其相推薦復恐效尤致禍於是乃推波斯使主張道義行州事具以狀聞詔以申徽爲刺史徵整赴闕授壽昌郡守封襄武縣男周文謂整曰卿早建殊勲今官位未足酬賞方當與卿共平

天下同取富貴遂立爲瓜州義首整以國難未寧常願
舉宗効力遂率鄉親二千餘人入朝隨軍征討整善於
撫馭躬同豐約是以士衆並忘羈旅盡其力用周文嘗
從容謂整曰卿遠祖立忠而來可謂積善餘慶世濟其
美者也整遠祖漢建威將軍邁不爲王莽屈其子稱避
地河右故周文稱之云累遷驃騎大將軍開府儀同三
司加侍中周文又謂整曰卿勲同婁項義等骨肉立身
敦雅可以範人遂賜姓宇文氏并賜名整焉宗人二百
餘戶並列屬籍周孝閔帝踐阼拜司憲中大夫處法平
允爲當時所稱進爵彭城縣公初梁興州刺史席固以

州來附周文以固爲豐州刺史固莅職旣久猶習梁法
凡所施爲多虧政典朝議密欲代之而難其選令整權
鎮豐州委以代固之畧整廣布威恩傾身撫接數月之
間化洽州府於是除整豐州刺史以固爲湖州豐州舊
不居民中賦役參集勞逸不均整請移居武當詔可其
奏獎勵撫導遷者如歸旬月之間城府周備固之遷也
其部曲多願留爲整左右整諭以朝制弗之許焉莫不
流涕而去及整秩滿代至人吏戀之老幼送整遠近畢
集數日停留方得出界其得人心如此拜御正中大夫
出爲中華郡守轉同州司會遷始州刺史整雅識情僞

尤明政術恭謹廉慎常懼盈滿故歷居內外所在見稱
進位大將軍晉公護之初執政也欲委整以腹心整辭
不敢當頗忤其意護以此疎之及護誅附會者咸伏法
而整獨保全時人稱其先覺卒贈本官加四州諸軍事
鄜州刺史諡曰襄子熙嗣

熙字長熙性嚴重有雅量雖在私室終日儼然不妄通
賓客凡所交結必一時名士博覽羣書尤明三禮善騎
射頗知音律起家以通經爲吏部上士轉夏官府都上
士俱有能名以母憂去職殆不勝哀其父戒之曰大孝
在於安親義不絕嗣吾今見存汝又隻立何得過爾毀

頓貽吾憂也熙自是稍加饘粥服闋除少駕部復丁父
憂非杖不起人有聞其哭聲莫不爲之下泣河陰之役
詔令墨衰從事授職方下大夫襲彭城縣公及武帝平
齊以留守功進位儀同歷司勳吏部二曹中大夫甚有
當時譽隋文帝受禪之際熙以本官行納言事尋除司
徒左長史加上儀同進爵河南郡公時吐谷渾寇邊以
行軍長史從元帥元諧討之以功進上開府後拜滄州
刺史在職數年風教大洽稱爲良二千石開皇四年上
幸洛陽熙來朝吏人恐其遷悲泣於道及還百姓出境
迎謁歡叫盈路在州獲白鳥白麀嘉麥甘露降於庭前

柳樹八年徙爲河北道行臺度支尚書吏人追思相與立碑頌德及行臺廢累遷鴻臚卿後以本官兼吏部尚書往判五曹尚書事號爲明幹上甚任之及上祠太山還次汴州惡其殷盛多有姦俠以熙爲汴州刺史下車禁游食抑工商人有向術開門者杜之船客停於郭外星居者勒爲聚落僑人逐令歸本其有滯獄並決遣之令行禁止上聞而嘉之顧侍臣曰鄴都天下難臨處敕相州刺史豆盧通令習熙法其年來朝考績爲天下之最賜帛三百疋頒告天下以嶺南夷數起亂徵拜桂州總管十七州諸軍事許以便宜從事刺史已下官得承

制補授給帳內五百人帛五百疋發傳送其家累改封
武康郡公熙至部大弘恩信其溪洞渠帥更相謂曰前
總管皆以兵威相脅今者乃以手教相諭我輩其可違
乎於是相率歸附先是州縣生梗長吏多不得之官寄
政於總管府熙悉遣之爲建城邑開設學校人夷感化
焉時有甯猛力者與陳後主同日生自言貌有貴相在
陳世已據南海平陳後文帝因而撫之卽拜安州刺史
然驕倨恃險未常參謁熙手書諭之申以交友之分其
母有疾熙復遺以藥猛力感之詣府請謁不敢爲非熙
以州縣多有同名於是奏改安州爲欽州黃州爲峯州

利州爲智州德州爲驩州東寧州爲融州上皆從之在職數年上表以年老疾患請解所任優詔不許賜以醫藥熙奉詔令交州渠帥李佛子入朝佛子欲爲亂請至仲冬上道熙意在羈縻遂從之有人詣闕訟熙受佛子賂而捨之上聞佛子反問至上大怒以爲信然遣使鎖熙詣闕熙性素剛鬱鬱不得志行至永州憂憤病卒上怒不解沒其家財及行軍總管劉方禽佛子送京師言熙實無贓上悟乃召其四子聽仕少子德棻最知名整弟休幼聰敏有文武材用與整同起兵逐張保授帥都督後爲中外府樂曹參軍時諸功臣多爲本州刺史晉

公護謂整曰以公勲望應得本州但朝廷藉公委任無容遠出然公一門之內須有衣錦之榮乃以休爲敦煌郡守在郡十餘年甚有政績卒於合州刺史

唐永北海平壽人也本居晉昌之憤安縣晉亂徙於丹陽祖揣始還魏官至北海太守因家焉父倫青州刺史永身長八尺少耿介有將帥才讀班超傳慨然有萬里之志正光中爲北地太守當郡別將俄而賊將宿勤明達車金雀等寇郡境永擊破之境內稍安永善馭下士人競爲之用臨陣常著帛展襦把角如意以指麾處分辭色自若在北地四年與賊數十戰未常敗北時人語

曰莫陸梁恐爾逢唐將永所營處至今猶稱唐公壘也
行臺蕭寶夤表永爲南幽州刺史夷人送故者莫不垂
淚當路遮留隨數日始得出境大統元年拜東雍州刺
史尋加衛將軍封平壽伯卒贈司空公永性清廉家無
蓄積妻子不免飢寒世以此稱之子陵少習武藝頗閑
吏職位大都督應州刺史車騎大將軍儀同三司陵子
悟美風儀博涉經史文詠可觀周大象中頗被宣帝任
遇位至內史下大夫漢陽公隋文帝得政廢於家而卒

陵弟瑾

瑾字附璘性溫恭有器量博涉經史雅好屬文身長八

尺二寸容貌甚偉年十七周文聞其名乃貽永書曰聞公有二子曰陵曰瑾陵從橫多武畧瑾雍容富文雅可並遣入朝孤欲委以文武之任因召拜尚書員外郎相府記室參軍事軍書羽檄瑾多掌之從破沙苑戰河橋並有功封姑臧縣子累遷尚書右丞吏部郎中子時魏室播遷庶務草創朝章國典瑾並參之遷戶部尚書進位驃騎大將軍開府儀同三司賜姓宇文氏時燕公于謹勲高望重朝野所屬白周文言瑾學行兼修願與之同姓結爲兄弟庶子孫承其餘論有益義方周文歎異者久之更賜瑾姓万紐于氏謹乃深相結納敦長幼之

序瑾亦廷羅子孫行弟姪之敬其爲朝望所宗如此進爵臨淄縣伯轉吏部尚書銓綜衡流雅有人倫之鑒以父憂去職尋起令視事時六尚書皆一時之秀周文自謂得人號爲六俊然瑾尤見器重于謹南伐江陵以瑾爲元帥府長史軍中謀畧多出瑾焉江陵旣平衣冠仕伍並沒爲僕隸瑾察其才行有片善者輒議免之賴瑾獲濟者甚衆時論多焉及軍還諸將多因虜掠大獲財物瑾一無所取唯得書兩車載之以歸或白周文曰唐瑾大有輜重悉是梁朝珍玩周文初不信之然欲明其虛實密遣使檢閱之唯見墳籍而已乃歎曰孤知此人

來二十許年明其不以利干義向若不令檢視恐常人
有投杼之疑孤所以益明之耳凡受人委任當如此也
論平江陵功進爵爲公六官建授禮部中大夫出爲蔡
州刺史歷拓州硤州所在皆有德化人吏稱之轉荊州
總管府長史入爲吏部中大夫歷御正納言內史中大
夫曾未十旬遂遷四職搢紳咸以爲榮久之除司宗中
大夫兼內史尋卒于位贈小宗伯諡曰方瑾性方重有
風格退朝休假恒著衣冠以對妻子遇迅雷風烈雖閤
夜宴寢必起冠帶端笏危坐又好施與家無餘財所得
祿賜常散之宗族其尤貧乏者又割膏腴田宅以振之

所留遺子孫者並堯塢之地朝野以此稱之撰新儀十篇所著賦頌碑誄二十餘萬言孫大智嗣瑾次子令則性好篇章兼解音律文多輕艷爲時人所傳天和初以齊馭下大夫使於陳大象中官至樂部下大夫仕隋位太子左庶子皇太子勇廢被誅

柳敏字白澤河東解縣人晉太常純之七世孫也父懿魏車騎大將軍儀同三司汾州刺史敏九歲而孤事母以孝聞性好學涉獵經史陰陽卜筮之術靡不習焉年未弱冠起家員外散騎侍郎累遷河東郡丞朝議以敏之本邑故有此授敏雖統御鄉里而處物平允甚得時

譽及周文剋復河東見而器異之乃謂之曰今日不喜
得河東喜得卿也卽拜丞相府參軍事俄轉戶曹參軍
兼記室每有四方賓客恒令接之爰及吉凶禮儀亦令
監綜又與蘇綽等修撰新制爲朝廷政典遷禮部郎中
封武城縣子加帥都督領本鄉兵俄進大都督遭母憂
居喪旬日之間鬢髮半白尋起爲吏部郎中叟瘠過禮
杖而後起周文見而歎異之特加稟賜及尉遲迴伐蜀
以敏爲行軍司馬軍中籌畧並以委之益州平進驃騎
大將軍開府儀同三司加侍中遷尚書賜姓宇文氏六
官建拜禮部中大夫周孝閔帝踐阼進爵爲公又除河

東郡守等復徵拜禮部出爲郢州刺史甚得物情及將還朝夷夏士人感其惠政並齎酒餼及物產候之於路敏乃從他道而還復拜禮部後改禮部爲司宗仍以敏爲之敏操履方正性又恭勤每日將朝必夙興待旦文久處臺閣明練故事近儀或乖先典者皆案據舊章刊正取中遷小宗伯監修國史轉小司馬又監修律令進位大將軍出爲鄜州刺史以疾不之部武帝平齊進爵武德郡公敏自建德以後寢疾積年武帝及宣帝並親幸其第問疾焉開皇元年進位上大將軍太子太保其年卒贈五州諸軍事晉州刺史臨終戒其子等喪事所

從務從簡約其子等並涕泣奉行少子昂

昂字千里幼聰穎有器識幹局過人周武帝時爲內史中大夫開府儀同三司賜爵文城郡公當塗用事百寮皆出其下昂竭誠獻替知無不爲謙虛自處未嘗驕物時論以此重之武帝崩受遺輔政稍被宣帝疎然不離本職隋文帝爲丞相深自結納文帝以爲太宗伯拜日遂得偏風不能視事文帝受禪疾愈加上開府拜潞州刺史昂見天下無事上表請勸學行禮上覽而善之優詔答昂自是天下州縣皆置博士習禮焉昂在州甚有惠政卒官子調歷秘書郎侍御史左僕射楊素嘗於朝

堂見調因獨言曰柳條通體弱獨搖不須風調欽版正
色曰調信無取公不當以爲侍御信有可取不應發此
言公當具瞻之地樞機何可輕發素甚奇之煬帝嗣位
累遷尚書左司郎中時王綱不振朝士多贓貨唯調清
素守常爲時所美然幹用非其所長

王士良字君明其先太原晉陽人也後因晉亂避地涼
州魏太武平沮渠氏曾祖景仁歸魏爲敦煌鎮將祖公
禮平城鎮司馬因家於代父延蘭陵郡守士良少修謹
不妄交游孝莊末忝朱仲遠啓爲府參軍事歷大行臺
郎中諫議大夫封石門縣男後與紇豆陵步藩交戰軍

敗爲藩所禽遂居河右僞行臺紇豆陵伊利欽其才擢授右丞妻以孫女士良旣爲姻好便得盡言遂曉以禍福伊利等卽歸附朝廷嘉之太昌初進爵晉陽縣子尋進爵琅邪縣侯授太中大夫右將軍出爲殷州車騎府司馬東魏徙鄴之後置京畿府專典兵馬時齊文襄爲大都督以士良爲司馬領外兵參軍尋遷長史加安西將軍徙封符壘縣侯武定初除行臺右中兵郎中又轉大將軍府屬從事中郎仍攝外兵事王思政鎮潁川齊文襄率衆攻之授士良大行臺左丞加鎮西將軍進爵爲公令輔其弟演於并州居守齊文宣卽位入爲給事

黃門侍郎領中書舍人仍總知并州兵馬事加征西將軍別封新豐縣子俄除驃騎將軍尚書吏部郎中文宣自晉陽赴鄴宮復以士良爲尚書左丞統留後事仍遷御史中丞轉七兵尚書未幾入爲侍中轉殿中尚書頃之復爲侍中吏部尚書士良少孤事繼母梁氏以孝聞及卒居喪合禮文宣尋起令視事士良屢表陳誠再三不許方應命文宣見其毀瘠乃許之因此臥疾歷年文宣每自臨視疾愈除滄州刺史乾明初徵還鄴授儀同三司孝昭卽位遣三道使搜揚人物士良與尚書令趙郡王高叡太常卿崔昂分行郡國但有一介之善者無

不以聞齊武成初除太子少傅少師復除侍中轉太常卿尋加開府儀同三司出爲豫州道行臺豫州刺史保定四年晉公護東伐權景宜以山南兵圍豫州士良舉城降授大將軍小司徒賜爵廣昌郡公尋除荊州總管行荊州刺史復入爲小司徒俄除鄜州刺史轉荊州刺史士良去鄉旣久忽臨本州耆老故人猶有存者遠近咸以爲榮加授上大將軍以老病乞骸骨優詔許之開皇元年卒時年八十二子德衡大象末儀同大將軍論曰昔陽貨外叛庶其竊邑而春秋譏之韓信背項陳平歸漢而史遷美之蓋以運屬旣安君道已著則狗利

忘德者罪也時逢擾攘臣禮未備則轉禍爲福者可也
崔彥穆楊纂段永等昔在山東沉淪下位並以羈旅之
士適回於燕雀之伍終佩龜組可謂見機者乎令狐整
幹用確然雅望重於河右處州里則勲著方隅升朝廷
則績宣出內而畏避權寵克保終吉不然何以自致顯
名而取高位也熙歷職流譽風政克舉雖古之循吏亦
何以加茲而毫釐爲爽丘山成過唯命也夫唐永良能
之名所在著美清白之譽顯於累職所謂幹能之士也
瑾敏並挺杞梓之材蘊瑚璉之器博觀載籍多識舊章
固乃國之名臣時之領袖周無君子斯焉取斯王士良

之于齊職居卿牧而失忠與義臨難苟免其背叛之徒歟

北史卷六十七考證

崔彥穆傳因攻拔棗陽○棗監本作榮今從南本

段永傳晉幽州刺史匹磾之後也○匹監本訛疋今改
從晉書

令狐整傳整進趨詳雅對揚辯暢○趨監本訛趣今從
南本

遂令整至玉門郡○玉監本訛王今改正

若其相推薦復恐效尤致禍○其一本作共

熙傳歷司勳吏部二曹中大夫○二監本訛一今改從
南本

東寧州爲融州○融字下監本缺州字今從南本增入
唐瑾傳退朝休假恒著衣冠○恒監本誤烜今改正
王士良傳後與紇豆陵步藩交戰○紇監本訛訖今改
從南本

北史卷六十八

唐

李

延

壽

撰

列傳第五十六

豆盧寧

子勣

孫毓

楊紹

子雄

王雅

子世積

韓雄

子禽

賀若敦

子弼

弟誼

豆盧寧字永安昌黎徒何人其先本姓慕容氏燕北地王精之後也高祖勝以燕皇始初歸魏授長樂郡守賜姓豆盧氏或云北人謂歸義爲豆盧因氏焉又云避難改焉未詳孰是父萇魏柔玄鎮將有威重見稱於時武成中以寧勲追贈柱國大將軍少保涪郡公寧少驍果

有志氣身長八尺美姿容善騎射魏永安中以別將隨
尔朱天光入關以破万俟醜奴以功賜爵靈壽縣男嘗
與梁仙定遇於平涼川相與肄射乃相去百步縣莎草
以射之七發五中仙定服其能贈遺甚厚天光敗從侯
莫陳悅及周文討悅寧與李弼來歸孝武西遷以奉迎
勲封河陽縣伯後進爵爲公從禽竇泰復弘農破沙苑
除衛大將軍兼大都督大統七年從于謹破稽胡帥劉
平伏於上郡及梁仙定反以寧爲軍司監隴右諸軍事
賊平進位侍中使持節驃騎大將軍開府儀同三司九
年從周文迎高仲密與東魏戰於芒山遷左衛將軍進

爵范陽郡公十六年拜大將軍羌帥傍乞鐵公及鄭五醜等反叛寧討平之恭帝二年改封武陽郡公遷尚書右僕射周孝閔帝踐阼授柱國大將軍武成初出爲同州刺史遷大司寇進封楚國公邑萬戶別食鹽亭縣一千戶收其租賦保定四年授歧州刺史屬大兵東討寧輿疾從軍薨於同州贈太保十州諸軍事同州刺史謚曰昭初寧未有子養弟永恩子勣及生子讚親屬皆請讚爲嗣寧曰兄弟之子猶子也吾何擇焉遂以勣嗣時以此多之及寧薨勣襲爵

勣字定東生時周文親幸寧家稱慶時遇新破齊軍周

文因字曰定東勣聰悟有器局初以勳臣子封義安縣侯周明帝受禪授稍伯下大夫開府儀同三司改封丹陽郡公明帝時爲左武伯中大夫勣自以經業未通請解職遊露門學帝嘉之敕以本官就學齊王憲納勣妹爲妃恩禮愈厚武帝嗣位渭源燒當羌因饑作亂以勣有才略拜渭州刺史甚有惠政華夷悅服大致祥瑞鳥鼠山俗呼爲高武隴其下渭水所出其山絕壁千尋由來乏水諸羌苦之勣馬足所踐忽飛泉涌出有白鳥飛上廳前乳子而後去有白狼見於襄武人爲之謠曰我有丹陽山出玉漿濟我人夷神鳥來翔百姓因號其泉

曰玉漿泉後丁父艱毀瘁過禮襲爵楚國公大象二年
累遷利州總管尋拜柱國隋文帝爲丞相益州總管王
謙作亂勦嬰城固守謙將達奚悉等攻之起土山鑿城
爲七十餘穴堰江以灌之勦時戰士不過二千晝夜相
拒經四旬梁睿軍且至賊解去授上柱國賜一子爵中
山縣公開皇中爲夏州總管帝以其家貴盛勲効克彰
後爲漢王諒納其女爲妃恩遇彌厚七年追守利州功
詔食始州臨津縣邑千戶十年以疾徵還京師詔諸王
並至勸第中使顧問道路不絕卒諡曰襄子賢嗣位顯
州刺史大理少卿武賁郎將次子毓

毓字道生少英果有氣節漢王諒出鎮并州毓以妣兄爲王府主簿以征突厥功授儀同三司及煬帝卽位諒納諮議王頗謀作亂毓苦諫不從因謂其弟懿曰吾匹馬歸朝自得免禍此乃身計非爲國也今且僞從以思後計毓兄顯州刺史賢言於帝曰臣弟毓素懷志節必不從亂但逼兇威不能克遂臣請從軍與毓爲表裏諒不足圖也帝許之賢密遣家人齎敕書至毓所與之計諒將往介州令毓與總管屬朱濤留守毓與濤議拒之濤拂衣不從毓追斬之時諒司馬皇甫誕以諫被囚毓出之與協計及開府盤石侯宿勤武等閉城拒諒部分

未定有人告諒諒攻之城陷見害時年二十八諒平贈大將軍封正義縣公諡曰愍子願師嗣拜儀同三司大業初行新令五等並除未幾帝復下詔改封雍丘侯復以願師襲

讚以寧勲建德初賜爵華陰縣侯累遷開府儀同大將軍進爵武陽郡公永恩少有職度與寧俱歸周文以迎孝武功封新興伯屢從征討皆有功進位驃騎大將軍開府儀同三司周孝閔帝踐阼授鄴州刺史改封沃野縣公保定元年入爲司會中大夫寧封楚國公請以先封武陽郡三千戶益沃野之封詔許焉卒于官贈少保

諡曰敬子通嗣

通字平東一名會弘厚有器局在周以父功賜爵臨貞縣侯改封沃野縣公位開府北徐州刺史開皇初進爵南陳郡公尚隋文帝妹昌樂縣長公主歷定相二州刺史夏洪二州總管並以寬惠稱卒官諡曰安子寬嗣

楊紹字子安弘農華陰人也祖興魏新平郡守父國中散大夫紹少慷慨有志略屢從征伐力戰有功普泰初封平鄉縣男大統元年進爵冠軍縣公四年爲郿城郡守紹性恕直兼有威惠百姓安之累遷驃騎大將軍開府儀同三司郿州刺史賜姓叱呂引氏周孝閔帝踐祚

進爵儻城郡公位大將軍卒贈成文等八州刺史謚曰
信子雄嗣

雄初名惠美姿容有器度雍容閑雅進止可觀周武帝
時爲太子司旅下大夫帝幸雲陽宮衛王直作亂襲肅
章門雄逆拒破之封武陽郡公遷右衛上大夫大象中
進爵邗國公隋文帝爲丞相雍州牧畢王賢構作難雄
時爲別駕知其謀以告文帝賢伏誅以功授柱國雍州
牧仍領相府虞候周宣帝葬備諸王有變令雄率六千
騎送至陵所進位上柱國文帝受禪除左衛將軍兼宗
正卿遷右衛大將軍參預朝政封廣平王以邗公別封

一子雄請封弟士貴朝廷許之或奏高頰朋黨者帝言之於朝雄深明其虛帝亦以爲然雄時貴寵冠絕一時與高頰虞慶則蘇威稱爲四貴雄寬容下士朝野顧屬帝陰忌之不欲其典兵馬乃改授司空外示優崇而內實奪其權也雄乃閉門不通賓客尋改封清漳王仁壽初帝以清漳不允聲望命職方進地圖指安德郡示羣臣曰此號足爲名德相稱乃改封安德王大業初授太子太傅元德太子薨檢校鄭州刺史遷懷州刺史京兆尹帝親征吐谷渾詔雄總管澆河道諸軍及還改封觀王遼東之役檢校左翊衛大將軍出遼東道次瀘河鎮

遘疾薨帝爲之廢朝詔鴻臚監護喪事有司請諡曰懿
帝曰王道高雅俗德冠生靈乃諡曰德贈司徒襄國等
十郡太守子恭仁位吏部侍郎恭仁弟緜性和厚頗有
文學歷義州刺史淮南郡太守及父薨起爲司隸校尉
遼東之役楊玄感反其弟玄縱自帝所逃赴其兄路逢
緜緜避人偶語久之司隸刺史劉休文奏之時恭仁將
兵於外帝寢其事緜憂發病而卒

雄弟達字士達有學行仕周位儀同內史下大夫封遂
寧縣男文帝受禪拜給事黃門侍郎進爵爲子遷兼吏
部侍郎加開府轉內史侍郎鄴鄭趙三州刺史俱有能

名平陳後帝差品天下牧宰達爲第一擢拜工部尚書
加上開府達爲人弘厚有局度楊素每曰有君子貌兼
君子心者唯楊達耳獻皇后及文帝山陵制度達並參
預焉煬帝嗣位轉納言領營東都副監遼東之役領右
武衛將軍進位左光祿大夫卒於師贈吏部尚書始安
侯諡曰恭

王雅字度容闡熙新閩人也少沉毅木訥寡言有膽勇
善騎射周文聞其名召入軍以功賜爵居庸縣子從禽
賈泰於潼關沙苑之戰雅謂所部曰彼軍殆有百萬今
我不滿萬人常理論之實難與敵但相公神武以順討

逆豈計衆寡大丈夫不以此時破賊何用生爲乃擐甲
出戰所向披靡周文壯之又從戰芒山時大軍失利諸
將皆退雅獨拒之敵人見其無繼步騎競進雅左右奮
擊斬九級敵衆稍退雅乃還周文歎曰王雅舉身悉是
膽也進爵爲伯累遷驃騎大將軍開府儀同三司明帝
初除汾州刺史勵精爲政人庶悅附自遠至者七百餘
家卒於夏州刺史子世積嗣

世積容貌魁岸腰帶十圍風神爽拔有人傑之表在周
以功拜上儀同封長子縣公隋文帝受禪進封宜陽郡
公高頰美其才能甚善之嘗謂頰曰吾輩俱周臣子社

稷淪沒若何頗深拒之未幾授蘄州總管平陳之役以舟師自蘄水趣九江以功進位柱國荊州總管後桂州人李光仕作亂世積以行軍總管討平之進位上柱國甚見隆重世積見帝性忌刻功臣多獲罪由是縱酒不與執政言及時事上以爲有酒疾舍之宮內令醫者療之世積詭稱疾愈始得就第及征遼東世積與漢王並爲行軍元帥至柳城遇疾而還拜涼州總管令騎士七百人送之官未幾其親信安定皇甫孝諧有罪吏捕之亡抵世積不納由是有憾孝諧竟配防桂州事總管令狐熙熙又不禮焉甚困窮因徼幸上變稱世積嘗令道

人相其貴不道人云當爲國主謂其妻曰夫人當爲皇后又將之涼州其所親謂世積曰河西天下精兵處可圖大事世積曰涼州土曠人稀非用武國由是被徵案其事有司奏左衛大將軍元旻右衛大將軍元胄左僕射高頰並與世積交通受其名馬之贈世積竟坐誅旻胄等免官拜孝諧爲上大將軍

韓雄字木蘭河南東垣人也祖景孝文時爲赭陽郡守雄少敢勇膂力絕人工騎射有將率材略及孝武西遷雄便慷慨有立功之志大統初遂與其屬六十餘人於洛西舉兵數日間衆至千人與河南行臺楊琚共爲犄

角每抄掠東魏所向剋獲東魏洛州刺史韓賢以狀聞
鄴乃遣其軍司慕容紹宗與賢合勢討雄戰數十合雄
衆略盡兄及妻子皆爲賢所獲將以爲戮乃遣人告雄
皆免之雄乃詣賢軍卽隨賢還洛潛引賢黨謀欲襲之
事洩遁免謁周文於弘農封武陽縣侯遣還鄉里更圖
進取雄乃招集義衆從獨孤信入洛陽芒山之役周文
命雄邀齊神武於隘道神武怒命三軍并力取雄雄突
圍得免除東徐州刺史東魏雍州刺史郭叔略接境頗
爲邊患雄密圖之輕將十騎夜入其境伏於道側遣都
督韓仕於略城服東魏人衣服詐若自河陽叛投關西

者略出馳之雄自後射之再發咸中遂斬略首除河南
尹進爵爲公尋進驃騎大將軍開府儀同三司侍中河
南邑中正周孝閔帝踐祚進爵新義郡公賜姓宇文氏
明帝二年除都督中州刺史雄久在邊具知敵人虛實
每率衆深入不避艱難前後經四十五戰雖時有勝負
而雄志氣益壯東魏深憚之卒于鎮贈大將軍五州諸
軍事諡曰威子禽嗣

禽字子通少慷慨以膽略稱容貌魁岸有雄傑之表性
又好書經史百家皆略知大旨周文見而異之令與諸
子遊集以軍功稍遷儀同三司襲爵新義郡公武帝伐

齊禽說下獨孤永業於金墉城及平范陽加上儀同永
州刺史隋文帝作相遷和州刺史陳將甄慶任蠻奴蕭
摩訶等共爲聲援頻寇江北前後入界禽屢挫其鋒陳
人奪氣開皇初文帝潛有吞江南志拜禽廬州總管委
以平陳之任甚爲敵人所憚及大舉伐陳以禽爲先鋒
禽領五百人宵濟襲採石守者皆醉遂取之進攻姑熟
半日而拔次於新林江南父老素聞其威信來謁軍門
晝夜不絕其將樊巡魯世真田瑞等相繼降晉王遣行
軍總管杜彥與禽合軍陳叔寶遣領軍蔡徵守朱雀航
聞禽將至衆懼而潰任蠻奴爲賀若弼所敗棄軍降禽

禽以精騎直入朱雀門陳人欲戰蠻奴搗之曰老夫尚
降諸君何事衆皆散走遂平金陵執陳主叔寶時賀若
弼亦有功乃下詔晉王曰此二公者朕本委之悉如朕
意以名臣之功成太平之業天下盛事何用過此又下
優詔於禽弼曰申國威於萬里宣朝化於一隅使東南
之人俱出湯火數百年賊旬日廓清專是公之功也高
名塞於宇宙盛業光於天壤逖聽前古罕聞其匹班師
凱入誠知非遠相思之甚寸陰若歲及至京弼與禽爭
功於上前弼曰臣在蔣山死戰破其銳卒禽其驍將震
揚威武遂平陳國禽略不交陣豈臣之比禽曰本奉明

旨令臣與弼同取僞都弼乃敢先期逢賊遂戰致將士傷死甚多臣以輕騎五百兵不血刃直取金陵降任蠻奴執陳叔寶據其府庫傾其巢穴弼至夕方扣北掖門臣啓關而納之斯乃救罪不暇安得與臣爲比上曰二將俱合上勲於是進位上柱國賜物八千段有司劾禽縱士卒淫汙陳宮坐此不得國公及真食邑大軍之始出也上敕有司曰亡國物我一不以入府可於苑內築五梁當悉賜文武百官大射以取之及是上御立堂大陳陳之奴婢貨賄會王公文武官七品已上武職領兵都督已上及諸考使以射之先是江東謠曰黃斑青驄

馬發自壽陽涘來時冬氣未去日春風始皆不知所謂禽本名禽武平陳之際又乘青驄馬往返時節與歌相應至是方悟後突厥來朝上謂曰汝聞江南有陳國天子乎對曰聞之上命左右引突厥詣禽前曰此是執得陳國天子者禽勵然顧之突厥惶恐不敢仰視其威容如此別封壽光縣公真食千戶以行軍總管屯金城禦備胡寇卽拜涼州總管俄徵還京恩禮殊厚無何其隣母見禽門下儀衛甚盛有同王者母異而問之其中人曰我來迎王忽不見又有人疾篤忽驚走至禽家曰我欲謁王左右問何王曰閻羅王禽子弟欲撻之禽止之

曰生爲上柱國死作閻羅王亦足矣因寢疾卒子世諤

詞

世諤倜儻驍捷有父風楊玄感亂引爲將每戰先登玄感敗爲吏所拘時帝在高陽送詣行在所世諤日令守者市酒殺以酣暢揚言曰吾死在朝夕不醉何爲漸以酒進守者守者狎之遂飲令醉因得逃奔山賊不知所終禽母弟僧壽字玄慶亦以勇烈知名周武帝時爲侍伯中旅下大夫隋文帝得政從韋孝寬平尉遲迥以功授大將軍封昌樂縣公開皇初拜安州刺史時禽爲廬州總管朝廷不欲其兄弟同在淮南轉熊蔚二州刺史

進爵廣陵郡公尋以行軍總管擊破突厥於雞頭山後
坐事免數歲復拜蔚州刺史突厥甚憚之後檢校靈州
總管事從楊素破突厥進位上柱國改封江都郡公煬
帝卽位封新蔡郡公自是不復任用大業五年從幸太
原時有京兆人達奚通妾王氏能清歌朝臣多相命觀
之僧壽亦預焉坐除名尋命復位卒於京師子孝基

僧壽弟洪字叔明少驍勇善騎射膂力過人仕周以軍
功拜大都督隋文帝爲丞相從韋孝寬破尉遲迥加上
開府封甘棠縣侯及帝受禪進爵爲公開皇九年平陳
之役授行軍總管及陳平晉王廣大獵於蔣山有猛獸

在圍中衆皆懼洪馳馬射之應弦而倒陳氏諸將列觀
皆歎伏焉王大喜賜縑百匹尋以功加柱國拜蔣州刺
史轉廉州時突厥屢爲邊患朝廷以洪驍勇令檢校朔
州總管事尋拜代州總管仁壽元年突厥達頭可汗犯
塞洪率蔚州刺史劉隆大將軍李藥王拒之遇虜於恒
安衆寡不敵洪四面搏戰身被重創將士沮氣虜悉衆
圍之矢下如雨洪僞與虜和圍少懈洪率所領潰圍而
出死者大半殺虜亦倍洪及藥王除名隆竟坐死煬帝
北巡至恒安見白骨被野以問侍臣曰往者韓洪與虜
戰處也帝憫然傷之收葬骸骨命五郡沙門爲設齋供

拜洪隴西太守未幾朱崖人王萬昌作亂詔洪平之以功加金紫光祿大夫領郡如故俄而萬昌弟仲通復叛又詔洪平之還師未幾旋遇疾卒

賀若敦河南洛陽人也其先居漠北世爲部落大人曾祖貸魏獻文時入國爲都官尚書封安富縣公祖伏連仕魏位雲州刺史父統勇健不好文學以祖蔭爲祕書郎永安初從太宰元天穆討邢杲以功封當亭子齊神武初起以統爲潁川長史執刺史田迅以州降拜兗州刺史賜爵當亭縣公歷位北雍恒二州刺史卒贈司空公諡曰哀敦少有氣幹統之將執田迅也慮事不果又

以累弱旣多難以自救沈吟者久之敦年十七進策贊成其謀統流涕從之遂定謀歸西時羣盜蜂起大龜山賊張世顯潛來襲統敦挺身赴戰手斬七八人賊乃走統大悅謂左右僚屬曰我少從軍旅戰陣非一如此兒年時膽略未見其人非唯成我門戶亦當爲國名將明年從河內公獨孤信於洛陽被圍敦彎三石弓箭不虛發信乃言於周文引至麾下授都督封安陵縣伯嘗從校獵甘泉宮時圍人不齊獸多越逸周文大怒人皆股戰圍內唯有一鹿俄亦突圍而走敦躍馬馳之鹿上東出敦棄馬步逐至山半便乃擊之而下周文大悅諸將

因得免責累遷太子庶子廢帝二年拜右衛將軍俄加
驃騎大將軍開府儀同三司進爵廣鄉縣公時岷蜀初
開人情尚梗巴西人譙淹據南梁州與梁西江州刺史
王開業共爲表裏扇動羣蠻周文令敦討平之進爵武
都郡公拜典祀中大夫尋爲金州都督蠻帥向白虜向
五子王等聚衆爲寇圍逼信州詔敦與開府田弘赴救
未至而城已陷乃進軍追討遂平信州是歲荊州蠻帥
文子榮自號仁州刺史復令敦與開府段韶討禽子榮
并虜其衆武成元年入爲軍司馬陳將侯瑱侯安都等
圍逼湘州遏絕糧援乃令敦度江赴救敦連戰破瑱乘

勝遂次湘州俄而秋水汎溢江路遂斷糧援旣絕恐瑱等知其糧少乃於營內多爲聚土覆之以米召側近村人陽有所訪問隨卽遣之瑱等聞之良以爲實敦又增修營壘造廬舍亦以持久湘羅之間遂廢農業瑱等無如之何初土人亟乘輕船載米粟及籠鷄鴨以餉瑱軍敦患之乃僞爲土人裝船伏甲士於中瑱軍人望見謂餉船之至逆來爭取敦甲士遂禽之又敦軍數有叛人乘馬投瑱瑱輒納之敦又別取一馬牽以趣船令船中逆以鞭鞭之如是者再三馬便畏船不上後伏兵於江岸使人乘畏船馬以招瑱軍詐云投附瑱便遣兵迎接

競來牽馬馬旣畏船不上伏兵發盡殺之此後實有饋
餉及亡奔瑱者猶謂敦之詐並不敢受相持歲餘瑱等
不能制求借船送敦度江敦慮其詐或謂曰舍我百里
當爲汝去瑱等遂留船於是將兵去津路百里敦覘之
非詐勒衆而還在軍病死者十五六晉公護以敦失地
無功除其名保定五年累遷中州刺史鎮函谷敦恃功
負氣顧其流輩皆爲大將軍敦獨未得兼以湘州之役
全軍而反翻被除名每出怨言晉公護怒徵還逼令自
殺臨刑呼子弼謂曰吾必欲平江南然心不果汝當成
吾志吾以舌死汝不可不思因引錐刺弼舌出血誠以

慎口建德初追贈大將軍諡曰烈

弼字輔伯少有大志驍勇便弓馬解屬文博涉書記有重名周齊王憲聞而敬之引爲記室封當亭縣公遷小內史與韋孝寬伐陳攻拔數十城弼計居多拜壽州刺史改封襄邑縣公隋文帝爲丞相尉遲迥作亂帝恐弼爲變遣長孫平馳驛代之及帝受禪陰有平江南志訪可任者高頴薦弼有文武才幹於是拜吳州總管委以平陳事弼忻然以爲己任與壽州總管源雄並爲重鎮弼遺雄詩曰交河驃騎幕合浦伏波營勿使騏驎上無我二人名獻取陳十策上稱善賜以寶刀開皇九年大

舉伐陳以弼爲行軍總管將度江酌酒呪曰弼親承廟
略遠振國威若使福善禍淫大軍利涉如事有乖違得
葬江魚腹中死且不恨先是弼請緣江防人每交代際
必集歷陽於是大列旗幟營幕被野陳人以爲大兵至
悉發國中士馬旣知防人交代其衆復散後以爲常不
復設備及此弼以大軍濟江陳人弗覺襲陳南徐州拔
之執其刺史黃恪軍令嚴肅秋毫不犯有軍士於人間
酤酒者弼立斬之進屯蔣山之白土岡陳將魯廣達周
智安任蠻奴田瑞孔範蕭摩訶等以勁兵拒戰田瑞先
犯擊走之魯廣達等相繼遁進弼軍屢却弼揣知其驕

士卒且惰於是督厲將士殊死戰遂大破之麾下士開
府員明禽摩訶至弼命左右牽斬之摩訶顏色自若弼
釋而禮之從北掖門入時韓禽已執陳叔寶弼至呼叔
寶視之叔寶惶懼流汗股慄再拜弼謂曰小國之君當
大國卿拜禮也入朝不失作歸命侯無勞恐懼旣而弼
恚恨不獲叔寶於是與禽相詢挺刃而出令蔡徵爲叔
寶作降牋命乘騾車歸已事不果上聞弼有功大悅下
詔褒揚之晉王以弼先期決戰違軍命於是以弼屬吏
上驛召之及見迎勞曰剋定三吳公之功也命登御坐
賜物八千段加位上柱國進爵宋國公真食襄邑三千

戶加寶劔寶帶金甕金盤各一并雉尾扇曲蓋雜綵二千段女樂二部又賜陳叔寶妹爲妾拜右領軍大將軍平陳後六年弼撰其書策上之謂爲御授平陳七策上弗省曰公欲發揚我名我不求名公宜自載家傳七策其一請廣陵頓兵一萬番代往來陳人初見設備後以爲常及大兵南伐不復疑也其二使兵緣江時獵人馬喧噪及兵臨江陳人以爲獵也其三以老馬多買陳船而匿之買弊船五六十艘於瀆內陳人覘以爲內國無船其四積葦荻於楊子津其高蔽艦及大兵將度乃卒通瀆於江其五塗戰船以黃與枯荻同色故陳人不預

覺之其六先取京口倉儲速據白土岡置兵死地故一戰而剋其七臣奉敕兵以義舉及平京口俘五千餘人便悉給糧勞遣付其敕書命別道宣喻是以大兵度江莫不草偃十七日之間南至林邑東至滄海西至象林皆悉平定轉右武侯大將軍弼時貴盛位望隆重其兄隆爲武都郡公弟東萬榮郡公並刺史列將弼家珍翫不可勝計婢妾曳綺羅者數百時人榮之弼自謂功名出朝臣之右每以宰相自許旣而楊素爲右僕射弼仍爲將軍甚不平形於言色由是免官弼怨望愈甚後數載下弼獄上謂曰我以高頰楊素爲宰相汝每昌言此

二人唯堪噉飯耳是何意也弼曰頰臣之故人素臣之
舅子臣並知其爲人誠有此語公卿奏弼怨望罪當死
上曰臣下守法不移公可自求活理弼曰臣恃至尊威
靈將八千兵渡江卽禽陳叔寶竊以此望活上曰此已
格外酌賞何用追論弼曰平陳之日諸公議不許臣行
推心爲國已蒙格外重賞今還格外望活旣而上低徊
者數日惜其功特令除名歲餘復其爵位上亦忌之不
復任使然每宴賜遇之甚厚十九年上幸仁壽宮讌王
公詔弼爲五言詩詞意憤怨帝覽而容之明年春弼又
有罪在禁所詠詩自若上數之曰人有性善行惡者公

之爲惡乃與行俱有三太猛嫉妬心太猛自是非人心太猛無上心太猛昔在周朝已教他兒子反此心終不能改邪他日上謂侍臣曰初欲平陳時弼謂高頴曰陳叔寶可平不作高鳥盡良弓藏邪頴云必不然平陳後便索內史又索僕射我語頴曰功臣正宜授勲官不可豫朝政弼後語頴皇太子於已出口入耳無所不盡公終久何必不得弼力何脉脉邪意圖鎮廣陵又求荊州總管並是作亂處意終不改也後突厥入朝上賜之射突厥一發中的上曰非弼無能當此乃命弼弼再拜呪曰臣若赤誠奉國當一發破的如不然發不中也弼射

一發而中上大悅顧謂突厥曰此人天賜我也煬帝之
在東宮嘗謂曰楊素韓禽史萬歲三人俱良將也優劣
如何弼曰楊素是猛將非謀將韓禽是鬪將非領將史
萬歲是騎將非大將太子曰然則大將誰也弼拜曰唯
殿下所擇弼意自許爲大將及煬帝嗣位尤被踈忌大
業三年從駕北巡至榆林時爲太帳下可坐數千人召
突厥啟人可汗饗之弼以爲太侈與高頴宇文弼等私
議得失爲人所告竟坐誅時年六十四妻子爲官奴婢
羣從徙邊子懷亮慷慨有父風以柱國世子拜儀同三
司坐弼爲奴俄亦誅死敦弟誼誼性剛果有幹略周文

據關中引之左右累遷儀同三司略陽公府長史周閔
帝受禪封霸城縣子加開府歷原信二州總管及兄敦
以讒毀伏誅坐免官從武帝平齊拜洛州刺史進封建
威縣侯開皇中位左武侯將軍海陵郡公後以突厥爲
邊患誼素有威名拜靈州刺史進位柱國誼時年老猶
能重鎧上馬甚爲北夷所憚數載上表乞骸骨卒於家
子舉襲爵

論曰周文帝屬禍亂之辰以征伐而定海內大則連兵
百萬繫之以存亡小則轉戰邊亭不闕於旬月是以兵
無少長士無賢愚莫不投筆要功橫戈請奮豆盧寧楊

紹王雅韓雄等或攀翼雲漢底績屯夷雖運移年代而
名成終始美矣哉豆盧勣譽宣分竹毓節見臨危可謂
載德象賢也觀德王位登台袞慶流後嗣保茲寵祿寔
仁厚之所致乎王世積雋才雖多適足爲害者矣賀若
敦志略慷慨深入敵境勅寇絕其糧道江淮沮其歸塗
臨危而策出無方事迫而雄心彌厲故能利涉死地全
師以反而茂勲莫紀嚴刑已及天下是以知宇文護之
不能終其位也自南北分隔將三百年隋文爰應千齡
將一函夏賀若弼慷慨申必取之長策韓禽奮發賈餘
勇以爭先隋氏自此一戎威加四海稽諸天道或時有

廢興考之人謀實二臣之力其倣儻英略賀弼居多武
毅威雄韓禽稱重方於晉之王杜勲庸綽有餘地然賀
弼功成名立矜伐不已竟顛殞於非命亦不密以失身
若念父臨終之言必不及於斯禍韓禽累葉將家威聲
動俗敵國旣破名遂身全幸也廣陵甘棠咸有武藝驍
雄膽略並爲當時所推赳赳干城難兄難弟矣

北史卷六十八考證

王雅傳時大軍失利諸將皆退雅獨拒之○失監本訛
未今改從周書

世積傳可圖大事○大監本訛太今改正

韓雄傳贈大將軍五州諸軍事○隋書官至大將軍洛
虞等八州刺史與此小異

禽傳禽字子通○禽陳書作擒

禽本名禽○隋書禽本名豹

世諤傳朝臣多相命觀之○命一本作會

賀若敦傳河南洛陽人也○河南一本作河陽

弼傳陳將魯廣達周智安任蠻奴田瑞孔範蕭摩訶等
○田瑞下隋書有樊毅二字

北史卷六十九

唐 李 延 壽 撰

列傳第五十七

申徽

陸通

弟暹

庫狄峙

楊荐

王慶

趙剛

子仲卿

趙昶

王悅

趙文表

元定

楊擲

申徽字世儀魏郡人也六世祖鐘爲後趙司徒冉閔末中原喪亂鐘子邃避地江左曾祖爽仕宋位雄州刺史祖隆道宋北兖州刺史父明仁郡功曹早卒徽少與母居盡力孝養及長好經史性審慎不妄交遊遭母憂喪

畢乃歸於魏元顥入洛以元邃爲東徐州刺史邃引徽爲主簿顥敗邃被檻車送洛陽故吏賓客並委去唯徽送之及邃得逸乃廣集賓友歎徽有古人風尋除太尉府行參軍孝武初徽以洛陽兵難未已遂間行入關見周文周文與語奇之薦之於賀拔岳岳亦雅相敬待引爲賓客周文臨夏州以徽爲記室參軍兼府主簿周文察徽沉密有度量每事信委之乃爲大行臺郎中時軍國草創幕府務殷四方書檄皆徽之辭也以迎孝武功封博平縣子本州大中正大統初進爵爲侯四年拜中書舍人修起居注河橋之役大軍不利近侍之官分散

者衆微獨不離左右魏帝稱歎之十年遷給事黃門侍郎先是東陽王元榮爲瓜州刺史其女壻劉彥隨焉及榮死瓜州首望表榮子康爲刺史彥遂殺康而取其位屬四方多難朝廷不遑問罪因授彥刺史頻徵不奉詔又南通吐谷渾將圖叛逆周文難於動衆欲以權略致之乃以微爲河西大使密令圖彥微輕以五十騎行旣至止於賓館彥見微單使不以爲疑微乃遣一人微勸彥歸朝以揣其意彥不從微又使贊成其任計彥便從之遂來至館微先與瓜州豪右密謀執彥遂叱而縛之彥辭無罪微數之曰君無尺寸之功濫居方岳之重恃

遠背誕不恭貢職戮辱使人輕忽詔命計君之咎實不容誅但受詔之日本令相送歸闕所恨不得卽申明罰以謝邊遠耳於是宣詔慰勞吏人及彥所部復云大軍續至城內無敢動者使還遷都官尚書十二年瓜州刺史成慶爲城人張保所殺都督令狐延等起義逐保啓請刺史以徽信洽西土拜假節瓜州刺史徽在州五歲儉約率下邊人樂而安之十六年徵兼尚書右僕射加侍中驃騎大將軍開府儀同三司廢帝二年進爵爲公正右僕射賜姓宇文氏徽性勤至凡所居官案牘無大小皆親自省覽以是事無稽滯吏不得爲姦後雖歷公

卿此志不懈出爲襄州刺史時南方初附舊俗官人皆通餉遺微性廉慎乃畫楊震像於寢室以自戒及代還人吏送者數十里不絕微自以無德於人慨然懷愧因賦詩題於清水亭長幼聞之皆競來就讀遞相謂曰此是申使君手迹並寫誦之明帝以御正任總絲綸更崇其秩爲上大夫貞四人號大御正又以微爲之歷小司空少保出爲荊州刺史入爲小司徒小宗伯天和六年上疏乞骸骨詔許之薨贈泗州刺史諡曰章子康嗣位瀘州刺史司織下大夫上開府康弟敦汝南郡守敦弟靜齊郡守靜弟處上開府同昌縣侯卒

陸通字仲明吳郡人也曾祖載從宋武帝平關中軍還留載隨其子義真鎮長安遂沒赫連氏魏太武平赫連氏載仕魏位中山郡守父政性至孝其母吳人好食魚北土魚少政求之常苦難後宅側忽有泉出而有魚遂得以供膳時人以爲孝感所致因謂其泉爲孝魚泉從丕朱天光討伐及天光敗歸周文周文爲行臺以政爲行臺左丞原州長史賜爵中都縣伯大統中卒通少敦敏好學有志節幼從政在河西遂逢寇難與政相失通乃自拔東歸從丕朱榮榮死又從丕朱兆及丕朱氏滅乃入關周文時在夏州引爲帳內督頃之賀拔岳爲侯

莫陳悅所害時有傳岳軍府已亡散者周文憂之通以爲不然居數日間至果如所策自是愈見親禮遂晝夜陪侍家人罕見其面通雖處機密愈自恭謹周文以此重之後以迎孝武功封都昌縣伯大統元年進爵爲侯從禽竇泰復弘農沙苑之役力戰有功又從解洛陽圍軍還屬趙青雀反於長安周文將討之以人馬疲弊不可速行又謂青雀等一時陸梁不足爲慮乃云我到長安但輕騎臨之必當面縛通進曰青雀等旣以大軍不利謂朝廷傾危同惡相求遂成反亂然其逆謀久定必無遷善之心且其詐言大軍敗績東寇將至若以輕騎

往百姓謂爲信然更沮兆庶之望大兵雖疲弊精銳猶多以明公之威率思歸之衆以順討逆何慮不平周文深納之因從平青雀錄前後功進爵爲公徐州刺史以寇難未平留不之部與于謹討劉平伏加大都督從周文拔玉壁進儀同三司九年高仲密以地求附通從若千惠戰於芒山衆軍皆退唯惠與通率所部力戰至夜中乃陰引還敵亦不敢逼進授驃騎大將軍開府儀同三司太僕卿賜姓部六孤氏進爵綏德郡公周孝閔踐祚拜小司空保定五年累遷大司寇通性柔謹雖久處列位常清慎自守所得祿賜盡與親故共之家無餘財

常曰凡人患貧而不貴不患貴而不貧也建德元年轉大司馬其年薨通弟逞

逞字季明初名彥字世雄魏文帝常從容謂之曰爾旣溫裕何因乃字世雄且爲世之雄非所宜也於爾兄弟又復不類遂改焉逞少謹密早有名譽兄通先以軍功別受茅土乃讓父爵中都縣伯令逞襲之起家羽林監周文內親信時輩皆以驍勇自達唯逞獨兼文雅周文由此加禮遇焉大統十四年參大丞相府軍事尋兼記室保定初累遷吏部中大夫歷蕃部御伯中大夫進驃騎大將軍開府儀同三司徙授司宗中大夫轉軍司馬

逞幹識詳明歷任三府所在著績朝廷嘉之進爵爲公
天和三年齊遣侍中斛斯文略中書侍郎劉逖來聘初
脩隣好盛選行人詔逞爲使主尹公正爲副以報之逞
美容止善辭令敏而有禮齊人稱焉還屆近畿詔令路
車儀服郊迎而入時人榮之四年除京兆尹郡界有豕
生數子經旬而死其家又有積遂乳養之諸豚賴之以
活時論以逞仁致所致俄遷司會中大夫出爲河州刺
史晉公護雅重其才表爲中外府司馬頗委任之尋復
爲司會兼納言遷小司馬及護誅坐免官頃之起爲納
言又以疾不堪劇任及除宜州刺史故事刺史奉辭例

備鹵簿逞以時屬農要奏請停之武帝深嘉焉詔遂其所請以彰雅操逞在州有惠政吏人稱之東宮初建授太子太保卒贈大將軍子操嗣

庫狄峙其先遼東人本姓段匹磾之後也因避難改焉後徙居代世爲豪右祖凌武威郡守父貞上洛郡守峙少以弘厚知名善騎射有謀略仕魏位高陽郡守政存仁恕百姓頗悅之孝武西遷峙乃棄官從入關大統元年拜中書舍人參掌機密以恭謹見稱遷黃門侍郎時與東魏爭衡蠕蠕乘虛屢爲邊患朝議欲結和親乃使峙往峙狀貌魁梧善於辭令蠕蠕主雅信重之自是不

復爲寇周文謂峙曰昔魏絳和戎見稱前史以君方之
彼有愧色封高邑縣公累遷驃騎將軍開府儀同三司
拜侍中蠕蠕滅後突厥強盛雖與周通好而外連齊氏
周文又令峙銜命喻之突厥感悟卽執齊使歸諸京師
進爵安豐郡公歷小司空小司寇明帝初爲益州刺史
都督三十一州諸軍事峙性寬和尚清靖爲夷獠所安
後爲宜州刺史入爲少師以年老乞骸骨詔許之卒諡
曰定子疑嗣少知名位開府儀同三司職方中大夫蔡
州刺史卒官疑弟徵從平齊以功拜儀同大將軍賜爵
樂陵縣公徵弟徽亦以軍功至儀同大將軍保城縣男

徽弟嶽性弘厚有局度以齊右下大夫從武帝東伐入并州軍敗侍臣殲焉及帝之出唯嶽侍從以功授上儀同大將軍遷開府歷右宮伯賜爵樂城縣侯仕隋位至戶部尚書

楊荐字承略秦郡寧夷人也父寶昌平郡守荐幼孤早有名譽性廉謹喜怒不形於色魏永安中隨叅朱天光入關討羣賊封高邑縣男周文臨夏州補帳內都督及平侯莫陳悅使荐入洛請事孝武授周文關西大行臺仍除荐直閣將軍時馮翊長公主嫠居孝武意欲歸諸周文乃令武衛元毗喻旨荐歸白周文又遣荐入洛陽

請之孝武卽許焉孝武欲向關中荐贊成其計孝武曰
卿歸語行臺迎我周文又遣荐與長史宇文測出關候
接孝武至長安進爵清水縣子大統元年蠕蠕請和親
周文遣荐與楊寬使並結婚而還進爵爲侯又使荐納
幣於蠕蠕魏文帝郁久闔后崩周文遣僕射趙善使蠕
蠕更請婚善至夏州聞蠕蠕貳於東魏欲執使者善懼
乃還周文乃使荐往賜黃金十斤雜綵三百匹荐至蠕
蠕責其背惠食言並論結婚之意蠕蠕感悟乃遣使隨
荐報命焉及侯景來附周文令荐助鎮遏荐知景讎復
遂求還具陳事實周文乃遣使密追助景之兵尋而景

叛十六年大軍東討周文恐蠕蠕乘虛寇掠乃遣荐往更論和好以安慰之進使持節驃騎大將軍開府儀同三司加侍中周孝閔帝踐阼除御伯大夫進爵姚谷縣公仍使突厥結婚突厥可汗弟地頭可汗阿使郝庫頭居東面與齊通和說其兄欲背先約計謀已定將以荐等送齊荐知其意乃正色責之辭氣慷慨涕泗橫流可汗慘然良久曰幸無所疑當共平東賊然後發遣我女乃令荐先報命仍請東討以奉使稱旨遷大將軍保定四年又納弊於突厥還行小司馬又行大司徒從陳公純等逆女於突厥進爵南安郡公天和三年遷總管梁

州刺史後以疾卒

王慶字興慶太原祁人也父因魏靈州刺史懷德縣公慶少開悟有才略初從周文征伐復弘農破沙苑並有戰功每獲殊賞大統十年授殿中將軍周孝閔帝踐阼晉公護引爲典籤慶樞機明辯漸見親待授大都督武成元年以前後功賜爵始安縣男二年行小賓部保定二年使吐谷渾與其分疆仍論和好之事渾主悅服遣所親隨慶貢獻初突厥與周和親許納女爲后而齊人知之懼成合從之勢亦遣使求婚財饋甚厚突厥貪其重賂便許之朝議以魏氏昔與蠕蠕結婚遂爲齊人離

貳今者復恐改變欲遣使結之遂授慶左武伯副楊荐
爲使是歲遂興入并之役慶乃引突厥騎與隋公楊忠
至太原而還及齊人許送皇姑及世母朝廷遂與通和
突厥聞之復致疑阻於是又遣慶往諭之可汗感悅結
好如初五年復與宇文貴使突厥逆女自此以慶信著
北蕃頻歲出使後更至突厥屬其可汗暴殂突厥謂慶
曰前後使來逢我國喪者皆務面表哀况今二國和親
豈得不行此事慶抗辭不從突厥見其守正卒不敢逼
武帝聞而嘉之錄慶前後使功遷開府儀同三司兵部
中大夫進爵爲公歷丹中二州刺史爲政嚴肅吏不敢

鎮諸軍事汾州刺史又除延州總管進位柱國開皇元年進爵平昌郡公卒于鎮贈上柱國諡曰莊子淹嗣

趙剛字僧慶河南洛陽人也祖寧魏高平太守父和太平中陵江將軍南討度淮聞父喪輒還所司將致之於法和曰罔極之恩終天莫報若許安厝禮畢而卽罪戮死且無恨言訖號慟悲感傍人主司以聞遂宥之喪畢除寧遠將軍大統初追贈膠州刺史剛少機辯有幹能起家奉朝請累遷金紫光祿大夫領司徒府從事中郎加閣內都督及孝武與齊神武構隙剛密奉旨召東荆

州刺史馮景昭未及發而神武已逼洛陽孝武西遷景
昭集府僚文武議其去就司馬馮道和請據州待北方
處分剛抽刀投地曰公若爲忠臣可斬道和如欲從賊
可見殺景昭感悟遂率衆赴關右屬侯景逼穰城東荆
州人楊歡等起兵應景以其衆邀景昭於路景昭戰敗
剛遂沒於蠻後自贖免乃見東魏東荆州刺史李魔憐
勸令歸關西魔憐納之使剛至并州密觀事勢神武引
剛內宴因令剛賫書申勅荆州剛還報魔憐仍說魔憐
斬楊歡等以州歸西魔憐乃使剛入朝大統初剛於灊
上見周文具陳關東情實周文嘉之封陽邑縣子論復

東荊州功進爵臨汝縣伯初賀拔勝獨孤信以孝武西遷之後並流寓江左至是剛言於魏帝帝請追而復之乃以剛爲兼給事黃門侍郎使梁魏興賁移書與其梁州刺史杜懷瑤等卽與剛盟歆受移送建康仍遣人隨剛報命是年又詔剛使三荆聽在所便宜從事使還稱旨進爵武成縣侯除大丞相府帳內都督復使魏興重申前命尋而梁人禮送賀拔勝獨孤信等頃之御史中尉董紹進策請圖梁漢以紹爲行臺梁州刺史剛以爲不可而朝議已決遂出軍紹竟無功還免爲庶人除剛潁州郡守高仲密以北豫州來附兼大行臺左丞持節

赴潁川節度義軍師還剛別破侯景前驅於南陸復獲其郡守二人時有流言傳剛東叛神武因設反間聲遣迎接剛乃率騎襲其丁塢拔之周文知剛無貳乃加賚焉除營州刺史進爵爲公渭州人鄭五醜構逆與叛羗傍乞鐵忽相應令剛往鎮之將發魏文帝引見內寢舉觴屬剛曰昔侯景在東爲卿所困黠羗小醜豈足勞卿謀慮也時五醜已尅定夷鎮所在立柵剛至並攻破之散其黨與五醜於是西奔鐵忽剛又進破鐵忽僞廣寧郡守宇文貴等西討詔以剛行渭州事資給糧餼加驃騎大將軍開府儀同三司入爲光祿卿六官建拜膳部

中大夫周孝閔帝踐阼進爵浮陽郡公出爲利州總管沙州氏恃險逆命剛再討復之方州生獠自此始從賦役剛以信州濱江負阻乃表請討之詔剛率利沙等十四州兵往經略焉仍加授渠州刺史剛初至渠帥憚其軍威相次降款剛師出踰年士卒疲弊尋復亡叛後遂以無功而還又與所部儀同尹才失和被徵赴闕遇疾卒於路贈中浙涿三州刺史諡曰成子元卿弟仲卿仲卿性麤暴有旅力周齊王憲甚禮之以軍功位上儀同爲畿伯中大夫後以平王謙功進位大將軍封長垣縣公隋文帝受禪進河北郡公尋拜石州刺史法令嚴

猛纖介之失無所寬捨鞭笞輒至二百吏人戰慄無敢
違犯盜賊屏息皆稱其能遷朔州總管時塞北盛興屯
田仲卿總統之微有不理者仲卿輒召主掌撻其胸背
或解衣倒曳於荆棘中時人謂之於菟事多克濟由是
收穫歲廣邊戍無餽運之憂會突厥啓人可汗求婚上
許之仲卿因是間其骨肉遂相攻擊十七年啓人窘迫
與隋使長孫晟投通漢鎮仲卿率騎千餘援之達頭不
敢逼潛遣人誘致啓人所部至者二萬餘家其年從高
潁指白道以擊達頭仲卿爲前鋒至族蠡山與虜遇交
戰七日大破之追奔至乞伏泊復啓人突厥悉衆而至

仲卿爲方陣四面拒戰經五日會高潁大兵至合擊之虜乃敗走追度白道踰秦山七百餘里時突厥降者萬餘家上令仲卿處之恒安以功進上柱國朝廷慮達頭掩襲啓人令仲卿屯兵二萬以備之代州總管韓洪永康公李藥王蔚州刺史劉隆等將步騎一萬鎮恒安達頭來寇韓洪軍大敗仲卿自樂寧鎮邀擊斬千餘級明年督役築金河定襄二城以居啓人時有上表言仲卿酷暴上命御史王偉按之並實惜其功不罪因勞之曰知公清正爲下所惡賜物五百段仲卿益恣由是免官仁壽初檢校司農卿蜀王秀之得罪奉詔往益州按之

秀賓客經過處仲卿必深文致法州縣長吏坐者太半
上以爲能賞奴婢三十口黃金二百兩米粟五千石奇
瑤雜物稱是煬帝嗣位判兵部工部二尚書事卒官諡
曰肅子世弘嗣

趙昶字長舒天水南安人也曾祖襄仕魏至中山郡守
因家於代焉昶少聰敏有志節弱冠以材力聞魏北中
郎將高于鎮陝以昶爲長史中軍都督周文平弘農擢
爲相府典籤大統九年大軍失律於芒山清水氏酋李
鼠仁自軍逃還憑險作亂周文將討之先求可使者遂
令昶使焉見鼠仁喻以禍福羣酋或從或不從其命者

復將加刃於昶而昶神色自若志氣彌厲鼠仁感悟遂相率降氏梁道顯叛攻南田周文復遣昶慰喻之道顯等皆卽款附東秦州刺史魏光因徙其豪帥三十餘人并部落於華州周文卽以昶爲都督領之先是汾州胡叛再遣昶慰勞之皆知其虛實及大軍往討昶爲先驅遂破之以功封章武縣伯十五年拜安夷郡守帶長蛇鎮將氏俗荒獷昶威懷以禮莫不悅服期歲之後樂從軍者千餘人加授帥都督時屬軍機科發切急氏情難支復相率謀叛昶又潛遣誘說離間其情因其攜貳遂輕往臨之羣氏不知所爲咸來見昶乃收其首逆者二

十餘人斬之餘衆遂定朝廷嘉之除大都督行南秦州
事時氏帥蓋鬧等反昶復討禽之又與史寧破宕昌羗
獠二十餘萬拜武州刺史恭帝初加驃騎大將軍開府
儀同三司潭水羗叛殺武陵潭水二郡守昶率儀同駱
天人等討平之周明帝初鳳州人仇周貢魏興等反自
號周公破廣化郡攻沒諸縣分兵西入圍廣業脩城二
郡廣業郡守薛爽脩城郡守杜果等請昶爲援遣使報
果爲周貢黨樊伏興等所獲興等知昶將至解脩城圍
據泥功嶺設六伏以待昶昶至遂遇其伏合戰破之廣
業之圍亦解昶追之至泥陽川而還興州人段吒及氏

會羌多復反攻昶郡縣昶討斬之昶自以被拔擢居將帥之任傾心下士虜獲氏羌撫而使之皆爲昶盡力周文常曰不煩國家士馬而能威服氏羌者趙昶有之矣至是明帝錄前後功進爵長道郡公賜姓宇文氏賞勞甚厚二年徵拜賓部中大夫行吏部尋以疾卒

王悅字衆喜京兆藍田人也少有氣幹爲州里所稱周文初定關隴悅率募鄉里從軍屢有戰功大統元年除相府刑獄參軍封藍田縣伯四年東魏將侯景攻圍洛陽周文赴援悅又率鄉里千餘人從軍至洛陽將戰之夕悅罄其行資市牛饗戰士悅所部盡力斬獲居多遷

大行臺右丞轉左丞久居管轄頗獲時譽三年侯景據河南來附仍請兵爲援周文先遣韋法保賀蘭願德等帥衆助之悅言於周文曰侯景之於高歡始則篤鄉黨之情末乃定君臣之契位居上將職重台司論其分義有同魚水今歡始死景便離貳豈不知君臣之道有違忠義之禮不足蓋其圖旣大不卹小嫌然尚能背德於高氏豈肯盡節於朝廷今若益之以勢援之以兵非唯侯景不爲池中之物亦恐朝廷貽笑將來也周文納之乃遣追法保等而景尋叛後拜京兆郡守散騎常侍遷大行臺尚書從達奚武征梁漢軍出武令悅說其城主

楊賢悅乃貽之書賢於是遂降悅又白武云白馬衝要
是必爭之地今城守寡弱易可圖也若蜀兵更至攻之
實難武然之卽令悅率輕騎徑趣白馬悅示其禍福梁
將深悟遂以城降時梁武陵王蕭紀果遣其將任珍奇
欲先據白馬行次關城聞其已降乃遠及梁州平周文
卽以悅行刺史事招攜初附人吏安之廢帝二年徵還
本任屬改行臺爲中外府尚書員廢悅以儀同領兵還
鄉里悅旣久居顯職及此之還私懷怏怏猶陵駕鄉里
失於宗黨之情其長子康恃悅舊望遂自驕縱所部軍
人將有婚禮康乃非理陵辱軍人訴之悅及康並坐除

名仍配遠防及于謹伐江陵令悅從軍展効江陵平因
留鎮之周孝閔帝踐阼依例復官授郢州刺史尋拜使
持節驃騎大將軍開府儀同三司大都督司水中大夫
進爵藍田縣侯俄遷司憲中大夫賜姓宇文氏又進爵
河北縣公往險約不營生業雖出內榮顯家徒四壁而
已明帝手敕勞勉之保定元年卒於位子康嗣官至司
邑下大夫

趙文表其先天水西人也後徙居南鄭累世爲二千石
父珏性方嚴有度量位闕伯中大夫封昌國縣伯贈虞

絳二州刺史謚曰貞文表少而脩謹志存忠節起家爲

周文親信累遷左金紫光祿大夫保定五年授畿伯下大夫遷許國公宇文貴府長史尋拜車騎大將軍儀同三司仍從貴使突厥迎皇后進止儀注皆令文表典之文表斟酌而行皆合禮度及皇后將入境突厥託以馬瘦徐行文表慮其爲變遂說突厥使羅莫緣曰后自發彼蕃已淹時序途經沙漠人馬疲勞且東寇每伺間隙吐谷渾亦能爲變今君以可汗愛女結姻上國會無防慮豈人臣之體乎莫緣然之遂倍道兼行數日至甘州以迎后功別封伯陽縣伯天和三年除梁州總管府長史所管地名恒稜者方數百里並夷獠所居恃其險固

常懷不軌文表率衆討平之遷蓬州刺史政尚仁恕夷獠懷之加驃騎大將軍開府儀同三司又加大將軍進爵爲公大象中拜吳州總管時開府毛顓爲吳州刺史及隋文帝執政尉遲迥等舉兵遠近騷然人懷異望顓自以秩大且爲國家肺腑懼文表負已謀欲先之乃稱疾不出文表往問之顓遂手刃文表因令其吏人告云文表謀反仍馳啓其狀帝以諸方未定恐顓爲變遂授顓吳州總管以安之後知文表無異志雖不罪顓而聽其子仁海襲爵

元定字願安河南洛陽人也祖比魏婺州刺史父道龍

鉅鹿郡守定惇厚少言內沈審而外剛毅從周文討侯
莫陳悅以功拜步兵校尉孝武西遷封高邑縣男定有
勇略累從征伐每戰必陷陣然未嘗自言其功周文深
重之諸將亦稱其長者累加驃騎大將軍開府儀同三
司進爵爲公廢帝二年以宗室進封建城郡王三年行
周禮爵隨例降改封長湖郡公周明帝初拜岷州刺史
威恩兼濟甚得羗豪之情先時生羗據險不賓者至並
出山谷從征賦焉及定代還羗豪等咸戀慕之保定中
授左宮伯中大夫久之轉左武伯中大夫進位大將軍
天和二年陳湘州刺史華皎舉州歸梁梁王欲因其隙

更圖攻取乃遣使請兵詔定從衛公直率衆赴之梁人與華皎皆爲水軍定爲陸軍直總督之俱至夏口而陳郢州堅守不下直令定圍之陳遣其將淳于量徐度吳明徹等水陸來拒皎爲陳人所敗直得脫身歸梁定旣孤軍縣隔進退無路陳人乘勝水陸逼之定乃率所部斫竹開路且戰欲趣湘州而湘州已陷徐度等知定窮迫遣使僞與定通和重爲盟誓許放還國定疑其詭詐欲力戰死之而定長史長孫隆及諸將等多勸定和定乃許之於是與度等刑牲歃血解仗就船爲度所執所部衆軍亦被囚虜送詣丹陽居數月憂憤發病卒子樂

楊擲字顯進正平高涼人也祖貴父猛並爲縣令擲少
豪俠有志氣魏孝昌中尔朱榮殺害朝士大司馬城陽
王元徽逃難投擲擲藏而免之孝莊帝立徽乃出復爲
司馬由是擲以義烈聞擢拜伏波將軍給事中元顥入
洛孝莊北度大行及尔朱榮奉帝南討至馬渚擲乃具
船以濟王師顥平封肥如縣伯加鎮遠將軍步兵校尉
行濟北郡事進都督平東將軍大中大夫從孝武入關
進爵爲侯加撫軍將軍銀青光祿大夫時東魏遷鄴周
文欲知其所爲乃遣擲間行詣鄴以觀察之使還稱旨
授通直散騎常侍車騎將軍稽胡恃險不賓屢行鈔竊

以擿兼黃門侍郎往慰撫之擿頗有權略能得邊情誘化酋渠多來款附乃有隨擿入朝者時弘農爲東魏守擿從周文攻拔之然自河以北猶附東魏擿父猛先爲邵郡白水令擿與其豪右相知請微行詣邵郡舉兵以應朝廷周文許之擿遂行與土豪王覆憐等陰謀舉事密相應會內外俱發遂拔郡禽守程保及縣令四人並斬之衆議推擿行郡事擿以因覆憐成事遂表覆憐爲邵郡守以功授大行臺左丞仍率義徒更爲經略於是遣諜人誘說東魏城堡旬月之間正平河北南汾二絳建州大寧等諸城並有請爲內應者大軍因攻而拔之

以擿行正平郡事左丞如故齊神武敗於沙苑其將韓軌潘樂可朱渾元等爲殿擿分兵要截殺傷甚衆東雍州刺史司馬恭懼擿威聲棄城遁走擿遂移據東雍州周文以擿有謀略堪委邊任乃表行建州事時建州遠在敵境然擿威恩夙著所經之處多羸糧附之比至建州衆已一萬東魏州刺史車折於洛出兵逆戰擿擊敗之又破其行臺斛律俱於州西大獲甲杖及軍資以給義士由是威名大振東魏遣太保尉景攻陷正平復遣行臺薛脩義與斛律俱相會於是敵衆漸盛擿以孤軍無援且腹背受敵謀欲拔還復恐義徒背叛遂僞爲周

文書遣人若從外送來者云已遣軍四道赴援因令人
泄使所在知之又分土人義酋令各領所部四出抄掠
擬供軍費榷分遣訖遂於夜中拔還邵郡朝廷嘉其權
以全軍卽授建州刺史時東魏以正平爲東雍州遣薛
榮祖鎮之乃先遣奇兵急攻汾橋榮祖果盡出城中戰
士於汾橋拒守其夜榷從他道濟遂襲剋之進驃騎將
軍邵郡人以郡東叛郡守郭武安脫身走免榷又率兵
攻而復之轉正平郡守又擊破東魏南絳郡虜其郡守
屈僧珍錄前後功封邵陽縣伯芒山之戰榷攻拔柏谷
搗因卽鎮之及大軍不利榷亦拔還而東魏將侯景率

騎追榭榭與儀同韋法保同心抗禦且戰且前景乃引退周文嘉之復授建州刺史鎮車箱榭久從軍役未及葬父至是表請遷葬詔贈其父車騎大將軍儀同三司晉州刺史贈其母夏陽縣君並給儀衛州里榮之及齊神武圍玉壁別令侯景趣齊子嶺榭恐入寇邵郡率騎禦之景遠聞榭至斫木斷路者六十餘里猶驚而不安遂退還河陽其見憚如此十二年進授大都督加晉建二州諸軍事又攻破蓼塢獲東魏將李顯進儀同三司尋加開府復鎮邵郡十六年大軍東討授大行臺尚書率義衆先驅敵境攻其四戍拔之時以齊軍不出乃追

擿還改封華陽縣侯又於邵郡置邵州以擿爲刺史率所部兵鎮之保定四年遷少師其年大軍圍洛陽詔擿出軹闕然擿自鎮東境二十餘年數與齊人戰每常克獲以此遂有輕敵之心時洛陽未下而擿深入敵境又不設備齊人奄至大破擿軍擿以衆敗遂降於齊擿之立勲也有慷慨壯烈之志及軍敗遂就虜以求苟免時論以此鄙之朝廷猶錄其功不以爲罪令其子襲爵論曰申徽局量深沉文之以經史陸通鑒悟明敏飾之以溫恭並夙奉龍顏早蒙任遇效宣提戟功預披荆義結周旋恩生契濶遂得入居端揆出撫列藩雖以識用

成名抑亦情兼惟舊陸逞於戎旅之際以文雅見知出境播延譽之能莅官著從政之美歷居顯要豈徒然哉庫狄峙建和戎之功楊荐成入關之策趙剛之克剪凶狡趙昶之懷服氏羌王悅之料侯景文表之譎突厥或明稱先覺或識表見機觀其立功立事皆一時志力之士也元定敗亡同黃權之無路楊榘攻勝亦兵破而身囚功名寥落良可嗟矣易曰師出以律否臧凶傳曰不備不虞不可以師其榘之謂也

北史卷六十九考證

申徽傳案牘無大小皆親自省覽○大監本訛太今改正

陸通傳遂逢寇難與政相失○政通之父也與監本訛明今改從隋書

趙剛傳剛密奉旨召東荊州刺史馮景昭○召監本訛石今改從南本

仲卿傳仲卿必深文致法○監本缺卿字今從南本增入

趙昶傳喻以禍福羣酋或從或不從其命者復將加刃

於昶○曾監本訛酉今從南本改正

五悅傳始則篤鄉黨之情末乃定君臣之契○末監本
訛未今改從南本

史臣論出境播延譽之能莅官著從政之美○官監本
訛宮今改從南本

北史卷六十九考證

北史卷七十

唐

李

延

壽

撰

列傳第五十八

韓襄

趙肅

子軌

張軌

李彥

郭彥

梁昕

皇甫璠

子誕

辛慶之

族子昂

王子直

杜杲

呂思禮

徐招

檀翥

孟信

宗懍

劉璠

子祥

兄子行本

柳遐

子靖

莊

韓襄字弘業潁川潁陽人也祖瓌魏平涼郡守安定郡公父演恒州刺史襄少有志尙好學而不守章句其師

恠問之對曰文字之間常奉訓誘至於商較異同請從所好師因此奇之及長涉獵經史深沉有遠畧屬魏室喪亂避地夏州時周文帝爲刺史素聞其名待以客禮及賀拔岳爲侯莫陳悅所害諸將遣使迎周文周文問以去留之計襄曰此天授也何可疑乎周文納焉及爲丞相引爲錄事參軍賜姓侯呂陵氏大統初遷行臺左丞賜爵三水縣伯丞相府從事中郎出鎮浙鄜居二年徵拜丞相府司馬進爵爲侯出爲北雍州刺史州帶北山多有盜賊襄密訪之並豪右所爲也而陽不之知厚加禮遇謂曰刺史起自書生安知督盜所賴卿等共分

其憂耳乃悉召傑黠少年素爲鄉里患者置爲主帥分其地界有盜發而不獲者以故縱論於是諸被署者莫不惶懼皆首伏曰前盜發者並某等爲之所有徒侶皆列其姓名或亡命隱匿者亦悉言其所在褒乃取盜名簿藏之因大榜州門曰自知行盜者可急來首卽除其罪盡今月不首者顯戮其身籍沒妻子以賞前首者旬日之間諸盜咸悉首盡褒取名簿勘之一無差異並原其罪許以自新由是羣盜屏息入爲給事黃門侍郎遷侍中除都督西涼州刺史羌胡之俗輕貧弱尙豪富豪富之家侵漁百姓同於僕隸故貧者日削豪者益富褒

乃悉募貧人以充兵士優復其家蠲免徭賦又調富人財物以振給之每西域商貨至又先盡貧者市之於是貧富漸均戶口殷實廢帝元年爲會州刺史後以驃騎大將軍開府儀同三司進爵爲公累遷汾州刺史先是齊寇數入人廢耕桑前後刺史莫能防扞褒至適會寇來乃不下屬縣人既不備以故多被抄掠齊人喜於不覺以爲州先未集兵今還必不能追躡由是益懈不爲營壘褒已先勒精銳伏北山中分據險阻邀其歸路乘其衆怠縱伏擊之盡復其衆故事獲生口者並送京師褒因是奏曰所獲賊衆不足爲多俘而辱之但益其忿

耳請一切放還以德報怨有詔許焉自此抄兵頗息遷
河州總管仍轉鳳州刺史尋以年老請致事詔許之天
和五年拜少保襲歷事三帝以忠厚見知武帝深相敬
重常以師道處之每入朝見必有詔令坐然始論政事
卒贈涇岐燕三州刺史諡曰貞子繼伯嗣仕隋位終衛
尉少卿

趙肅字慶雍河南洛陽人也世仕河西及沮渠氏滅曾
祖武始歸於魏賜爵金城侯祖興中書博士父申侯舉
秀才爲後軍府主簿肅早有操行知名於時孝昌中起
家殿中侍御史累遷左將軍大中大夫東魏天平初除

新安郡守秩滿還洛陽大統三年獨孤信東討肅率宗人爲鄉導授司州別駕監督糧儲軍用不匱周文帝聞之謂人曰趙肅可謂洛陽主人也九年行華山郡事十三年除廷尉卿明年元日當行朝禮非有封爵者不得預焉肅時未有茅土左僕射長孫儉啓周文請之周文乃召肅謂曰歲初行禮豈得使卿不預然何爲不早言也於是令肅自選封名肅曰河清乃太平之應竊所願也於是封清河縣子十六年除廷尉卿加征東將軍肅久在理官執心平允凡所處斷咸得其情廉慎自居不營產業時人以此稱之十七年進位車騎大將軍儀同

三司散騎常侍賜姓乙弗氏先是周文命肅撰法律肅積思累年遂感心疾去職卒家子軌

軌少好學有行檢周蔡王引爲記室以清苦聞隋文帝受禪爲齊州別駕有能名其東鄰有桑葢落其家軌遣人悉拾還其主戒其諸子曰吾非以此求名意者非機杼物不願侵人汝等宜以爲戒在州考績連最持節使者郃陽公梁子恭上狀文帝賜以米帛甚優令入朝父老將送者各揮涕曰別駕在官水火不與百姓交是以不敢以盃酒相送公清如水請酌一盃水奉餞軌受飲之至京詔與牛弘撰定律令格式時衛王爽爲原州總

管名爲司馬在道夜行其左右馬逸入田中暴人禾軌
駐馬待明訪知禾主酬直而去原州人吏聞之莫不改
操後檢校陝州刺史甚有恩惠轉壽州總管長史芍陂
舊有五門堰蕪穢不通軌勸課吏人更開三十六門灌
田五千餘頃人賴其利秩滿歸卒于家子弘安弘智並
知名

張軌字元軌濟北臨邑人也父崇高平令軌少好學志
識開朗初在洛陽家貧與大安孫樹仁爲莫逆之交每
易衣而出以此見稱軌常謂所親曰奉雍之間必有王
者爾朱榮敗後遂杖策入朝賀拔恒以軌爲記室參軍

典機密尋轉倉曹時穀糴踊貴或有請貸官倉者軌曰以私害公非吾宿志濟人之難詎得相忘遂賣所服衣物糴粟以振其乏及岳被害周文帝以軌爲都督從征侯莫陳悅悅平使於洛陽見領軍斛斯椿椿曰高歡逆謀已傳行路人情西望以日爲年未知宇文何如賀拔也軌曰宇文公文足經國武足定亂至於高識遠度非愚管所測椿曰誠如卿言真可恃也周文爲行臺授軌郎中孝武西遷除中書舍人封壽張縣子兼著作佐郎修起居注遷給事黃門侍郎兼吏部郎中出爲河北郡守在郡三年聲績甚著臨人政術有循吏之美大統間

言宰人者多推尙之入爲丞相府從事中郎行武功郡事章武公導出鎮秦州以軌爲長史廢帝元年進車騎大將軍儀同三司散騎常侍二年賜姓宇文氏行南秦州事恭帝二年徵拜度支尙書復除隴右府長史卒於位諡曰質軌性清素臨終之日家無餘財唯有書數百卷子肅周明帝初爲宣納上士轉中外府記室參軍中山公訓侍讀早有才名性頗輕猾時人比之魏諷卒以罪考竟終

李彥字彥士梁郡下邑人也祖光之魏淮南郡守父靜南青州刺史彥少有節操好學慕古孝建中解褐奉朝

請孝武入關兼著作佐郎修起居注大統初除通直散
騎侍郎累遷左戶郎中十二年省三十六曹爲十二部
改授戶部郎中封平陽縣子廢帝初拜尙書右丞轉左
丞彥在尙書十有五載屬軍國草創庶務殷繁留心省
閣未嘗懈怠斷決如流畧無疑滯臺閣莫不歎其公勤
服其明察遷給事黃門侍郎仍左丞賜姓宇文氏出爲
鄜州刺史彥以東夏未平固辭州任詔許之拜兵部尙
書加驃騎大將軍開府儀同三司仍兼著作六官建改
授軍司馬進爵爲伯彥性謙恭有禮節雖居顯要於親
黨之間恂恂如也輕財重義好施愛士時論以此稱之

然素多疾而勤於莅職雖沈頓枕席猶理務不輟遂至
於卒諡曰敬彥臨終遺誠其子等曰昔人以窾木爲櫛
葛纍爲緘下不亂泉上不泄臭實吾平生之志也但事
旣矯枉恐爲世士所譏今可斂以時服葬於磽确之地
勿用明器芻塗及儀衛等爾其念哉朝廷嘉焉不奪其
志子昇明嗣少歷顯職大象末太府中大夫儀同大將
軍仕隋終於齊州刺史子仁政長安縣長義軍至以罪
誅

郭彥太原陽曲人也其先從宦關右遂居馮翊父胤靈
武令彥少知名周文帝臨雍州辟爲西曹書佐累遷虞

部郎中大統十二年初選當州首望統領鄉兵除帥都督以居郎官著稱封龍門縣子進大都督恭帝元年除兵部尚書仍以本兵從柱國于謹南伐江陵進驃騎大將軍開府儀同三司進爵爲伯六官建拜戶部中大夫周孝閔帝踐祚出爲澧州刺史蠻左生梗不營農業彥勸以耕稼人皆務本亡命之徒咸從賦役先是以澧州糧儲乏少每令荊州遞送自彥莅職倉庾充實無轉輸之勞齊南安城主馮顯密遣使歸降其衆未之知也柱國宇文貴令彥率兵應接時齊人先令顯率所部送糧南下彥懼其衆不從命乃於路邀之顯因得自拔其衆

果拒戰彥縱兵奮擊並虜獲之以南安無備卽引軍掩襲遂有其城晉公護嘉之進爵懷德縣公入爲工部中大夫保定四年晉公護東討彥從尉遲迥攻洛陽迥復令彥與權景宣出汝南及軍次豫州使彥鎮之天和中爲隴右府總管府長史卒於官贈少司空宜鄜丹三州刺史

梁昕字元明安定烏氏人也世爲關中著姓其先因官徙居京兆之盤屋祖重耳漳縣令父勸儒中散大夫贈涇州刺史昕少溫恭見稱州里從爾朱天光征討拜右將軍太中大夫周文帝迎魏孝武軍次雍州昕以三輔

望族上謁周文見昕容貌瓌偉深賞異之卽授右府長流參軍累遷丞相府主簿大統十二年除河南郡守遷東荊州刺史昕撫以仁惠蠻夷悅之封安定縣子周孝閔帝踐祚進位驃騎大將軍開府儀同三司明帝初進爵胡城縣伯天和初拜工部中大夫出爲陝州總管府長史昕性溫裕有幹能歷官內外咸著聲稱尋卒官贈大將軍諡曰貞昕弟榮位計部下大夫開府儀同三司朝那縣伯贈涇寧幽三州刺史諡曰靜子獻仕隋爲給事郎貞觀中終於鄭州刺史

皇甫璠字景瑜安定三水人也世爲西州著姓後徙居

京兆父和本州中從事大統末追贈散騎常侍儀同三
司涇州刺史璠少忠謹有幹畧永安中辟州都督周文
帝爲牧補主簿以勤事被知大統四年引爲丞相府行
參軍周孝閔帝踐祚爲守廟下大夫長樂縣子保定中
爲鴻州刺史入爲小納言累遷蕃部中大夫進驃騎大
將軍開府儀同三司璠性平和小心奉法安貞守志恒
以清白自處當時稱爲善人建德三年爲隨州刺史政
存簡惠百姓安之卒官贈交渭二州刺史諡曰恭子諒
少知名大象中位吏部下大夫諒弟誕

誕字玄慮少剛毅有器局開皇中累遷治書侍御史朝

臣無不肅憚焉後爲尚書左丞時漢王諒爲并州總管
朝廷盛選寮佐拜誕并州總管司馬總府政事一以諮
之諒甚敬焉及煬帝卽位諒用諮議王頰謀發兵作亂
誕數諫止諒不納誕因流涕以死固請諒怒囚之及楊
素將至諒屯清涼以拒之諒主簿豆盧毓出誕於獄協
謀閉城拒諒襲擊破之並抗節遇害帝以誕亡身殉國
嘉悼者久之詔贈柱國封弘義公諡曰明子無逸嗣尋
爲清陽太守甚有聲稱大業初令行舊爵例除以無逸
誠義之後賜爵平輿侯入爲刑部侍郎守右武衛將軍
初漢王諒之反州縣莫不響應有嵐州司馬陶世模繁

時令敬釗並抗節不從世模京兆人性明敏有器幹仁壽初爲嵐州司馬諒反刺史喬鍾葵將赴之世模以義拒之臨之以兵辭氣不撓鍾葵義而釋之軍吏請斬之於是被囚及諒平拜開府授大興令從衛玄擊楊玄感以功進位銀青光祿大夫釗字積善河東蒲坂人父元約周布憲中大夫釗仁壽中爲繁時令甚有能名漢王諒反師陷其城賊帥墨弼執送僞將喬鍾葵署爲代州總管司馬釗正色拒之誓之以死會鍾葵敗釗遂免卒於朝邑令

辛慶之字餘慶隴西狄道人也世爲隴右著姓父顯宗

馮翊郡守贈雍州刺史慶之少以文學徵詣洛陽對策
第一除祕書郎屬爾朱氏作亂魏孝莊帝令司空楊津
爲北道行臺節度山東諸軍以討之津啓慶之爲行臺
左丞與參謀議至鄴聞孝莊帝崩遂出覓冀間謀結義
徒以赴國難尋而節閔帝立乃還洛陽及賀拔岳爲行
臺復啓慶之爲行臺吏部郎大統初從周文帝東討爲
行臺左丞六年行河東郡事九年入爲丞相府右長史
兼給事黃門侍郎除度支尚書復行河東郡事遷南荆
州刺史加儀同三司慶之位遇雖隆而率性儉素車馬
衣服亦不尚華侈志量淹和有儒者風度特爲當時所

重又以其經明行修令與盧誕等教授諸王廢帝二年拜祕書監卒官子加陵主寢上士慶之族子昂

昂字進君數歲便有成人志行有善相人者謂其父仲畧曰公家雖世載冠冕然名德富貴莫有及此兒者仲畧亦重昂志氣深以爲然年十八侯景辟爲行臺郎中景後來附昂遂入朝除丞相府行參軍後追論歸朝勲封襄城縣男及尉遲迥伐蜀昂占募從軍蜀平迥表昂爲龍州長史領龍安郡事州帶山谷舊俗生梗昂威惠洽著吏人畏而愛之成都一方之會風俗舛雜迥以昂達於從政復表昂行成都令昂到縣便與諸生祭文翁

學堂因共歡宴謂諸生曰子孝臣忠師嚴友信立身之
要如斯而已若不事斯語何以成名各宜自勉克成令
譽昂言切理至諸生等並深感悟歸而告其父老曰辛
君教誡如此不可違之於是井邑肅然咸從其化遷梓
潼郡守六官建入爲司隸上士襲爵繁昌縣公保定二
年爲小吏部時益州殷阜軍國所資經塗艱險每苦劫
盜詔昂使於益梁軍人之務皆委決焉昂撫導荒梗頗
得寧靜天和初陸騰討信州蠻詔昂便於通渠等州運
糧饋之時臨信楚合等諸州人庶多從送昂諭以禍福
赴者如歸乃令老弱負糧壯夫拒戰莫有怨者使還屬

巴州萬榮郡人反叛圍郡城昂於是遂募通開二州得
三千人倍道兼行出其不意又令其衆皆作中國歌直
趣賊壘謂有大軍赴救望風瓦解朝廷嘉其權以濟事
詔梁州總管杞國公亮卽於軍中賞昂奴婢二十口繒
綵四百疋又以昂威信布於宕渠遂表爲渠州刺史轉
通州推誠布信甚得夷獠歡心秩滿還京首領皆隨昂
詣闕朝覲以昂化洽夷落進位驃騎大將軍開府儀同
三司時晉公護執政昂稍被護親待武帝頗銜之及誅
護加之捶楚因此遂卒昂族人仲景好學有雅量其高
祖欽後趙吏部尚書雍州刺史子孫因家焉父歡魏隴

州刺史朱陽公仲景年十八舉文學對策高第拜司空
府主簿建德中位內史下大夫開府儀同三司卒于家
子衡

王子直字孝正京兆杜陵人也世爲郡右族父琳州主
簿東雍州長史子直性節儉有幹能魏正光中州辟主
簿起家奉朝請永安初拜鴻臚少卿孝武西遷封山北
縣男大統初漢熾屠各阻兵於南山與隴東屠各共爲
唇齒周文帝令子直率涇州步騎五千討破之賜書勞
問除尚書左外兵郎中兼中書舍人從解洛陽圍經河
橋戰兼尚書左丞出爲秦州總管府司馬時涼州刺史

字文仲和據州逆命子直從隴右大都督獨孤信討平之復入爲大行臺郎中兼丞相府記室除太子中庶子領齊王友尋行馮翊郡事廢帝元年拜使持節大都督行瓜州事務以德政化人西土悅附恭帝初徵拜黃門侍郎卒官子宣禮柱國府參軍

杜杲字子暉京兆杜陵人也祖建魏輔國將軍贈蒙州刺史父皎儀同三司武都郡守杲學涉經史有當世幹畧其族父攢清貞有識鑒深器重之常曰吾家千里駒也攢時仕魏爲黃門侍郎兼度支尚書衛大將軍西道大行臺尚孝武妹新豐公主因薦之朝廷永熙三年起

家奉朝請周明帝初爲修城郡守屬鳳州人仇周貢等
構亂攻逼修城杲信洽於人部內遂無叛者尋率郡兵
與開府趙昶合勢並破平之入爲司會上士初陳文帝
弟安成王頊爲質於梁及江陵平頊隨例遷長安陳人
請之周文帝許而未遣至是帝欲歸之命杲使焉陳文
帝大悅卽遣使報聘并賂黔中數州地仍請畫野分疆
永敦隣好以杲奉使稱旨進授都督行小御伯更往分
界陳於是歸魯山郡帝乃拜頊柱國大將軍詔杲送之
還國陳文帝謂杲曰家弟今蒙禮遣實是周朝之惠然
不還魯山亦恐未能及此杲答曰安成之在關中乃咸

陽一布衣耳然是陳之介弟其價豈止一城本朝親睦九族恕已及物上遵太祖遺旨下思繼好之義所以發德音者蓋爲此也若知止侔魯山固當不貪一鎮況魯山梁之舊地梁卽本朝藩臣若以始末言之魯山自合歸國云以尋常之土易已骨肉之親使臣猶謂不可何以聞諸朝廷陳文帝慙恧久之乃曰前言戲之耳自是接遇有加常禮及還引升殿親降御座執手以別朝廷嘉之授大都督小載師下大夫行小納言復聘於陳及華皎來附詔令衛公直都督元定等援之定等并沒自是連兵不息東南搔動武帝授杲御正中大夫使陳論

保境息人之意陳宣帝遣其黃門侍郎徐陵謂杲曰兩國通好彼朝受我叛人何也杲曰陳主昔在本朝非慕義而至主上授以柱國位極人臣子女玉帛備禮將送今主社稷孰謂非恩郝烈之徒邊人狂狡曾未報德而先納之今受華氏正是相報過自彼始豈在本朝陵曰彼納華皎志圖吞噬此受郝烈容之而已且華皎方州列將竊邑叛亡郝烈一百許戶脫身逃竄大小有異豈得同年而語乎杲曰大小雖殊受降一也若論先後本朝無失陵曰周朝送主上還國旣以爲恩衛公共元定度江孰云非怨計恩與怨亦足相埒杲曰元定等軍敗

身囚其怨已滅陳主負宸馮玉其恩猶在且怨由彼國
思起本朝以怨酬恩未之聞也陵笑而不答杲因陳和
通之便陵具以聞陳宣許之遂遣使來聘建德初授司
城中大夫仍使於陳宣帝謂杲曰長湖公軍人等雖築
館處之然恐不能無北風之戀王褒庾信之徒旣羈旅
關中亦當有南枝之思耳杲揣陳宣意欲以元定軍將
士易王褒等乃答之曰長湖總戎失律臨難苟免旣不
死節安用此爲且猶牛之一毛何能損益本朝之議初
未及此陳宣帝乃止及杲還至石頭又遣謂之曰若欲
合從共圖齊氏能以樊鄧見與方可表信杲答曰合從

圖齊豈唯弊邑之利必須城鎮宜待得之於齊先索漢南使臣不敢聞命還除司倉中大夫又使於陳杲有辭辯閑於占對前後將命陳人不能屈陳宣帝甚敬異之時元定已卒乃禮送開府賀拔華及定棺柩杲受之以歸除河東郡守遷溫州刺史賜爵義興縣伯大象元年徵拜御正中大夫復使陳二年除申州刺史加開府儀同大將軍進爵爲侯除同州刺史隋開皇元年以杲爲同州總管進爵爲公俄遷工部尙書二年除西南道行臺兵部尙書尋以疾卒子運大象末宣納上士杲兄長暉位儀同三司

呂思禮東平壽張人也性溫潤不雜交遊年十四受學於徐遵明長於論難諸生爲之語曰講書論易鋒難敵十九舉秀才對策高第除湘州功曹參軍葛榮圍鄴思禮有守禦勲賜爵平陸縣伯除欒城令普泰中僕射司馬子如薦爲尙書二千石郎中尋以地寒被出兼國子博士乃求爲關西大行臺郎中與姚幼瑜茹文就俱入關爲行臺賀拔岳所重專掌機密甚得時譽岳爲侯莫陳悅所害趙貴等議遣赫連達迎周文帝思禮預其謀及周文爲關西大都督以思禮爲府長史尋除行臺右丞以迎魏孝武功封汶陽縣子加冠軍將軍拜黃門侍

郎文帝卽位領著作郎除安東將軍都官尙書兼七兵
殿中二曹事從禽竇泰進爵爲侯大統四年以謗訕朝
政賜死思禮好學有才雖務兼軍國而手不釋卷晝理
政事夜卽讀書令蒼頭執燭燭燼夜有數升沙苑之捷
命爲露布食頃便成周文歎其工而且速所爲碑誄表
頌並傳於世七年追贈車騎將軍定州刺史子亶嗣大
象中位至駕部下大夫時有博陵崔騰早有名譽歷職
清顯爲丞相府長史亦以投書謗議賜死

徐招字思賢高平鄉人也世爲著姓招少好法律及朝
廷舊事發言措筆常欲辯析秋毫初入洛陽雖未登仕

已爲時知朝廷疑事多預議焉延昌中從征浮山堰有功賜爵高廣男及廣陽王深北討鮮于修禮啓爲員外散騎侍郎深府長流參軍招陳策請離間之葛榮竟殺修理自爲魁帥以功進爵爲侯永安初射策甲科除員外散騎常侍領尚書儀曹郎中招少習吏事未能精究朝儀常恨才達恐名迹不立久之方轉二千石郎中爾朱榮死爾朱世隆屯兵河橋莊帝以招爲行臺左丞自武牢北度引馬場河內之衆以抗世隆後爾朱兆得招鎖送洛陽仲遠數招罪將斬之招曰不虧君命得死爲幸仲遠重之曰凡人受命理各爲主今若爲戮何以勸

人臣乃釋之用爲行臺右丞及仲遠南奔招獨還洛永
熙末從孝武入關中拜給事黃門侍郎兼尙書右丞時
朝廷播遷典章遺闕至於臺省法式皆招所記論者多
焉大統三年拜驃騎將軍侍中時文帝舅子王起化犯
罪死有詔追贈招執奏正之後卒於度支尙書子山雲

嗣

檀翥字鳳翔高平金鄉人也六世祖毓晉步兵校尉父
江始還北仕至太常少卿贈兗州刺史翥十歲喪父還
京師宅與營人雜居雖幼孤寒不與隣人來往好讀書
解屬文能鼓琴早爲琅邪王誦所知年十九以名家子

爲魏明帝挽郎後客遊三輔時毛遐爲行臺鎮北維表
翥爲行臺郎中莊帝旣誅丕朱榮遐使翥詣京師因除
著作佐郎郎中如故後孝武帝西幸除兼中書舍人修
國史大統初又兼著作佐郎以守關迎駕勲封高堂子
後坐談論輕躁爲黃門侍郎徐招所紕死於廷尉獄

孟信字脩仁廣川索盧人也家世貧寒頗傳學業信常
曰窮則變變則通吾家世傳儒學而未有通官當由儒
非世務也遂感激棄書從軍永業末除奉朝請從孝武
帝入關封東州子趙平太守政尙寬和權豪無犯山中
老人曾以狔酒饋之信和顏接引慙懃勞問乃自出酒

以鐵鑊温之素木盤盛蕪菁菹唯此而已又以一鑊借
老人但執一盃各自斟酌申酬酢之意謂老人曰吾至
郡來無人以一物見遺今卿獨有此餉且食菜已久欲
爲卿受一狔臠耳酒旣自有不能相費老人大悅再拜
擘狔進之酒盡方別及去官居貧無食唯有一老牛其
兄子賣之擬供薪米券契已訖市法應知牛主住在所
信適從外來見買牛人方知其賣也因告之曰此牛先
來有病小用便發君不須也杖其兄子二十買牛人嗟
異良久呼信曰孟公但見與牛未必須其力也苦請不
得乃罷買牛者周文帝帳下人周文深歎異焉未幾舉

爲太子少師後遷太子太傅儒者榮之特加車騎大將軍儀同三司散騎常侍辭老請退周文不奪其志賜車馬几杖衣服床帳卒於家贈冀州刺史諡曰戴子儒宗懷字元懷南陽涅陽人也八世祖承永嘉亂討陳敏有功封柴桑縣侯除宜都郡守卒官子孫因居江陵父高之梁山陰令懷少聰敏好讀書晝夜不倦語輒引古事鄉里呼爲小兒學士梁大同六年舉秀才以不及二宮元會例不對策及梁元帝鎮荊州謂長史劉之遴曰貴鄉多士爲舉一有意少年之遴以懷應命卽日引見令兼記室嘗夕被召宿省使製龍川廟碑一夜便就詰

朝呈上梁元帝歎美之後歷臨汝建城廣晉三縣令遭
母憂去職哭輒嘔血兩旬之內絕而復蘇者三每旦有
羣烏數千集于廬舍候哭而來哭止而去時論以爲孝
感所致梁元帝卽位擢爲尙書侍郎封信安縣侯累遷
吏部尙書懷父高之先爲南臺書侍御史犯憲懷願父
釋罪當終身菜食高之理雪故懷菜食鄉理稱之在元
帝府府中多言其矯至是大進魚肉國子祭酒沛國劉
毅讓之曰本知卿不忠猶謂卿孝今日便是忠孝並無
懷不能對懷博學有才藻口未嘗譽人朋友以此少之
初侯景平後梁元帝議還建鄴唯懷勸都渚官以鄉在

荊州故也及江陵平與王褒等入關周文帝以懷名重南土甚禮之周孝閔帝踐祚拜車騎大將軍儀同三司明帝卽位又與王褒等在麟趾刊定羣書數蒙宴賜保定中卒有集二十卷行於世

劉璠字寶義沛人也六世祖敏以永嘉亂徙居廣陵父臧性方正篤志好學居家以孝聞仕梁爲著作郎璠九歲而孤居喪合禮少好讀書兼善文筆十七爲上黃侯蕭曄所器重范陽張綰梁之外戚才高口辯見推於世以曄懿貴亦假借之璠年少未仕而負才使氣不爲之屈綰嘗於新渝侯宅因酒後詬京兆杜杲曰寒士不遜

璠厲色曰此坐誰非寒士璠本意在縮而曄以爲屬已
辭色不平璠曰何王之門不可曳長裾也遂拂衣而去
曄謝之乃止後隨曄在淮南璠母在建康邁疾璠弗之
知嘗忽一日舉身楚痛尋而家信至云其母病璠卽號
泣戒道絕而又蘇當身痛之辰卽母死之日居喪毀瘠
遂感風氣服闋後一年猶杖而後起及曄終於毗陵故
吏多分散璠獨奉曄喪還都墳成乃退梁簡文時東宮
遇曄素重諸不送者多被劾責唯璠獨被優賞解褐王
國常侍非好也璠少慷慨好功名志欲立事邊城不樂
隨牒平進會宜豐侯蕭脩出爲北徐州刺史卽請爲其

輕車府主簿兼記室參軍脩爲梁州又補爲中記室補華陽太守屬侯景度江梁室大亂脩以璠有才略甚親委之時寇難繁興未有所定璠乃喟然賦詩以見志其末章曰隨會平王室夷吾匡霸功虛薄無時用徒然慕昔風脩開府置佐史以璠爲諮議參軍仍領記室梁元帝承制授樹功將軍鎮西府諮議參軍賜書曰鄧禹文學尚或執戈葛洪書生且云破賊前脩無遠屬望良深元帝尋以脩紹鄱陽之封且爲雍州刺史復以璠爲脩平北府司馬及武陵王紀稱制於蜀以璠爲中書侍郎遣召璠使者八反乃至蜀又以爲黃門侍郎令長史劉

孝勝深布心腹使工畫陳平度河歸漢圖以遺之璠苦
求還中記室韋登私曰殿下忍而蓄憾足下不留將致
大禍脫使盜遮於葭萌則卿殆矣孰若共構大夏使身
名俱美哉璠正色曰卿欲緩頰於我邪我與府侯分義
已定豈以寵辱夷險易其心乎丈夫立志當死生以之
耳殿下方布大義於天下終不逞志於一人紀知不爲
已用乃厚贈而遣之臨別紀又解其佩刀贈璠曰想見
物思人璠曰敢不奉揚威靈剋翦姦宄紀於是遣使拜
脩爲益州刺史封隨郡王以璠爲府長史加蜀郡太守
遠至白馬西屬達奚武軍已至南鄭璠不得入城遂降

武周文帝素聞其名先戒武曰勿使劉璠死故武先令璠赴闕周文見之如舊謂僕射申徽曰劉璠佳士古人何以過之徽曰晉人滅吳利在二陸明公今平梁漢得劉璠也時南鄭尚拒守達奚武請屠之周文將許焉唯令全脩一家而已璠乃請之於朝周文怒而不許也璠泣而固請移時不退柳仲禮侍側曰此烈士也周文旣納蕭脩降又許其反國脩至長安累月未之遣也璠因侍宴周文曰我於古誰比曰常以公命世英主湯武莫逮今日所見曾是齊桓晉文之不若周文曰我不得比湯武望與伊周爲匹何桓文之不若乎對曰齊桓存三

亡國晉文不失信於伐原語未終周文撫掌曰我解爾
意欲激我耳卽命遣脩脩請與璠俱還周文不許以璠
爲中外府記室遷黃門侍郎儀同三司嘗臥疾居家對
雪興感乃作雪賦以遂志焉初蕭脩在漢中與蕭紀賤
及答西魏書移襄陽文皆璠辭也周明帝初授內史中
大夫掌綸誥尋封平陽縣子在職清白簡亮不合於時
左遷同和郡守璠善於撫御莅職未期生羌降附者五
百餘家前後郡守多經營以致貲產唯璠秋毫無所取
妻子並隨羌俗食麥衣皮始終不改洮陽洪和二郡羌
常越境詣璠訟理蔡公廣時鎮隴右嘉其善政及遷鎮

陝州欲啓璠自隨羌人樂從者七百人聞者莫不歎異
陳公純作鎮隴右引爲總管府司錄甚禮敬之卒於官
著梁典三十卷有集二十卷行於世子祥

祥字休徵幼聰慧賓客見者皆號神童事嫡母以至孝
聞其伯父黃門郎璆有名江左在嶺南聞而奇之乃令
名祥字休徵後以字行於世十歲能屬文十二通五經
仕梁爲宜豐侯記室參軍江陵平隨列入關中齊公憲
召爲記室府中書記皆令掌之封漢安縣子憲進爵爲
王以休徵爲王友俄除內史上士武帝東征休徵陪侍
帷幄平齊露布卽休徵文也累遷車騎大將軍儀同大

將軍歷長安萬年二縣令頗獲時譽卒於官初璠所撰
梁典始就未及刊定而卒臨終謂休徵曰能成我志其
在此書乎休徵脩定繕寫勒成一家行於世

行本璠兄子也父環仕梁歷職清顯行本起家梁武陵
王國常侍遇蕭脩以梁州北附遂與叔父璠歸周寓居
新豐每以諷讀爲事精力忘疲雖衣食之絕宴如也性
剛烈有不可奪之志周大象宰宇文護引爲中外府記
室武帝親總萬機轉御正中士兼領起居注累遷掌朝
下大夫周代故事天子臨軒掌朝典筆硯持至御坐則
承御大夫取進之及行本爲掌朝將進筆於帝承御復

欲取之行本抗聲曰筆不可得帝驚視問之行本曰臣聞設官分職各有司存臣旣不得佩承御刀承御亦焉得取臣筆帝曰然因令二司各行所職及宣帝嗣位多失德行本切諫忤旨出爲河內太守及尉遲迥作亂攻懷州行本率吏人拒之拜儀同賜爵文安縣子隋文帝踐祚拜諫議大夫檢校中書侍郎上嘗怒一郎於殿前笞之行本進曰此人素清其過又小上不顧行本正當上前曰陛下不以臣不肖令臣在左右臣言若是陛下安得不聽臣言若非當致之於理安得輕臣而不顧臣所言非私因置笏於地而退上斂容謝之遂原所笞者

時天下大同四夷內附行本以党項羌密邇封域最爲
後服上表劾其使者曰臣聞南蠻遵校尉之統西域仰
都護之威比見西羌鼠竊狗盜不父不子無君無臣異
類殊方於斯爲下不悟羈縻之惠詎知含養之恩狼戾
爲心獨乖正朔使人近至請付推科上奇其志雍州別
駕元肇言於上曰有一州吏受人饋錢二百文律令杖
一百然臣下車之始與其爲約此吏故違請加徒一年
行本駁之曰律令之行蓋發明詔今肇乃敢重其教命
輕忽憲章虧法取威非人臣之禮上嘉之賜絹百匹拜
太子左庶子領書侍御史如故皇太子虛襟敬憚時唐

令則爲左庶子太子昵狎之每令以弦歌教內人行本責之曰庶子當匡太子以正道何嬖昵房帷之間哉令則甚慙而不能改時沛國劉臻平原明克讓河南陸爽等並以文學爲太子所親行本怒其不能調護每謂三人曰卿等正解讀書耳時左衛率長史夏侯福爲太子所昵嘗於閣內與太子戲福大笑聲聞於外行本時在閣下聞之待其出數之曰汝何小人敢爲褻慢因付執法者推之太子爲請乃釋之太子嘗得良馬令福乘而觀之太子甚悅因欲令行本復乘行本正色曰至尊置臣於庶子位欲輔導殿下以正道非爲殿下作弄臣太

子慙而止復以本官領大興令權貴憚其方正無敢至其門者由是請託路絕吏人懷之未幾卒于官上甚傷惜之及太子廢上曰嗟乎若使劉行本在勇當不及此乎行本無子

柳遐字子昇河東解人宋太尉元景從孫也祖叔珍義陽內史事見南史父季遠梁宜都太守遐幼而爽邁神采嶷然髻歲便有成人之量篤好文學動合規矩其世父慶遠特器異之謂曰吾昔逮事伯父太尉公嘗謂吾云我昨夢汝登一樓甚峻麗吾以坐席與汝汝後名宦必達恨吾不及見耳吾向聊復晝寢又夢將昔時坐席

還以賜汝汝之官位當復及吾特宜免勵以應嘉祥也
梁西昌侯藻鎮雍州遐時年十二以百姓禮脩謁風儀
端肅進止詳雅藻美之試遣左右踐遐衣裾欲觀其舉
措遐徐步稍前曾不顧盼仕梁稍遷尚書功論郎陳郡
謝舉時爲僕射引遐與語甚嘉之顧謂人曰江漢英靈
見於此矣岳陽王蕭詧於襄陽承制授遐吏部郎賜爵
聞喜公尋進位持節侍中驃騎大將軍開府儀同三司
及詧踐帝位於江陵以襄陽來歸辭詧曰陛下中興鼎
業龍飛舊楚臣昔因幸會早奉名節理當以身許國期
之始終自晉氏南遷臣宗族蓋寡從祖太尉世父儀同

從父司空並以位望隆重遂家于金陵唯留先臣獨守墳柏嘗誠臣等使不違此志今襄陽旣入北朝臣若陪隨鑿蹕進則無益塵露退則有虧先旨誓重違其志遂許之因留鄉里以經籍自娛周文帝明帝頻徵固辭以疾及詔殂遐舉哀行舊臣之服保定中又徵之遐始入朝授驃騎大將軍開府儀同三司霍州刺史遐導人務先以德再三不用命者乃微加貶異示耻而已其下感而化之不復爲過咸曰我君仁惠如此其可欺乎卒贈金安二州刺史遐有至行初爲州主簿其父卒于揚州遐自襄陽奔赴六日而至哀感行路毀悴不可識後舉

喪西歸中流風起舟中人相顧失色遐抱棺號慟愬天
求哀俄頃風止浪息其母嘗乳閒發疽醫云此疾無可
救理唯得人吮膿或望微止其痛遐應聲卽吮旬日遂
瘳咸以爲孝感所致性又溫裕略無喜愠之容弘獎名
教未嘗論人之短尤尚施與家無餘財臨終遺誠薄葬
其子等並奉行之有子靖莊最知名

靖字思休少方雅博覽墳籍仕梁正員郎隨遐入周授
大都督歷河南廣德二郡守所居皆有政術吏人畏而
愛之然性愛閑素其於名利澹如也及秩滿還鄉便有
終焉之志隋文帝踐極特詔徵之以疾固辭優游不仕

閉門自守所對唯琴書而已足不歷園庭殆將十載子弟奉之若嚴君焉其有過者靖必下帷自責於是長幼相率拜謝於庭靖然後見之勗以禮法鄉里亦慕而化之或有不善者皆曰唯恐柳德廣知也時論方之王烈前後總管到官皆親至靖家問疾遂以爲故事秦王俊臨州賚以几杖并致衣物靖唯受几杖餘並固辭其爲當時所重如此開皇中壽終

莊字思敬少有器量博覽墳籍兼善辭令濟陽蔡大寶有重名於江左時爲岳陽王蕭譽諮議見莊歎曰襄陽水鏡復在於茲大寶遂以其女妻之俄而譽辟爲參軍

及笈稱帝累遷鴻臚卿及隋文帝輔政蕭巋令莊奉書入關時三方構難文帝懼巋有異志及莊還謂曰孤昔以開府從役江陵深蒙梁王殊眷今主幼時艱猥蒙顧託梁主奕業重光委誠朝廷而今已後方見松筠之節君還申孤此意於梁主也遂執莊手而別時梁之將帥咸請與尉遲迥連衡進可盡節於周氏退可席卷山南唯巋疑不可會莊至自長安申文帝結託之意遂言於巋曰今尉遲迥雖曰舊將昏耄已甚消難王謙常人之下者非有匡合之才况山東庸蜀從化日近周室之恩未洽於朝廷臣料之迥等終當覆滅隋公必私周國未

若保境息人以觀其變歸深以爲然未幾消難奔陳迥及謙相次就戮歸謂莊曰近若從衆言社稷已不守矣文帝踐祚莊又入朝帝深慰勉之及爲晉王廣納妃于梁莊因是往來四五反前後賜物數千段梁國廢授開府儀同三司除給事黃門侍郎莊明習舊章雅達政事凡所駁正帝莫不稱善蘇威爲納言重莊器識常奏帝云江南人有學業者多不習世務習世務者又無學業能兼之者不過柳莊高頴亦與莊甚厚莊與陳茂同官不能降意茂見上及朝臣多屬意於莊心每不平帝與茂有舊譖愬頗行尙書省嘗奏犯罪人依法合流而上

處以大辟莊據法執之帝不從由是忤旨俄屬尚藥進
丸藥不稱旨茂因奏莊不親監帝怒十一年徐璿等反
於江南詔莊以行軍總管長史隨軍討之璿平卽授饒
州刺史甚有能名卒於官

論曰韓褒奉事三帝以忠厚知名趙肅平允當官張軌
循良播美李彥譽流省閣郭彥信著蠻貊歷官出納並
當時之選也梁昕皇甫璠辛慶之王子直杜杲之徒並
關右之舊族或紆組登朝獲當官之譽或張壇出境有
專對之才旣茂國猷克隆家業美矣魏文帝云文人不
護細行其呂思禮之謂乎徐招檀翥孟信各以才學自

立又加之以清介並志能之士也宗懷才辭幹局見重
宋元逮乎播越秦中不預政事豈亡國俘虜不與圖存
者乎梁氏據有江東五十餘載挾筴紀事蓋亦多人劉
璠學思通博有著述之譽雖傳疑傳信頗有詳畧而屬
辭比事爲一家之言行本正色抗言具存乎骨鯁柳遐
立身之道進退有節觀其眷戀墳隴其孝可移於朝廷
盡禮舊主其忠可事於新君夫能推此類以求賢則知
人幾於易矣莊亮直之風不殞門表忠而獲謗蓋亦自
古有之

北史卷七十

北史卷七十考證

趙軌傳周蔡王引爲記室○蔡監本訛葵今改從隋書
其東隣有桑甚落其家○甚監本訛莫今改從隋書
張軌傳奉雍之間必有王者○奉周書作秦

郭彥傳累遷虞部郎中○虞監本訛寘今改從南本

皇甫誕傳諒用諮議王頰謀祭兵作亂○頰隋書作頰
本書王頰弟頰傳云授漢王諒府諮議參軍又云諒
遂舉兵反頰之計也可知頰字之訛矣

孟信傳又以一鑄借老人○又監本訛文今改從南本
柳遐傳其世父慶遠特器異之○下文伯父太尉云夢

以坐席與汝汝後名宦必遠等語與梁書慶遠從父
兄世隆謂慶遠語畧同